

## UGÁNU BUÍTI LE LABÜRÜJABEI LÚCAS LUÁGU JESÚSU

### *Labürüjani Lúcas lé meja asúseredubei*

<sup>1</sup> Lun Teófilo le weírigubei. Gíbeeña gürígia oúchutiña jabürüjani cátei lé buri luáguti wasálbarun lé meja asúseredubei wagánagua lídan lúaragun,

<sup>2</sup> áfaaguatiña jabürüjani ítara quei jarúfudajani ja aríjubalin buri cátei ligía lúmagiñe lagúmeserun, apúrichija jagía luágu, woun.

<sup>3</sup> Áu gíñe, álügüdajaadina gíñe buídu buídu libügürü sun cátei le asúseredubei lúmagiñe lagúmeserun, áni afíñetina luágu maríban lan lun nabürüjanun gárada to bun quei lubúdubu,

<sup>4</sup> subúdi bámugei linárün cátei le arúfudúaalibei bun buídu buídu. Niján le asúseredubei.

### *Lasúbudiragüdüni ában ánjeli luáguti lagüriajóun Juan le abásteragüdjabei*

<sup>5</sup> Dán meja le Heródes lan urúeibei Judéa, ñíñein meja ában fádiri lánina jafíñen juríu, gíríti Zacarías, jádaangiñeti fádirigu ja lánigu Abías. Elisabét tíribei lúmari, jádaangiñetu gíñe ladügawagun Aarón.

<sup>6</sup> Biángubei jagía, richáguatiña ligíbugiñe Búngiu, gúnfulitiña lúma, adüga jameí sun le lubeíbei darí lun siñá lan laríñawagún ni cáta wuríbati jawágu.

<sup>7</sup> Masáanigutiña ladüga siñá lan tagáragüdüni Elisabét, áni derébugugaaña gíñe jagía biángubei.

<sup>8</sup> Luágu ában wéyu, lídan lídáani jesériwidun lánigu Zacarías quei fádirigu ligíbugiñe Búngiu,

<sup>9</sup> ába jabúdujan según jagáburi fádirigu juríu, lun jasúbudiruni cába lan ebélura lídoun fulásu le sándutimaabei témpulurugu águdaja cupáli ligíbugiñe Búngiu, ába láburujan luágun Zacarías.

<sup>10</sup> Sun niján lan cupáli águdajoúa, añája gürígia bougudi ayúmuragua lun Búngiu.

<sup>11</sup> Ábati lasálriragun ában lání Wabúreme ánjeli lun Zacarías, rára lueígiñe loúnwenren latárü le ñí lubei cupáli.

<sup>12</sup> Dan le laríjini Zacarías ánjeli ligía, ába laweíridun lanígi, ába lebélorun anúfudei lídoun.

<sup>13</sup> Ába laráñagun ánjeli ligía lun.

—Manúfudebá, Zacarías, ladüga agáamba láali Búngiu bayúmuragun, tagáraüduba búmari ában irájü, ábame bíchuguni líri Juan.

<sup>14</sup> Tabuínchuba banígi láu ugúndani luágu, áni sarágujaba gíñe agúndaarutiña láu lagüriajóun,

<sup>15</sup> ladüga weírigubei biraü ligíbugiñe Búngiu. Mátunbei diweín ni bínu, áni ñíbei Sífiri Sándu lúma lúmagiñe lubáragiñe lagüriajóun lun ladúndejani lídan sun cátei.

<sup>16</sup> Ladügüba lun jagíribudun sarágu jádaangiñe Israelítagu lun jagáambuni Jabúngiute,

<sup>17</sup> lesériwiduba lun Búngiu láu sarágu ubáfu quei meja ladügüni Elías. Laráansejaba lubá Jesúsu láu laráandaragüdüniña agübürigu jáma isáanigu, láu gíñe larúfudajan joun ja magáambadibaña lun Búngiu lun júaradun lúma queísi gürígia richáguatiña. Ítara lúba laráanseruniña lubá jerésibiruni Jabúreme Jesúsu.

18 Ába lariñagun Zacarías lun ánjeli ligía.

—¿Ída lubági nachoúruni cátei le? Áu táu sun númeri, derébugugaadiwa.

19 Ába lariñagun ánjeli ligía lun.

—Gabriél áu, áni nesériwiduña lun Búngiu, ligía oúnajabalina adímureja bun lun níchuguni ugánu buíti le bun.

20 Guetó, quei mafíñerun bubeí luágu le nariñagubei bun, berédera merérunga, siñabei badímurejan daríme lagüriajoun biraü. Lagúnfuliruba cátei le lídan lidáni.

21 Sun dan le, añájati buga güri-gia bougudi agúrabajei Zacarías, weírititi janígi luágu lílü témpulurugu.

22 Dan le láfuridunbei, siñá ladímurejan joun, ábati jasúbudiruni luágu salígua lan som cátei lun, témpulurugu. Ladímurejati joun láu seíni, meréngadijaali.

23 Dan le lagúmuchun dan le lúnbei lesériwidun Zacarías témpulurugu, ába lídin lúbiñoun.

24 Lárigiñe cátei le, ába tadágeinadun Elisabét, to lúmari, ába máfuridun tan jábiñegiñe luágu seíngü játi, teréngati túnguarügü.

25 “Ladügüñein Búngiu lubuídun cátei le nun guelé lun lagídaruni nibúsigari jagíbugiñe güri-gia.”

*Lasúbudiragüdüni ában ánjeli luáguti lagüriajoun Jesúsu*

26 Sísi játi lárigiñe, ába loúnajani Búngiu ánjeli Gabriél lídoun ában ubúrugu láni Galiléa, gíriti Nazarét,

27 lun lídin bisídoun ában würi irájügiru, gíritu María. Würi tugúya, gadáraduñoun lúma ában

wügüri gíríti José lun tamárieidun lúma, wügüri ligía, linébaanfan urúei Davíd.

28 Ába lebélorun ánjeli ligía le ñíjin tubeí, ába laríñagun tun.

—¡Báfaguagüle, María! Níjein Búngiu búma, binílaadibu sügü jáu sun würíña.

29 Dan le tagáambuni ánjeli ligía, ába tájüchürün láu le laríñagubei, ába tálügüdagun túngua ca lan uágu labúsura tun ítara.

30 Ábati laríñagun ánjeli ligía tun.

—Manúfudebá María, fuleísei láadibu Búngiu,

31 badágeinada, ábame bagüriajan ában irájü, ábame bíchuguni líri Jesúsu.

32 Weírigubei, Liraü Búngiu le íñubei lúba lagúarúniwa, áni larúeigüdübei Wabúreme Búngiu quei larúeigüdüni Davíd, le binádu lidúje.

33 Lagúmadirubei linásiñun Israél lun sun dan, áni magúmuchadibei lagúmadijan.

34 Ábati taríñagun María lun ánjeli ligía.

—¿Ída lubági lasúseredun cátei le, mámarigidinagu?

35 Ába laríñagun ánjeli tun.

—Liábinba Sífiri Sándu buágun, ábame louburagunibu lubáfu Búngiu. Ligía sándubei lubeí irájü le lúnbei bagüriajani, Liraü Búngiu lúba lagúarún.

36 Tiábin bidúje to Elisabét, dageínaaru gíñe lau sun weíyaaru lan, tagáraüdüba ában wügüri irájü, ítara líña lubeíti, tó meja uáguboun jaríñaga luágu siñá lan tagáraüdun, níjein sísi játi dageínaü tuágu.

37 Úati ni cáta siñáti lun Búngiu.

38 Ábati taríñagun María.

—Lidámun Nabúreme Búngiu nugúya, adügaleí le bariñagubei náu.

Lárigiñe, ába lídin ánjeli.

*Tídin María bisídoun Elisabét*

<sup>39</sup> Lídoun dan ligía, ába tídin María furése lídoun ában ubúругu le labádinaguabei buri wübü Judéa,

<sup>40</sup> ába tebéлurun lúbiñoun Zacarías, ába tabúsurun tun Elisabét.

<sup>41</sup> Dan le tagáambuni Elisabét tabúsurun, ába lánjingichagun tiraü turágeirugu, ába liábin Sífiri Sándu tuágun.

<sup>42</sup> Ábati tariñagun láu umálali le jéreti.

—Binílaadibu Búngiu sügü jáu sun jiñáriñu, binílaali giñe biraü.

<sup>43</sup> ¿Cátanañadina lun tiábin lúguchu Nabúreme bisídana?

<sup>44</sup> Láu nagáambuni babúsurun, ába lánjingichagun niraü nurágeirugu láu ugúndani.

<sup>45</sup> Gúndaatibu bugúya le afíñerubei, luágu lagúnfuliruba lan cátei le laríñagubei Wabúreme bun.

<sup>46</sup> Ábati tariñagun María.

Rútu nuwáni uweíriguni lun Nabúreme,

<sup>47</sup> gúndaagua tugúya nanígi luágu Búngiu le Nasálbaragüle,

<sup>48</sup> lugúndun gudémejabujaali nun, nugúya le lidámun.

Lúmagiñe guelé, jariñaguba sun gürígia luágu fuleíseiwaadina lan,

<sup>49</sup> ladüga adügaali Búngiu, le Súnti Gabáfu, cátei weínamuti nun, sánduti líri.

<sup>50</sup> Súnwandan gudémebaña lan ja inébejabúbaña lun, lun.

51 Adúgaali oúnwenbun buri cátei,  
adügaali lun ni cáta jamá ja barüguabaña jóungua.

52 Gídálaaña ja gabáfubaña lídaangiñe jaweírigun,  
ja únabubaña, ába ladügüniña lun weírigu jamá.

53 Já buga lamábaña, quimúlegüda lumútiña,  
ánjeinti ja rísibaña, míchugunti ni cáta joun.

54 Íderagua lumútiña linásiñun Israél, ja  
eseriwidubaña lun,  
mabúleidun lumúti lun gudémejabu lan,

55 queí meja lidáradun jáma binádu wagübürigu—  
Abrahám jáma ladügawagun—lun gudémejabu lan  
joun lun sun dan.

56 Ába teréderun María ürüwa játi ñi, lárigiñe, ába  
tagíribudun jábiñoun.

*Lagüriajóun Juan le abásteragüdjabei*

57 Ába lagúnfulirun dan lun tagüriañan Elisabét,  
ába tagüriañan ában wügüri irájü.

58 Dan le jagáambun tubésinanigu jáma tidújeñu  
luágu lubuídun cátei le ladügübei Búngiu tun, ába  
jagúndaarun úara túma.

59 Luágu liwídün wéyu, ába lerésibiruni circun-  
cisión, le liseíni luágu láni lan Búngiu irájü ligía.  
Buséntiña yebéti jíchuguni líri lúguchi luágu, le  
Zacarías,

60 ába taríñagun lúguchu.

—Uá, Juánba líri.

61 Ába jariñagun tun.

—¿Cági uágu? Úati ni ában jádaangiñe  
binébaanfaangu gíriti Juan.

62 Ába jálügüdüni lúguchi irájü láu seíni ca lan íri  
labúseerubei líchugun luágu.

63 Ába lamúriajan ában murúsun fuláansu, ába labürüdün luágun. “Juan líribei.” Ába laweíridun janígi súnigubei láu cátei le.

64 Lídán méme óra ligía, ába gayáraajaali lan ladímurejan Zacarías, ába líchugun uweíríguni lun Búngiu.

65 Ába laweíridun janígi besínagu láu cátei le, ába labájüdawagún cátei le lídan sun fulásu geyégua jáu.

66 Sun ja agáambubalin, ába jeréderun asáminara, ába jálügüdagun jámagua, jaríñaga.

—¿Cáteibeí funasan irájü le?

Ladüga biní lumútija Búngiu le tímatimaati.

### *Lerémujan Zacarías*

67 Ába liábin Sífiri Sándu luágun Zacarías, le lúguchi irájü ligía, ába ladímurejani Zacarías dimúrei le laríñagubei Búngiu lun, ába laríñagan.

68 Buidulá ladímurejoún luágu Wabúreme le Jabúngiutebei gürígia ja Israelítagu, ladüga ñübinjali woun, wagía le lánigu, áni sálba láadiwa.

69 Rújali ában Asálbaragülei le gabáfuti woun jádaangiñe linébaanfaangu Davíd, lé meja esériwidubei lun.

70 Ítara líña meja laríñaguni Búngiu jádaangiñe láni profétagu ja ederegeragubaña jóungua lun, lúmangiñe meja binádu dan,

71 luágu lasálbarubádiwa lan jaweí wáganiñu lúma jaweí sun ja iyéreejabúbaña woun.

72 Ítara líña gudémejabu lan Búngiu joun binádu wagübürigu, arúfudaleí luágu mabúlieidagun lan lueí lidáradun le sándubei jáma.

- 73 Niján lé meja laríñagubei lun wáguchi Abrahám.  
 74 luágu leséfurubadíwa lan jaweí wáganiñu,  
 lun gayáraabei lan wesériwidun lun manúfudeiga,  
 75 láu úarani, derégeguñu wagía woúngua lun, sun  
 dan le wabágaridubei.
- 76 Áni bugúya nisáaniraü, láni Búngiu le íñubei  
 proféta lúba bagúarúniwa,  
 ladüga baráansejaba lubá Wabúreme,  
 77 subúdi lámuga üma lánina asálbaruni joun lánigu,  
 le áubei ferúdunawa lan jafígoun.
- 78 Wabúngiute, láu lísiñejabu lúma lugúdemejabu,  
 loúnajabei Crístu wámoun siélugiñe  
 79 lun larúgoungadágüdün jáu ja lídaanbaña lubúriga  
 lúma jáu ja luágubaña üma le ouwenibei  
 lébeja,  
 lúma lun ladúndejani wapásun lídoun üma le  
 anügübaliwa lídoun darángilaü.
- 80 Aweírdeina ligíati irájü ligía, afáragadagueina  
 giñe lídan láni espíritu. Ába laganoun lídan fulásu  
 mageírawati darí lúmoun wéyu le lagúmeserun  
 luwádigimari lun Búngiu jagánagua lumútuniña  
 Búngiu ja Israelítagu.

## 2

### *Lagüriajouñiwa Jesúsu* (Mt 1.18-25)

- 1 Lídoun buga dan ligía, ába laríñagun urúei  
 Augústo lun jabájüdün sun gürígia ja Rómabaña.
- 2 Furúmiñe meja jadügüni cátei le, dán meja le  
 Cirénio lan agúmadijabei Síria.
- 3 Súnti gürígia mósu jouñin jageíra lun ñi lan  
 jabájüdüwa.



4 Ligía láfuridunbei José Nazarétgiñe, louúbawagugiñe Galiléa, ába lídin louúbawagun Judéa lídoun fulásu le gírubei Belén, le ñí lubei lagüriajouá Davíd, quei linébaanfan lubei Davíd José.

5 Ába lídin Belén lun labájüdün úara túma María to gadáradunboun lúma lun jamárieidun, áni dageínañoun.

6 Dánti le añája lan ñi Belén, ába lachülürün dan lun tagüriajan María.

7 Ába tagüriajani furúmiñeti tiraü ñi, ába touúburaguni tídan lágei, ába tarouñragüdüni ñi tídan jában anímaalu ladüga úati ubáraü joun tídan jában chülüdügütiña.

*Ánjeligu jáma ouñigirutiña mudún*

8 Lídan áraabu bougudi luei Belén, ñiñanu jouniri mudún, bou larúgan jáu ouñigiraña jalügüniña mudún.

9 Sódini, ába lasáliragun ában lání Wabúreme Búngiu ánjeli siélugiñe joun, ába jaríjin ában ouñwenbun larúgounga le lánina Búngiu geyégua jáu, ába janúfudedagun.

10 Ába laráñagun ánjeli ligía joun.

—Manúfueda jumá, ladüga níjein ugánu buíti nanügün jun, lébunabei sarágu ugúndani joun sun güriá.

11 luágu agüriajouáali lan ában asálbaragülei jun ugúñe, lageíra Davíd, Crístu le Jabúreme.

12 Jadárirubei irájü ligía jouúburagu tídan lágei, roun tídan jában anímaalu.

13 Lídan óra ligía, ába jasáliragun sarágu ánjeligu lubádu furúmiñeti ánjeli, ába jíchugun uweíriguni lun Búngiu, jaríñaga.

14 ¡Uweírighuni lun Búngiu lídan líñutima siélu, darángilaü múarugu jádan gürígia ja ibíjubalin lufúleisein!

15 Dánti le jagíribudun ánjeligu járigoún siélu, ába jaríñagun jóuniri mudún jámagua.

—Queímoun Belén aríjei cátei le asúseredubei, le uágubei lasúbudiragüda Wabúreme Búngiu woun.

16 Ába jóudin furéseguina, ába jadárirunun María lúma José, lúma irájü roun tídan jában anímaalu.

17 Dan le jaríjinbalin, ába jabájüdaguni le laríñagubei ánjeli joun libügürü le.

18 Súnti ja agáambuliña, weíríti janígi láu le jaríñagubei.

19 Áni María, areídañu tíñein sun cátei le tídan tanígi, arítagua luágu.

20 Ábati jagíribudun jóuniri mudún, adímurejeina weíri luágu Búngiu, luágu sun le jagáambubei lúma le jaríjibe, ladüga suséreti ítara quei laríñawagúniwa joun.

### *Larífudúniwa Jesúsu témpulurugu*

21 Luágu liwídün wéyu, ába lerésibiruni circuncisión, ába jíchuguni líri Jesúsu, íri méme le líridubei ánjeli tun María lubáragiñe tadágeinadun.

22 Dan le lagúnfulirunbei lidáani jarúmadun lagübürigu Jesúsu según igáburi lídan lilúrudun Moisés, ába janügüni irájü ligía ubúrugin Jerusalén lun jedégeruni lun Búngiu.

23 Jadügünbalin líra ladüga laríñajare tídan lilúrudun Búngiu. “Sun furúmiñeti wügüri irájü agüriajóuti lúnbei Búngiu.”

24 Ába lubeíti jóúdin adágaragüda le uágubei lariñaga lilúrudun Búngiu. bián wagúgua o bián lan únjun.

25 Lídan meja dan ligía, ñíñein meja ában wügüri Jerusalén gíriti Simeón. Wügüri ligía ában wügüri buíti, weíriti ledéregeragun lúngua lun Búngiu, áni agúraba lumúti liábin Crístu, le lúnbei lasálbaruniña Israelítagu. Ñíñein Sífiri Sándu lúma Simeón,

26 áni arúfuda láali lun luágu moúnwenbei lan maríjingleí Crístu le lúnbei loúnajani Wabúreme Búngiu.

27 Ába lídin wügüri ligía témpulurugun, ladúndejan Sífiri Sándu. Dánti le janügünbalin lagübürigu Jesúsu Jesúsu témpulurugun lun jadügüni le lariñagubei lúrudu láu,

28 ába louyuajani Simeón, ába líchugun eteíngiruni lun Búngiu, aríñageina ligía.

29 Nabúreme, gayáraajali bígirunina lun noúnwen láu darángilaü, nugúya le esériwidubei bun, ladüga gúnfuli báali le baríñagubei nun.

30 Aríja náali Wasálbaragüle láu nágu,

31 Asálbaragülei le boúnajabei joun sun gürígia.

32 Ítara lúba queísi ában lámpu lun larúfuduni inárüni joun ja mámabaña juríu,

ru ligíame uweíríguni joun Israelítagu, ja bánigu.

33 Ába laweíridun lanígi José táu sun María láu le lariñagubei Simeón luágu irájü le.

34 Ábati labíniruniña Simeón, ába lariñagun tun María, to lúguchu Jesúsu.

—Írájü le, lébunabei achúgeraguni joun sarágu Israelítagu, lébunabei gíñe asálbaruni joun jíbiri. Ítara

lúba queísi ában seíni le lúnbei gíbe jamá májatiña jerésibiruni.

<sup>35</sup> Ítara lúba lasúbudirúniwa le larítagubei cáda ában tídan lanígi luágu Crístu. Áni ítara lúba sun cátei le bun quei ában efeín to ácharurutu tuágu buwáni.

<sup>36</sup> Níñoun gíñe ában würi proféta, gíritu Ána, würi tugúya liraü Fanuél, jádaangiñe ladügawagun Áser. Weíriyaaru würi tugúya, ñúraügiru meja tamárieidunbei, sédüñein irúmu táu lúma túmari, ába loúnwen,

<sup>37</sup> guetó, gádürü-weín-gádürü irúmu táu. Máfuriduntuti témpulurugugiñe, terédera ñi esériwida lun Búngiu áriebu wéyuagu, ayúnara lúma ayúmuragua lun Búngiu.

<sup>38</sup> Ába tiábin Ána jawágun María, José, lúma Jesúsu lídan méme óra ligía, ába teteíngiruni Búngiu luágu irájü ligía, adímureja tugúya luágu Jesúsu joun sun ja agúrabajabaalin lasálbarún Jerusalén.

### *Agíribuduni Nazarétin*

<sup>39</sup> Lárigiñeti jagúnfulirun láu sun le laríñagubei lilúrudun Búngiu, ába jagíribudun María, José, lúma Jesúsu Galiléoun lídoun jabúrugute le Nazarét.

<sup>40</sup> Aweírideina ligíati irájü le, éredeina ligía, afáragadagueina lídan lichú áu, biní lumútijati Búngiu sarágu.

### *Jesúsu témpulurugu*

<sup>41</sup> Ságüja irúmu jóudin lagübürigu Jesúsu ubúругu Jerusalén lubá fédu le páscua,

<sup>42</sup> áni dan le lagúnfulirunbei Jesúsu dúusu irúmu, ába jóudin súngubei Jerusalén quei le jagáburi lídan fédu ligía.

43 Dánti le jagíribudun lárigiñe lagúmuchagun fédu, ába leréderun irájü ligía Jerusalén, ibídiñoun tun lúguchu ni lun José,

44 jarítagún yebe luágu níten lan jádan güri-gia ja jámarigubaña luágu üma. Ítara líña jadügün ában wéyu eíbuguni, dan le jáluajani jádan jadújeñu lúma jádan jasúbudiraagun,

45 madári jamúti. Ábati jagíribudun ubúrugun Jerusalén áluajei ñi.

46 Ürüwa wéyu lueígiñe, ligía jadáriruni témpulurugu ñun jádan arúfudajatiña lilúrudun Moisés, agáambajaña, álügüdaguaña.

47 Súnti ja agáambubalin, weíríti janígi luágu lichú láu lúma luágu buri loúnabagüle.

48 Dan le jaríjinbalin lagübürigu, ába laweíridun janígi, ába taríñagun lúguchu lun.

—¿Cáme badügei cátei le woun, niraü? Nugúya lúma búguchi, wáluajañadibutia láu idíjeri.

49 Ábati laríñagun Jesúsu joun.

—¿Cági uágu jáluajana? ¿Ibídiñeti jun luágu lúnti lan neténirun lun cátei le láni Núguchi?

50 Úati gunfaráanda jamáni le laríñagubei joun.

51 Ábati lagíribudun jáma, Nazarétün, ába lasígirun láu meme lagáambadi joun. Ábatí buri tareíduni lúguchu sun cátei le tarítangunrugun.

52 Niján mémeti Jesúsu aweírideina dándu lúgubu queísi lisáminan, áni buítiti dándu ligíbugiñe Búngiu quei jagíbugiñe güri-gia.

### 3

*Lapúrichijan Juan le abásteragüdajabei, lídan fulásu mageírawati*

*(Mt 3.1-12; Mr 1.1-8; Jn 1.19-28)*

<sup>1</sup> Lídan liqueínsin lirúmuduri lagúmadijan Tibério César, Póncio Piláto ligía meja gumándanbei Judéa, Heródes gumándan Galiléa, Felípe, le lamúlen, ligía gumándan Itúrea lúma Traconíte, Lisanías gumándan Abilínia,

<sup>2</sup> Anás lúma Gáifasi, jagía fádirigu íñutimáabaña lídan jafíñen juríu. Ábati líchugun Búngiu ában ugánu lun Juan, le liraü Zacarías, lídan fulásu mageírawati,

<sup>3</sup> ába leíbuguni Juan sun fulásu buri le lubádubei dúna le Jordán, aríñagueina joun gürígia luágu lúnti lan jaságürijan luágu jafígoun, sáansi jameíme jagáburi lun ferúdunawa lan jafígoun, badísei jagíame.

<sup>4</sup> Suséreti cátei le ítara queí meja labürüdüni proféta Isaías, laríñaga.

Agaambúati lumálali ában agúarajati lídan fulásu mageírawati ítara.

“Aráanseja jumóun janígi lubá liábin Wabúreme, queísi ladárarúniwa üma surúti.

<sup>5</sup> Labuínchagüdüwaba sun gudúngu, sun wübü, lagurúaba, üma buri le segéti, lásururuba, üma buri le múaragunti, lúwaradaguba.

<sup>6</sup> Larijúbei sun ubou Wasálbaragüle, le loúnajabei Búngiu woun.”

<sup>7</sup> Ñübintiña sarágu gürígia lun Juan lun labásteragüdüniña, ába laríñaga joun.

—¡Jarásan jéwe jugúya le! ¿Ca awísarubalün lun jeibaagun lueí lanárime lafáyeiragüle figou le yaráfaalibeí?

<sup>8</sup> Ígira jumeí binádu jigáburi, abágarida jumá lun gayára lan larijín buídu luágu sáansiguaali lan jigáburi. Maríñaga jumá jídaangua. “Linébaanfaangu Abrahám wagía”, ladüga quei nariñaguni jun, gayáraati ladügün Búngiu linébaanfaangu Abrahám lídaangiñe buri dübü le.

<sup>9</sup> Yaráfaali dan lun jafáyeijan luágu jifígoun queísi taráanserún jaráwa lun tánychuguni tídibu wéwe. Sun ídibu le mabuídunti lin lánchugúba, ábame lagudún.

<sup>10</sup> Ábati jariñagun gürígia jagía lun.

—¿Cáteiti lúnbei wadügüni?

<sup>11</sup> Ába lariñagun Juan joun.

—Le biámabei isímisin, lúnti líchugun ában lun le úaboun ni ában lúma, le geíginbei, lúnti lafánreinraguni lúma le meíginbei.

<sup>12</sup> Nñübintiña gíñe agúburajatiña liseínsuna gumádi lun jabásterun, ába jariñagun lun.

—Maésturu, ¿ca cátei lúnbei wadügüni?

<sup>13</sup> Lariñaga Juan joun.

—Magúburaja jumá lougiñe le uágubei lariñaga lúrudu.

<sup>14</sup> Aríñagatiña gíñe fiú súdeara lun.

—Ángi wagía, ¿cági lúnbei wadügüni?

Lariñaga joun.

—Magídara jumá ni cáta ni ca ueí, ni láu siádi, ni láu jíchugun lidúnrun mútu le madügün lumúti, gufúruma jumá láu jafáyeiruaja.

<sup>15</sup> Añájati gürígia madéraguagüdünja arítagua luágu fágua lan Juan Crístubei,

16 ába lariñagun Juan joun súngebey.

—Áu, láu dúna nabásteragüdaün, nítenbey ában le lúnbey labásterágüdünün láu Sífiri Sándu lúma láu queísi wátu geméti, ligía Crístubey. Gabáfutimaati nueí darí lun madúna nan ni lun nafáragaduni tagürüga ligeídin.

17 Dánme liábin, jafánreinrúaba gürígia ja lánigubaña jádaangiñe ja wuríbabaña queísigubeirügü lagídarúniwa ífei lídaangiñe türígu buíti, ába loundarún türígu buíti tídoun lágei, ába lagudún ífei lídan wátu geméti le méñeguchati.

18 Láu igáburi le lúma láu buri ámu ewéridijani líchigei Juan ugánu buíti joun gürígia luágu wasálbaragüle.

19 Erérati gíñe lun gumándan Heródes luágu laganóun túma Heródias, to lúmari Felípe, le lamúlen, lúma luágu ámu buri cátei wuríbaty le ladügübey.

20 Lubáragiñe ladügün Heródes gásu láu, adügarügü ligía ában cátei wuríbatimaati. ládaruni Juan furisunrugun.

### *Labásterun Jesúsu*

*(Mt 3.13-17; Mr 1.9-11)*

21 Lubáragiñe ladaürüniwa Juan, dan le labásteragüdüniña gürígia, badíseiti gíñe Jesúsu. Dánti le niján lan Jesúsu ayúmuragua lun Búngiu, ába lánjunrenchagun juánriñu,

22 ába larijiniwa larárirun Sífiri Sándu luágun camá jamuga ában únjun, ába lagaambúniwa lariñagun ában umálali siélugiñe.

—Amürü Niraü le jínsiñebey nun, gúndaatina báu.



*Linébaanfaangu Jesúsu*  
(Mt 1.1-17)

<sup>23</sup> Queí burí darándi irúmu láu Jesúsu dan le lagúmeserunbalin luwádigimari le uágubei loúnajei Búngiu. Jarítawagúati luágu liraũ lan José, José, liraũ Elí,

<sup>24</sup> Elí, liraũ Matát, Matát, liraũ Leví, Leví, liraũ Melquí, Melquí, liraũ Jána, Jána, liraũ José,

<sup>25</sup> José, liraũ Matatías, Matatías, liraũ Amós, Amós, liraũ Nahúm, Nahúm, liraũ Eslí, Eslí, liraũ Nagái,

<sup>26</sup> Nagái, liraũ Maat, Maat, liraũ Matatías, Matatías, liraũ Semeí, Semeí, liraũ José, José, liraũ Judá,

<sup>27</sup> Judá, liraũ Joána, Joána, liraũ Résa, Résa, liraũ Zorobabél, Zorobabél, liraũ Salatiél, Salatiél, liraũ Néri,

<sup>28</sup> Néri, liraũ Melquí, Melquí, liraũ Adí, Adí, liraũ Cosám, Cosám, liraũ Elmodám, Elmodám, liraũ Er,

<sup>29</sup> Er, liraũ Josué, Josué, liraũ Eliézer, Eliézer, liraũ Jorím, Jorím, liraũ Matát,

<sup>30</sup> Matát, liraũ Leví, Leví, liraũ Simeón, Simeón, liraũ Judá, Judá, liraũ José, José, liraũ Jonán, Jonán, liraũ Eliaquím,

<sup>31</sup> Eliaquím, liraũ Meléa, Meléa, liraũ Mainán, Mainán, liraũ Matáta, Matáta, liraũ Natán,

<sup>32</sup> Natán, liraũ Davíd, Davíd, liraũ Isaí, Isaí, liraũ Obéd, Obéd, liraũ Booz, Booz, liraũ Salmón, Salmón, liraũ Naasón,

<sup>33</sup> Naasón, liraũ Aminadáb, Aminadáb, liraũ Arám, Arám, liraũ Esróm, Esróm, liraũ Fáres, Fáres, liraũ Judá,

<sup>34</sup> Judá, liraü Jacób, Jacób, liraü Isáac, Isáac, liraü Abrahám, Abrahám, liraü Taré, Taré, liraü Nacór,

<sup>35</sup> Nacór, liraü Serúg, Serúg, liraü Ragáu, Ragáu, liraü Pelég, Pelég, liraü Héber, Héber, liraü Sála,

<sup>36</sup> Sála, liraü Cainán, Cainán, liraü Arfaxád, Arfaxád, liraü Sem, Sem, liraü Noé, Noé, liraü Laméc,

<sup>37</sup> Laméc, liraü Matusalén, Matusalén, liraü Enóc, Enóc, liraü Jaréd, Jaréd, liraü Mahalaléel, Mahalaléel, liraü Cainán,

<sup>38</sup> Cainán, liraü Enós, Enós, liraü Set, Set, liraü Adán, Adán, liraü Búngiu.

## 4

### *Loúchawagúniwa Jesúsu (Mt 4.1-11; Mr 1.12-13)*

<sup>1</sup> Ába lígiruni Jesúsu fulásu loúbawagu dúna Jordán, buin láu lubáfu Sífiri Sándu, ába lanügüni Sífiri Sándu lídoun fulásu mageírawati.

<sup>2</sup> Reídeiti Jesúsu bián-wein wéyu ñi láu Máfia ouchaguei ánjein áburuja lídoun wuríbani. Meíginti ni cáta lídan sun bián-wein wéyu ligía, ába lasándirun ában ounwenbun ilámaü.

<sup>3</sup> Ábati laríñagun Máfia lun.

—Ánjein Liraü bubei Búngiu, salíguagüdabeí dübü le feínme.

<sup>4</sup> Laríñaga Jesúsu lun.

—Tariñajare Lerérun Búngiu. “Mámarügüba táu fein jabágarida gürígia, jabágariduba gíñe láu jagúnfulirun láu sun dimúrei le laríñagubei Búngiu.”

<sup>5</sup> Lárigiñe, ába lanügüni Máfia Jesúsu luágun ában wübü íñuti, ába larúfuduni sun fulásu le ubouágubei lun lídan ában.

<sup>6</sup> Ába laríñagun Máfia lun.

—Níchugubei sun ubáfu lúma sun uweírighuni le bun

<sup>7</sup> ánjabu ájuduragua nun lun banügünina quei bubúngiute, bánibeí súngubei, ladüga ibíja náali sun le, áni gayáraati níchuguni lun le únti nabúseera.

<sup>8</sup> Ába laríñagun Jesúsu lun.

—Dísebá nueí, Máfia, ladüga taríñajare Lerérun Búngiu. “Judúguabá lun Búngiu le Babúreme, lúnrügülá besériwida.”

<sup>9</sup> Lárigiñe, ába lanügüni Máfia ubúrugun Jerusalén, ába laweínragüdüni tábulugu témpulu, ába laríñagun lun.

—Ánjein Liraü bubei Búngiu, chüguabá búngua yágiñe lun ünabun,

<sup>10</sup> ladüga taríñajare Lerérun Búngiu.

Loúnajabaña Búngiu láni ánjeligu lun joúnigiruníbu,  
<sup>11</sup> janügübadibu jájaburugu lueí labúleiseirun bugüdi luágu dübü.

<sup>12</sup> Ába laríñagun Jesúsu lun.

—Taríñajare giñe Lerérun Búngiu. “Moúchaguabeí Búngiu le Babúreme.”

<sup>13</sup> Dánti le madárijali Máfia cába lan luwúyeri ouchwagüni ladüga lun Jesúsu, ába lígiruni lúngua luágu átiri dan.

*Lagúmeseruni Jesúsu luwádigimari Galiléa  
(Mt 4.12-17; Mr 1.14-15)*

<sup>14</sup> Ába lagíríbudun Jesúsu Galiléoun buin láu lubáfu Sífiri Sándu, ába buríti ladímurejoún luágu lídan sun fulásu geyégua.

<sup>15</sup> Arúfudajatija tídan jalígílisin juríu lídan sun fulásu, buíti jadímurejan sun gürígia luágu.

*Jesúsu lídan ubúruğu Nazarét*  
(Mt 13.53-58; Mr 6.1-6)

16 Ábati lídin Jesúsu Nazarétün, le fulásu le ñí lubei lagüriajouá, ába lebélorun tídoun jalígílisin juríu lídan wéyu le eméraaguagülei quei ligáburi yebu, ába laráramun lun lalíjan tídan Lerérun Búngiu.

17 Ába jíchugunun líliburun proféta Isaías lun, dan le ladárunun, ába ladáriruni le ñí lubei laríñaga ítara.

18 Níjein láni Búngiu Sífiri Sándu nuágu, ladüga anúadaja láadina lun níchuguni ugánu buíti joun gudémetiña, oúnaja láadina lun námaliñaniña ja nidíjeribaña tídan janígi,

lun náfuridagüdüniña adaürütiña, lun níchugun aríjini joun maríjintiña, lun neséfuruniña ja ouserúabaña wuríba,

19 lun nadímurejan luágu dan le fuleíseijabu lan Búngiu joun gürígia.

20 Ába ladárunun Jesúsu líburu, ába líchugunun lun ídejati tánina ligílisi, ába lañúurun. Queíti jasígirun sun ja ñíbaña aríaguei,

21 ába lagúmeserun adímureja, laríñaga.

—Ugüñe guánarü gúnfulijali cátei le jigíbugiñe.

22 Adímurejatiña sun jagía buíti luágu Jesúsu, weirititi janígi luágu lubuídun buri dimúrei le laríñagubei. Jálügüdagua buríti jámagua.

—¿Mámasan le liraü José le?

23 Ába laríñagun Jesúsu joun.

—Subúsiti nun luágu jaríñagubei lan cátei le nun. “Surúsia, agáraniguabá búngua”, jaríñaguba giñe

nun. “Agáambaadiwa luágu buri cátei le adüga báalibeí Capernaúm, adügabeí gíñe ya bageíra.”

<sup>24</sup> Ába lasígirun adímureja, laríñaga.

—Ninárün jáu luágu úa lan ni ában proféta erésibirúati buídu lageíra.

<sup>25</sup> Choúru numúti luágu añájein lán meja sarágu würiña ja jiláguañábaña jámarigu jádan Israelítagu lídan meja lidáani proféta Elías, dan le májuyun lubeí júya luágu ürüwa irúmu dimí, ába ñi lan sarágu ilámaü fulásurugu,

<sup>26</sup> áni moúnajan lumúti Búngiu Elías túmoun ni ában jádaangiñe würiña jiláguaaña jámarigu jagía ja aganoubaña Israél, loúnajei túmoun ában to aganouboun Sarépta, yaráfa lun ubúrgu Sidón.

<sup>27</sup> Ñíñanu meja gíñe sarágu gawágutiña gumeín luágu jára ñi Israél lídan lidáani proféta Eliséo, úati ni ában jádaangiñe areídawaguagüdüti lueídügüya Naamán le Síriana.

<sup>28</sup> Dan le jagáambunbalin sun ja ñíbaña ligílisirugu cátei le, ába jagáñidun sarágu.

<sup>29</sup> Ába jásaarun, ába jaságaruni Jesúsu bougudín lueí fulásu, ába janügüni lábulugun wübü le gagíbuagubalin fulásu lun jájuchuruni ñígiñe.

<sup>30</sup> Ába lásügürün Jesúsu jamídaanguágiñe jámagua, ába lídin.

*Ában wügüri gawáguti espíritu wuríbatí  
(Mr 1.21-28)*

<sup>31</sup> Ábati lídin Jesúsu Capernaúm, ában fulásu le lídaanbei Galiléa, ába larúfudajan joun gürígia ñi lídan wéyu le eméraaguagülei.

<sup>32</sup> Weírítiti janígi láu ligáburí larúfudajan, ladüga láu ubáfu ladímureja.

33 Ñĩneinti ában wügüri ligílisirugu, gawáguti espíritu wuríbati, ába lagúaragun ítara.

34 —Ígira báwa, ¿ca uágu bemétera wámoun, Jesúsu le Nazarétna? ¿Biábiña agünrinchaguawa? Subúdi numútibu, áni subúdi numúti luágu amürü lan Li-raũ Búngiu le sándubei.

35 Ába ladeínjan Jesúsu lun espíritu wuríbati ligía, ába laríñagun lun.

—¡Maníba, furíba lídaangiñe gürígia le!

Ábati lájuchuruni espíritu wuríbati wügüri ligía múarugun jagíbugiñe súngubei, ába láfuridun lídaangiñe, mabúleiseirunga.

36 Ába laweíridun janígi súngubei, ába jaríñagun jámagua.

—¿Cáteisán buri dimúrei le? ¡Adímurejati wügüri le láu gumádi lúma ubáfu joun espíritugu wuríbatiña, ába jáfuridun!

37 Adímurejoúatiti buri luágu Jesúsu lídan sun fulásu geyégua.

*Lareídaguágüdünnun Jesúsu límenidi Pédro  
(Mt 8.14-15; Mr 1.29-31)*

38 Ábati láfuridun Jesúsu tídaangiñe jalígílisin juríu, ába lídan lúbiñoun Simón. Sándiñounti límenidi Simón, tabíruajaña, ába jayúmragun lun Jesúsu lun lareídaguágüdünnun.

39 Ába lélemuchun Jesúsu tuágun, ába ladeínjan lun abíruaü, ába lagídarun abíruaü tueí. Lídan méme óra ligía ába tásaarun, ába tagúmeserun eténira joun.

*Lareídaguagüdünnun Jesúsu sarágu sánditiña  
(Mt 8.16-17; Mr 1.32-34)*

<sup>40</sup> Sun ja añájeinbaña sánditiña jábiñe, dan le láfuachun wéyu ába janügüniña lun Jesúsu, ába líchuguni lújabu jawágu cáda ában jádaangiñe, ába lareídagun furúmieguarügü sándi le jawáguti.

<sup>41</sup> Sarágu jaña giñe ja gawágutiña espíritugu wuríbatíña, ába jagídarúniwa jaweí, ába buri jagúaragun ítara.

—Amürü le Liraübei Búngiu.

Ába ladeínjan Jesúsu joun espíritugu wuríbatíña, mígirun lumútiña lun jadímurejan, ladüga subúdi jamúti luágu ligía lan Crístubei.

### *Lapúrichijan Jesúsu Galiléa*

*(Mr 1.35-39)*

<sup>42</sup> Dan le larúgadunbei, ába láfuridun Jesúsu bougudín lueí ubúrugu lídoun ában fulásu mageírawati. Ába jáluajani gürígia, ába jachülürün le ñíjin lubeí, buséntiña yebe jeréderuni lueí lídin,

<sup>43</sup> ába laríñagun joun.

—Gásu giñe níchuguni ugánu le luáguti larúeijan Búngiu joun lílana líbiri fulásu, ladüga lun líra nouñajoúa.

<sup>44</sup> Ítara líña lídin apúrichijeina tídan buri jalígilisin juríu, Galiléa.

## 5

### *Esénijani le láubei miláguru*

*(Mt 4.18-22; Mr 1.16-20)*

<sup>1</sup> Luágu ában dan, ñíñein Jesúsu láru dúna le Genesarét, ábati jayábingua sarágu gürígia darí lun jámurudaguni, ladüga busén jamá jagáambuni lerérun Búngiu.

<sup>2</sup> Ába laríjin Jesúsu bián ugúnein málatu dúnarugu yaráfa lun láru béya, raríguaaña esénijatiña tídaangiñe, jachíbuñounti jasénin.

<sup>3</sup> Ábati ládinun Jesúsu tídoun ában tídaangiñe ugúnein tugúya to lugúneboun Simón, ába laríñagun lun lun ladísedun murúsun lueí láru béya. Ábati lañúurun Jesúsu tídan ugúnein, ába lagúmeserun arúfudaja joun gürígia ñígiñe.

<sup>4</sup> Dan le lásurunbei ladímurejan, ába laríñagun lun Simón.

—Jeíba méme anágün, ábame jágurun ñi.

<sup>5</sup> Laríñaga Simón lun.

—Maésturu, ñadímeinjadiwa sun áriebu, mañúguntiwa ni cáta, quei amürü lubeí aríñagubalin, wágura.

<sup>6</sup> Ába jágurun, dan le jiñúragunbárun séni, ñíñanu sarágu úduraü tídan darí yebe lun tajeíridagun.

<sup>7</sup> Ábati jadügün seíni joun jíbirigu ja tídaanbaña to ában ugúnein lun jayábin íderaguaña. Ába jayábin, ába jabuínchagüdünun biángubei ugúnein darí yebe lun tadíbiragun.

<sup>8</sup> Dan le laríjini Simón Pédro cátei le, ába lájuduragun ligíbugiñe Jesúsu, ába laríñagun lun.

—Ígira bána, Nabúreme, ladüga ában wügüri gafígounti nugúya.

<sup>9</sup> Laríñagubaaalin Simón líra ladüga laweíridun lanígi, jáu sun ja úarabaña lúma, luágu añúguni le jadügübei.

<sup>10</sup> Weíriti giñe janígi Jacóbo lúma Juan, ja lirájüñü Zebedéo, ja lúmabaña Simón. Ába laríñagun Jesúsu lun Simón.



—Manúfudebá, lúmagiñe guetó buwádigimarida adíaja gürígia nun.

<sup>11</sup> Lárigiñeti jätürün, ába jígiruni sun cátei, ába jóúdin lúma Jesúsu lun láni jamá disípulugu.

*Lareídaguagüdün Jesúsu ában gawáguti gumeínluágu sun lúra*

*(Mt 8.1-4; Mr 1.40-45)*

<sup>12</sup> Luágu ában dan, lídaañein ában fulásu Jesúsu, le ñí lubei ában wügüri gawáguti gumeín luágu sun lúra. Dan le larijinbalin wügüri ligía Jesúsu, ába lájuduragun dagá ligíbu múarugun, ába layúmragun lun ítara.

—Nabúreme, ánjabu busén, gayáraati bareídaguagüdünina.

<sup>13</sup> Ábati lagúruruni Jesúsu láu lújabu, ába laríñagun.

—Buséntina, areídaguabá.

Quei laríñagun ítara, ába lagídarun gumeín lueí wügüri ligía,

<sup>14</sup> ábati laríñagun Jesúsu lun lun mabájüdagun láani cátei le ni ca un. Laríñaga lun.

—Ñüdünrügübá, arúfudagua búngua lun fádiri, rubeíme edéweejani le uágubei laríñaga lilúrudun Moisés luágu barúmadun, aríja jamámugei gürígia luágu areídaguaadibu lan.

<sup>15</sup> Eíbu dan, eíbu labúruchaguntima luágu Jesúsu, sarágu jañátija gürígia oúndaragutiña lun jagáambuni lúma lun lareídaguagüdüni jasándi.

<sup>16</sup> Ábaja lídin Jesúsu le ñíjin lumúti úa jamá gürígia lun layúmragun lun Búngiu.

*Lareídaguagüdün Jesúsu ában fadáguaali*

*(Mt 9.1-8; Mr 2.1-12)*

17 Luágu ában wéyu, ñíñein Jesúsu arúfudaja, ñíñanuti fariséogu jáma arúfudajatiña lilúrudun Moisés, ñübintiña lídaangiñe lirájüñü buri fulásu le láni Galiléa, Judéa lúma Jerusalén. Nijánti lubáfu Búngiu arijúa luágu Jesúsu láu lareídaguagüdüniña sánditiña.

18 Ábati jayábin fiú wügüriña barüina ában wügüri fadáguaali tídan ában ubárari, jálugati jebélaagüdüni le ñíjin lubei Jesúsu lun laríjini.

19 Madáritiña jalágiñeba lan jebélura ladüga jíbe güri-gia, ábati jaweínrun tábulugun múna, ába jagídarun murúsun lueígiñe lougiñe le ñí lubei Jesúsu, ába jarárigüdüni sánditi tídan lubárari ligíbugiñoun.

20 Dan le laríjinbalin Jesúsu afíñeni le jawágubei, ába laríñagun lun sánditi ligía.

—Wügüri, ferúdunawaali bifígoun.

21 Ábati jaríñagun arúfudajatiña lilúrudun Moisés jáma fariséogu jóunguarügü.

—¿Cáteisán güri-gia le, le minébenejabubei lun Búngiu láu ligáburu ladímurejan? Úati ámu gayáraati ferúduna lan figóu lueídügüya Búngiu.

22 Subúdi lumúti Jesúsu ca lan jasáminabei, ába laríñagun joun.

—¿Ca uágu jasáminara ítara?

23 ¿Cátima méreengúnbei laríñawagun. “Ferúdunawaali bifígoun”, ódi “Sarába, beíbuga”?

24 Narúfudaaliti jun luágu gayára lan ferúduna nan figóu, áu le Wügüri Garaüwarügüti.

Ábati laríñagun lun le sándibei.

—Sarába, barüboun bubárari, beíba búbiñoun.

25 Lídán óra ligía, ába lásaarun sánditi ligía jagíbugiñe, ába labúdunun lubárari tó buga ídaanboun laróúnra, ába lídin lúbiñoun adímurejeina luágu luweírigun Búngiu.

26 Ába laweíridun janígi súngubei, ába jadímurejan luágu luweírigun Búngiu, ába jaríñagun láu luweírin janígi.

—Arijaadiwa cátei weíriguti ugúñe.

*Lagúarun Jesúsu lun Leví lun lánime disípulu  
(Mt 9.9-13; Mr 2.13-17)*

27 Lárigiñe cátei le, ába láfuridun Jesúsu lídaangiñe fulásu ligía, ába laríjin ában agúburajati liseínsuna gumádi, gíriti Leví, ñun líña lídan fulásu le ñí lubei lagúburaja, ába laríñagun Jesúsu lun.

—Falábana, queímoun núma queísi náni disípulu.

28 Ába lásaarun Leví, ába lígiruni sun cátei lánina binádu libágari, ába lídin lúma Jesúsu queísi láni disípulu lúmagiñe óra ligía.

29 Lárigiñe, ába ladügün Leví ában oúnwenbun fédu lun Jesúsu, lúbiñe, ñíñanuti sarágu agúburajatiña liseínsuna gumádi jámaya ámu gürígia ñun luágu dábula jáma.

30 Ába jagúmeserun fariséogu jáma arúfudajatiña lilúrudun Moisés adímureja luágu Jesúsu jáma láni disípulugu, ába jaríñagun joun.

—¿Cásan uágu jeíginbei jáma agúburajatiña liseínsuna gumádi lúma jáma ámu gafígountiña?

31 Laríñaga Jesúsu joun.

—Ja magádiebaña, memégeirúntiña surúsia, aná ja sándibaña.

32 Mára niábiña áluaja magádietiña ligíbugiñe Búngiu, niábiña áluaja gafígountiña lun lasáansirún jóuserun.

*Jálügüdüni Jesúsu luágu ayúnaruni  
(Mt 9.14-17; Mr 2.18-22)*

33 Ábati jariñagun lun Jesúsu.

—¿Ída liñásan ayúnara jabeí lánigu Juan jáma fariséogu, ayúmuragua jagía sarágu lun Búngiu, ánjaña báni disípulugu, jóútiña, gurá jagía súnwandan?

34 Ába lariñagun Jesúsu joun.

—¿Gayáraati funági jayúnaragüdüniña gürígia ja jamísurajan lídoun ában maríei sun niján lan adári jáma ñi?

35 Lachülürüba dan lun lídin adári, ligíameti jayúnarun.

36 Rúti giñe Jesúsu ában jémpulu joun luágu iséri larúfudajan lúma binádu, lariñaga.

—Úati íbuguti murúsun gamísa tueígiñe ában anáanguni isérigiru lun láfadajan ában anáanguni ñulújaru, ánjein ladüga ítara, lagádeiruboun to isérigiruboun, áni merédebei giñe murúsun gamísa iséri ligía buídu tuágu anáanguni ñulújaru tugúya.

37 Michugúntu giñe diweín iséri lídoun guéru ñulújali, ánjein adügüwa ítara, tajeíridagubei diweín iséri guéru ñulújali, féridiméti diweín, féridi guéru.

38 Ligía lúnti lubeí tíchugún diweín iséri lídoun guéru iséri, ítara lúba lesériwidun guéru, seríwi diweín.

39 Úati giñe átuti diweín to binádu lun labúseerunun to iséri lárigiñe, lariñaguba. “Búitimaatu to binádu.”

## 6

*Jabúdajan disípulugu türígu lídan wéyu le eméraaguagülei*

*(Mt 12.1-8; Mr 2.23-28)*

<sup>1</sup> Luágu ában wéyu le eméraaguagülei, eíbugeina líña Jesúsu labádinagua nádü jáma láni disípulugu, átüjeina jagíati disípulugu lin türígu, ába jéferejani láu jájabu, ába jeígini líla.

<sup>2</sup> Ábati jaríñagun jádaangiñe fariséogu joun.

—¿Cásan uágu jadüga wadágimanu le mouñ lututi ladügün lídan wéyu le eméraaguagülei?

<sup>3</sup> Laríñaga Jesúsu joun.

—¿Malíjangidün luágu le ladügübei Davíd luágu ában dan, dan le lálámachunbei jáu sun ja úarabaña lúma?

<sup>4</sup> Ába lebélorun tídoun lúban Búngiu, ába lanügün tídaangiñe fein to sagraúboun, jou ligía tídaangiñe, ru ligía joun ja úarabaña lúma, láu sun fádirigu rügüñanu lán yebe lúnbaña jeígin tídaangiñe fein tugúya, según lilúrudun Moisés, áni máma figóu le ladügübei Davíd ligíbugiñe Búngiu.

<sup>5</sup> Aríñagati gíñe joun.

—Gabáfutina, áu le Wügüri Garaúwarügüti, lun naríñagun cába lan gayára ladügüniwa wéyu le eméraaguagülei.

*Wügüri le jiláalibei újabu*

*(Mt 12.9-14; Mr 3.1-6)*

<sup>6</sup> Lídaanya ában wéyu le eméraaguagülei, ába lebélorun Jesúsu tídoun jalígílin juríu, ába lagúmeserun arúfudaja. Níñein ában wügüri jiláli lújabu le loúnwenren,

7 añájeti arúfudajatiña lilúrudun Moisés jáma fariséogu aríaa jei Jesúsu ánjein lagáranijaba lubei lun lídan wéyu le eméraaguagülei, lun jadárirun lidúnrun.

8 Subúdi lumúti ca lan jarítagubei, ába laríñagun lun wügüri le jiláalibei újabu.

—Sarába, ráramabá wagíbugiñe.

Ába lásaarun, ába laráramun ñi.

9 Ábati laríñagun Jesúsu joun jíbiri.

—Nálügüdaadün ában cátei. ¿Ca cátei gayáraabei ladügün lídan wéyu le eméraaguagülei, buídu ódi wuríbani, lasálbarun ibágari ódi lagídarún?

10 Ábati laríaguniña Jesúsu sun ja geyégubaña láu, ába laríñagun lun wügüri ligía.

—Tulébei bújabu.

Ába látuleruni, ába lareídagun.

11 Ja jíbiri, ába jagáñidun sarágu, ába jagúmeserun álügüdagua jámagua ída lúba lan gayára lan jagúmuchun láu Jesúsu.

*Lanúadajaniña Jesúsu dúusu apóstolugu  
(Mt 10.1-4; Mr 3.13-19)*

12 Lídoun dan ligía, ába lídin Jesúsu luágun ában wübü ayúmuragua lun Búngiu.

13 Dan le larúgadunbei, ába lagúarun joun láni disípulugu, ába lanúadajan dúusu jádaangiñe, ja únbaña lagúara apóstolugu.

14 Niján jíribei. Simón, le méme líchubei Pédro, Andrés, le lamúlen Simón, Jacóbo lúma Juan, Felípe lúma Bartolomé,

15 Matéo lúma Tomás, Jacóbo, le liraü Alféo, Simón, le áfaaguti lun jawáanserun juríu,

16 Júdas, le lamúlen Jacóbo, lúma Júdas Iscarióte, le alúgurubalin Jesúsu.

*Larúfudajan Jesúsu joun sarágu gürígia  
(Mt 4.23-25)*

17 Ába larárirun Jesúsu jáu lueígiñe wübü, ába leréderagun jáu láni disípulugu lídan ában fulásu le ñí lumuti sagádi wásati, ñíñanu gíñe sarágu gürígia ñübintiña louúbawagugiñe Judéa, Jerusalén, lúma lárurugugiñe Tíro lúma Sidón. Sun gürígia ja, jayábiña lun jagáambuni lapúrichijan Jesúsu lúma lun lareídaguagüdüni jasáandi.

18 Já buri asúfurirubaña jáu espíritugu wuríbatíña, areídaguátiña gíñe.

19 Álugatiña sun gürígia jagúrurun luágu Jesúsu, ladüga areídaguagüda lumútiña súngubei láu lubáfu.

*Fuleíseiwatiña jáma fugiábugu  
(Mt 5.1-12)*

20 Ábati laríjin Jesúsu jawágun láni disípulugu, ába laríñagun joun.

—Fuleíseiwatün, jugúya le mégeibei, ladüga ménreengúnbei jun lun jebélurun lídoun larúeijan Búngiu.

21 ‘Fuleíseiwatün, jugúya le áfaagubei ilámaü guetó, ladüga jaquímuleduba.

‘Fuleíseiwatün, jugúya le ayájubei guetó, jéjerajaba lárigiñe.

22 ‘Fuleíseiwatün dan le iyéreegu jumá joun gürígia nueígiñe, dan le jabúgagunün jawáriua, dan le janábagunün, dan le janügüni jíri queí ni cáta, quei cátei wuríbati, nueígiñe, áu le Wügüri Garaüwarügüti.

23 Gúnda jumá sarágu, buin jumá láu ugúndani lídan wéyu ligía, ladüga jibíjuba ában oúnwunbun afáyeiruaajaü siélu, ítara méme líña meja jadüga binádu jagübürigu gürígia ja joun profétagu.

24 ‘Fugiábugu jugúya, jugúya le rísibei, ladüga ibíja jumáli sun ugúndani le lúnbei jibíjini.

25 ‘Fugiábugu jugúya, jugúya le químulebei, ladüga jalámachuba.

‘Fugiábugu jugúya le éjerajabei guetó, ladüga jayájuajaba láu íruni.

26 ‘Fugiábugu jugúya dan le sun jamá gürígia adímureja buíti juágu, ítara líña meja jadímurejan binádu jagübürigu buíti jawágu profétagu yéetiña.

*Jínsiñe jamá jáganiñu jun*

*(Mt 5.38-48, 7.12)*

27 ‘Niján nerérun jun, Jugúya le agáambubalina. Jínsiñe jamá jáganiñu jun, adüga jumá buíti joun ja iyéreejabúbaña jun,

28 biní jumaña ja íñaragutün, ayúmuragua jumá jawágu ja anábagutün.

29 Ánjabu láfara ában gürígia luágu ában loúba bigíbu, rúbei gíñe le ában loúba lun, le anügütu babíte bueí, rúboun gíñe bisímisin lun.

30 Furúmieguarügü le amúriajati búma, rúba lun, le anügüti bumégen, máluajabei lúma.

31 Le cátei le babúseerubei ladügün bun, ligialá badüga joun ámu.

32 ‘Ánjein já rügüñanu lubeí jínsiñejabúbaña jun jínsiñe jun, ¿ca buíti jadügübei láu líra? Ásta gafígountiña, ítara líña jadüga.



33 O ánjaün lan adüga buíti jounrügü ja adügübaña buíti jun, ¿ca buíti jadügübei láu líra? Ítara líña gíñe jadügün gafigountiña.

34 Ánjaün afúredeija jounrügü ja úmagiñebaña jarítagua jibíjin som cátei, ¿ca buíti jadügübei láu líra? Afúredeijatiña gíñe ja wuríbabaña joun wuríbatiña jáledi, agúrabañu jagía gíñe jabíjin som cátei jámagiñe.

35 Ánjein jugúya, lúnti jínsiñe jamá jáganiñu jun, adüga jugúyame buíti, afúredeija jugúyame, magúrabajaanga ni cáta lewéñegua. Ítara lúba weiri lan jafáyeiruaja lúmagiñe Búngiu le íñugubei, áni lirájüñübadün gíñe le tímatisaati, ladüga ligía, fuleíseijabúti gíñe joun ja meteíngiradibaña lúma joun ja wuríbabaña.

36 Gudémejabu jumá, quei gudémejabu lan júguchi Búngiu.

*Madímureja jumá wuríba jawágu ámu  
(Mt 7.1-5)*

37 ‘Madímureja jumá wuríba jawágu ámu, ábame gíñe maríñagun lan Búngiu luágu wuríba lan jigáburi. Míchiga jumá jadúnrun ámu, míchun lámuga gíñe Búngiu jidúnrun. Ferúduna jumá, ferúduna lámugaün gíñe Búngiu.

38 Rújuma joun ámu, ru lámuga gíñe Búngiu jun. Líchuguba Búngiu sarágu jun, ladügüba jun queígubeirügü jadüga joun ámu.

39 Rúlumuti Jesúsu jémpulu le joun.

—¿Gayáraati funági ladúndejan ában maríjinti ában maríjinti líledi? ¿Ma jeíguaduba biángubei lídoun ában meme júyu?

40 Úati ni ában disípulu weíriguti lueí lumáesturun, íbini ánjein lagúmucha latúriajan, chülürügübei quei lumáesturun.

41 ¿Ída líña gayára bubálin liraúraü ífei le lídaanbei lágu bíbugaña aríja, áni masándi bumúti durúsu le lídaanbei bágu?

42 ¿Ída líña gayára lubeí baríñagun lun bíbugaña. “Sagánei liraúraü ífei le bágurugubei”, áni masándi bumúti durúsu le bágurugubei? ¡Bíanguañein bigíbul! Sagábei durúsu le bágurugubei furúmiñe, gayára lámuga baríjini liraúraü ífei le lágurugubei bíbugaña buídu lun baságaruni.

*Luágu lin tídibu wéwe tasúbudirúa  
(Mt 7.17-20, 12.34-35)*

43 ‘Úati tídibu wéwe buíti lun wuríba lan lin, úati gíñe tídibu wéwe wuríbati lun buídu lan lin.

44 Sun tídibu wéwe subúdiwati luágu lin, mátüjountu ígo lueígiñe jíyu, ni beíbei lueígiñe guríbiyuwa.

45 Gürígia le buídubei, cátei buíti laríñagubei ladüga cátei lan buíti tídaanbei lanígi, gürígia le wuríbati, cátei wuríbati laríñagubei ladüga cátei lan wuríbati tídaanbei lanígi. Luágu le laríñagubei gürígia lasúbudirúa ca lan tídaanbei lanígi.

*Bián ébuu  
(Mt 7.24-27)*

46 ‘¿Ca uágu jaríñaga luágu áu lan Jabúremebei áni madügün jumúti le nubeíbei?

47 Naríñagaali jun ída líña lan le ñübinbei nun áni adügaleí le nubeíbei.

48 Ítara líña quei ában wügüri le ábunagubei ában múna, achíajati julíli furúmiñe, ába lábununi wagábu

labádinagua dübü derébuguti. Dan le liñúrunbei dúna, ába liábin fulúdu láu érei tuágun múna tugúya, siñá lumutu ánjingicha ladüga luáguñoun lan ébuu derébuguti.

<sup>49</sup> Ánjeinti le agáambubalina áni madügün lumúti le nubeíbei, ítara líña quei ában wügüri le ábunagubei lúban ligíbuagu ságoun, mawágaburiga, dánti le liñúrunbei dúna, ába liábin fulúdu láu érei tuágun, ába teíguadun, ába tagünrinchagun le gumúti.

## 7

*Lareídaguagüdüni Jesúsu lumúsun ában gumándan Rómána*  
(Mt 8.5-13)

<sup>1</sup> Dan le lásurunbei ladímurejan Jesúsu joun güriía, ába lídin Capernaúm.

<sup>2</sup> Níñein ában gumándan Rómána ñi, láu ában lumúsun jínsiñeti lun sarágu, sándiñein músu ligía, yaráfa lun louñwen.

<sup>3</sup> Dan le lagáambunbei gumándan ligía luágu Jesúsu, ába louñajan fiú jádaangiñe wügüriña weirigutiña lídan jafiñen juríu lun jayúmuragun lun Jesúsu lun lídin areídaguagüdei lumúsun.

<sup>4</sup> Ába jóudin lúmoun Jesúsu, ába jagúmeserun ayúmuragua lun táu sun janígi, jaríñaga lun.

—Buíti lun bíderaguni gumándan le,

<sup>5</sup> ladüga jínsiñetiwa wagía juríu lun, ligía guánarügü ábunaguagüdübarun walígilisin.

<sup>6</sup> Ábati lídin Jesúsu jáma, dan le yaráfaaña tun lúban gumándan ligía, ába louñajan gumándan jádaangiñe lumádagu aríñaga lun Jesúsu.

—Nabúreme, ítara líña gumándan lun manügün ban bubéresegun ñüdün lúbiñe, luágu nege madüna lan lun bebélurun lúbiñoun,

<sup>7</sup> ligía nege mídin lubeí lúngua álugabu. Rúrügübeí dimúrei, ábame lareídagun lumúsun.

<sup>8</sup> Ladüga ligía nege gíñe lábugiñeñein gumádi íñutimaati, áni añájein gíñe súdaara lábugiñe lagúmadijan. Dan lé nege laríñagun lun ában jádaangiñe lun lídin, ñüdünti, dan le laríñagun lun le ában lun liábin, ñübinti, áni dan le loúnajani lumúsun adüga som cátei, adüga lumúti. Ítara lúba nege, luágu berérun mósu lídin sándi lueí lumúsun.

<sup>9</sup> Dan le lagáambunbalin Jesúsu cátei le, weíriti lanígi láu wügüri ligía, ába laríjin jawágun güri-gia ja afálarubalin, aba laríñagun joun.

—Ninárün jáu, ni íbini jádan Israelítagu madárigidina afíñeni weíriti quei lafíñen wügüri le.

<sup>10</sup> Dánti le jachülürünbei wügüriña ja ñüdünbaña álu-gei Jesúsu jári-goún lúbiñoun gumándan, areídaguaali lumúsun.

*Lágyuyuguágüdüni Jesúsu tiraü ában jiláali túmari*

<sup>11</sup> Lárigiñe cátei le, lídiña Jesúsu lídoun ában ubúru-gu gíriti Naín, úareina jáña láni disípulugu lúma, jáma sarágu güri-gia.

<sup>12</sup> Dan le lachülürünbei yaráfa lun lubéneri ubúru-gu ligía, ába laríjin jóúdin ábunaja ában jiláali le ligíarügüti tiraü lúguchu to jiláali túmari. Sarágu jáña lílana fulásu ñüdün ábunaja túma.

<sup>13</sup> Dan le laríjinbarun Wabúreme Jesúsu, ába tagúdemedagun lun, ába laríñagun tun.

—Mayájuabá.

14 Ába layárafadun, ába lagúrurunun gánjoun, ába jaráramagun ja anügübaña. Ába laríñagun lun jiláali.  
—Irájü, ¡naríñaguña bun lun básaarun!

15 Ábati lásaarun lé buga jiláalibeí, ába lagúmeserun adímureja. Ába ledéregeruni Jesúsu tun lúguchu.

16 Dan le jaríjinbalin gürígia cátei le, ába laweíridun janígi, ába jagúmeserun adímureja buíti luágu Búngiu, jaríñaga.

—Chülúgua ában proféta weíriguti wádoun.

Aríñagatiña gíñe.

—Ñübinja Búngiu íderaguawa, wagía le lumútuniña.

17 Ába lagaambúniwa cátei le ladügübei Jesúsu lídan sun Judéa lúma geyégua láu.

*Loúnagülegu Juan le abásteragüdjabei  
(Mt 11.2-19)*

18 Agáambati Juan luágu sun cátei le, abájüdagua jamúti lánigu lun. Ábati lagúarun joun biáma jádaangiñe,

19 ába loúnajaniña álügüdei Wabúreme Jesúsu ánjein ligía lubeí Crístubei le lúnbei liábin, o ánjein jagúrabajaba lubeí ámu.

20 Dan le jachülürünbei le ní lubei Jesúsu, ába jayárafadun, ába jaríñagun lun.

—Loúnajañadiwa Juan le abásteragüdjabei álügüdabu ánjein amürü lubeí Crístubei le lúnbei liábin, o ánjein lun lubeí wagúrabun ámu.

21 Lídan méme óra ligía, areídaguagüdati Jesúsu sarágu gürígia lídaangiñe jasánda lúma jasúfurirun, lúma jádaangiñe espíritugu wuríbatíña, aríjagüda ligía gíñe sarágu maríjintiña.

22 Ába lubeíti laríñagun joun.

—Jeíba, jaríñageime le jaríjubei lúma le jagáambubei lun Juan. Jabájüdaguáme lun luágu jaríjin maríjintiña, jeíbugun meíbuguntiña, jareídagun láutiña gumeín luágu jára, jagáambun magáambaditiña, jáguyugun jiláaña, lúma luágu líchugún ugánu luáguti asálbaruni joun gudémetiña.

23 Gúndaati gíñe gürígia le meféridirun lumúti lafíñen nuágu.

24 Lárigiñe jóudin já buga loúnajabaña Juan, ába lagúmeserun Jesúsu adímureja luágu Juan joun gürígia, laríñaga.

—¿Cásan jídinbei aríja lídan fulásu mageírawati? ¿Ában mabúru le lánjinjan garábali?

25 Ánjein máma lubeí ítara líña, ¿cáti jídinbei aríja? ¿Ában wügüri táu anáanguni wéndegutu? Máma ligía, subúdi jumúti luágu ja lan wéndegubaña adáüragun, agánawa jagía buídu, tídaañanu jában urúeigu.

26 Lídan linárün cátei, ¿ca jídinbei aríja? ¿Ába proféta? Ánja, inárüni, áni ában weíriguti sügü láu proféta.

27 Juan, ligía oúnagülei le uágubei taríñaga Lerérun Búngiu.

Nóunajañein nóunagüle bubáragiñe lun laráansejani üma bubá.

28 Quei naríñaguni jun, jádan sun gürígia, úagili proféta weíriguti lueí Juan, áni láu sun líra, weíriguti le ünabutimaabei lídan larúeijan Búngiu sügü láu le anügarügübalin ugánu luágu arúeijani ligía.

29 Dan le jagáambunbalin sun gürígia, ásta ja agúburajabaña liseínsuna gumádi, cátei le, ába

jaríñagun luágu richá lan Búngiu láu laríñagun liyúmulumugugiñe Juan luágu lúnti lan jasáansiraguni jagáburi. Gürígia jagía, resíbi jamáli meja labásteragüdajan Juan,

<sup>30</sup> ánjañati jíbe-ágei fariséogu jáma arúfudajatiña lilúrudun Moisés, májatiña meja lun jadügüni le lubeíbei Juan, merésibirun jamúti lé yebe labúseerubei Búngiu ladügün luágu jafúleisein.

<sup>31</sup> Ába laríñagun Jesúsu.

—¿Ída liñásan jagáburi gürígia lánina dan le? ¿Cásan lenégebei?

<sup>32</sup> Ítara jáña quei irájüñü ja añúurubaña mágidirugu ájurera, ába jagúaragun joun jíbegu. “Íñaajatiwa fídu jun, mabínajantün, erémujatiwa urému jíruti jun, mayájuntün.”

<sup>33</sup> Ladüga ñübinti Juan le abásteragüdajabei, lé meja meiginbei fein, mátun ligía diweín, aríñagatün luágu gawágu lan espíritu wuríbati.

<sup>34</sup> Lárigiñe, ába niábin, áu le Wügüri Garaüwarügüti, jóútina áni gurá áu. Jaríñaga luágu geígadina, gátadi, jamáda áu nege gafígountiña jáma agúburajatiña liseínsuna gumádi.

<sup>35</sup> Wel, ja chúbaña áu, subúdi jamúti luágu buídu lan le ladügübei Búngiu láu lichú láu.

### *Jesúsu lúbiñe Simón le fariséo*

<sup>36</sup> Ába lamísurajani ában jádaangiñe fariséogu Jesúsu lun lídin eíga lúbiñe, ába lídin Jesúsu lúbiñe fariséo ligía, ába lañúurun eíga luágu lidábulan.

<sup>37</sup> Ñíñounti ában würi wuríbati témeri lídan ubúругu ligía, dan le tagáambunbei luágu lídin

Jesúsu eíga lúbiñe fariséo ligía, ába tídin láu ában lágei ibíñei jémeti.

<sup>38</sup> Ába taráramun lanágangiñe Jesúsu, lubádu lugúdi, ába tadüdüragüdüni lugúdi láu táguira. Nuján ayájuaja, nuján arágajei láu tídburi, nuján achújei lugúdi, ába téseruni ibíñei luágun.

<sup>39</sup> Dan le laríjinbalin fariséo le amísurajabalin Jesúsu cátei le, laríñaga lúnguarügü. “Lun jamúga inárüni lan luágu proféta lan wügüri le, lasúbudiruñein jamúga ca lan to agúruruboun luágu lúma ca lan tuwúyeri gürígia tugúya, luágu wuríba lan témeri.”

<sup>40</sup> Ábati laríñagun Jesúsu lun fariséo ligía.

—Simón, níjein ában cátei lun naríñaguni bun.

Laríñaga fariséo.

—Aríñagabeí nun, maésturu.

<sup>41</sup> Laríñaga Jesúsu lun.

—Níñanu bián wügüriña dúweitiña seínsu lun ában afúredeijati. Ában jádaangiñe, dúweiti seíngü-san denáriu, le ában, dimí-san.

<sup>42</sup> Queíti siñá lubei jafáyeiruni, ába ferúduna láani afúredeijati ligía jadúweijan biángubei. Aríñagabeíti nun. ¿cábagi jádaangiñe jínsiñejabutima lun afúredeijati ligía?

<sup>43</sup> Laríñaga Simón lun.

—Lídan narítangun, le gíbetimaabei adúweijan.

Laríñaga Jesúsu lun.

—Richátibu.

<sup>44</sup> Ába laríjin Jesúsu tuágun würi tugúya, ába laríñagun lun Simón.

—¿Aríagu bíña tun würi to? Belútina búbiñoun, míchutibu dúna nun lun nachíbuni nugúdi, ánjounti



würi to, ágawagüda tumúti nugúdi láu táguira, ába tamábeidagüdüni láu tídiburi.

<sup>45</sup> Machú bumútina, ánjoun tugúya, lúmagiñe nebélorun, merédegili tachújani nugúdi.

<sup>46</sup> Míchutibu aáli nábulugu, ánjoun tugúya, túguatu ibíñei jémeti luágu nugúdi.

<sup>47</sup> Ligía nariñagunbei bun luágu arúfuda láani luweírin tínsiñejabu luágu ferúdunawa lan líbe tífigoun, ánjeinti gürígia le míbeti ferúdunawa lan, míbeti ínsiñeni larúfudun.

<sup>48</sup> Ábati lariñagun Jesúsu tun würi tugúya.

—Ferúdunawaali bifígoun.

<sup>49</sup> Ábati jagúmeserun amísurajoútiña ja ñúnbaña lúma ñi aríñaga jámagua.

—¿Cáteisán wügüri le, ferúduna lubeí gíñe figoú?

<sup>50</sup> Ába lariñagun Jesúsu tun würi tugúya.

—Sálbawádibu lídaangiñe bifígoun ladüga bafíñerun nuágu, beíba darángilañu.

## 8

### *Würíña já buri meja íderaguti Jesúsu*

<sup>1</sup> Lárigiñe cátei le, ñüdünti Jesúsu lídoun sarágu ubúrugú lúma buri lirájüñü fulásu íchigei ugánu buíti luágu larúeijan Búngiu.

<sup>2</sup> Ñüdütiña dúusu apóstolugu lúma jáma würiña ja lareídaguagüdübaña jádaangiñe espíritugu wuríbatíña lúma sándi. Níñoun María to gíríoun Magdaléna jádan, to ídaangiñeboun jáfurida sédü espíritugu wuríbatíña,

<sup>3</sup> ñíñoun gíñe Juána, to lúmari Chúza, le oúnigirubarun lúban Heródes, ñíñoun Susána, jámaya sarágu ámu ja íderagubálin láu le jámati.

*Jémpulu luáguti ábunaguti*  
(Mt 13.1-9; Mr 4.1-9)

<sup>4</sup> Sarágu jáña güriá nñübinburitiña lídaangiñe sarágu fulásu lun jaríjini Jesúsu, dánti le oúndaraguaaña, ába ladímurejan Jesúsu joun láu jémpulu. Laríñaga joun.

<sup>5</sup> —Furíti ában ábunaguti ábunagua líla nádü, dan le afúrujeina láani, ába láburujan lídaangiñe luágun üma, ába jadügüraguni ásügürütiña, ába jeígini dunúru.

<sup>6</sup> Líbiri, ába láburujan labádinaguouún dübü, dánti le labouúchun, ába lásaurün ladüga lumábei fulásu.

<sup>7</sup> Ába láburujan líbiri labádinaguouún jíyu, ába láfaruni jíyu le ájüchübei úara lúma.

<sup>8</sup> Ñíñein gíñe lídaangiñe, áburujati lídoun múa buíti, dan le laweínamudun, gin ligía, buíti lalúbajoún, cáda ílaü rúti san águu.

Lárigiñe laríñaguni Jesúsu cátei le, ába laríñagun joun láu umálali jéreti.

—Jugúya le garígeirugubei lun jagáambun, agáamba jumána.

*Le lébubei ladímurejan Jesúsu láu jémpulu*  
(Mt 13.10-17; Mr 4.10-12)

<sup>9</sup> Ábati jálügüdüni láni disípulugu ca lan lílabei jémpulu le.

<sup>10</sup> Laríñaga joun.

—Jugúya, subúdigüda láali Búngiu cátei arámudaguati le luágutibei larúeijan jun, ánjaña ja mebéresenbaña láu lerérun, láu jémpulu laríñawagúa cátei luáguti larúeijan joun lun ibídiñebei lan líla cátei le jaríjibei joun, lun gíñe úa lan gunfaráanda jamáni cátei le jagáambubei.

*Lafúnraanguagüdüini Jesúsu jémpulu luáguti ábunaguti*

*(Mt 13.18-23; Mr 4.13-20)*

<sup>11</sup> Ába lariñagun Jesúsu joun.

—Niján líla jémpulu ligía. Líla nádü, ligía lerérun Búngiu,

<sup>12</sup> üma le ñíjin lubeí láburuja lídaangiñe líla nádü, jagía gürígia ja agáambubalin lerérun Búngiu, ába liábin Máfia, ába lagídaruni tídaangiñe janígi lun mafiñerun jamá, masálbarun jagíame.

<sup>13</sup> Dübü le ñíjin lubeí láburuja líbiri líla nádü, jagía gürígia ja agáambubalin lerérun Búngiu, ába jerésibiruni láu ugúndani, áni márügüdünti jádan buídu, afiñetiña luágu murúsun dan, áni dan le jóuchawagún, mawándun jamúti, ába jeféridiruni jafiñen luágu Búngiu.

<sup>14</sup> Jíyu le ñíjin lubeí láburuja líbiri líla nádü, jagía gürígia ja agáambubalin lerérun Búngiu, ába jasígiruni binádu jagáburi, ába jasígirun arítagua luágu irísini lúma ugúndani le lánina ubou le, úati fulásu jarítaturugun lun lerérun Búngiu, siñátiti laságarún cátei buíti jádaangiñe.

<sup>15</sup> Ánjeinti múa buíti le ñíjin lubeí láburuja líbiri líla nádü, jagía gürígia ja agáambubalin lerérun Búngiu táu anígi buítu, adüga jagía gásu láu lerérun, eíbuga jagía quei lubúdubu, sagáwati cátei buíti jádaangiñe.

*Jémpulu luáguti lámpu*

*(Mr 4.21-25)*

<sup>16</sup> Ába lariñagun Jesúsu.

—Úati gürígia ébeduti lámpu, ába ladáuragun láu láu som cátei o líchuguni lan tábugiñe gabána, íñu

líchigei lun larúgoungadágüdün múnada, lun gayára lan jaríjin ja ebélurubaña jabárua.

17 Úati lubeíti ni cáta arámudaguati lun mafúnraangudun lan, úa ni cáta le ibídiñewati lun machülürün lan dan lun lasúbudirúniwa lúma lun lafúnraangudun.

18 ‘Gagáambadi jumá lubeíti buídu lun lerérun Búngiu, le gámati lerérun Búngiu tídan lanígi, libíjuba lánwoun le lúmabei, ánjeinti le úabei ni cáta lídaangiñe lerérun Búngiu tídan lanígi, íbini le uágubei larítagua luágu níjein lan lúma, lagídarúaba lueí.

*Lúguchu Jesúsu jáma lamúlenu*  
(Mt 12.46-50; Mr 3.31-35)

19 Ábati tachülürün lúguchu Jesúsu jáma lamúlenu le ñíjin lubeí Jesúsu, siñáti jayárafadun lun ladüga jíbe gürígia.

20 Ába laríñawagún lun.

—Nujántia búnguchu jáma bamúlenu boúgudi áni buséntiña jaríjinibu.

21 Ába laríñagun joun.

—Ja agáambubalin lerérun Búngiu, úara jagía lúma, jagía nóguchubaña jáma namúlenu.

*Lagálumaduni Jesúsu lérouga*  
(Mt 8.23-27; Mr 4.35-41)

22 Luágu ában wéyu, ába ládinun Jesúsu tídoun ában ugúnein jáu láni disípulugu, ába laríñagun joun.

—Queímoun loubáfurugun lagúnu.

Ába jóúdin.

23 Dan le añája lan ánjiñuragua, ába larúmugun Jesúsu. Ába láfurun ában garábali jéreti jáu,

lagúnurugu, ába lagúmeserun dúna ebéluja tídoun jagúne yaráfa lun jadíbiragun.

<sup>24</sup> Ábati jóúdin agágudajei Jesúsu, ába jaríñagun lun.

—¡Maésturu! ¡Maésturu! ¡Wadíbiragua!

Ábati lásaarun Jesúsu, ába ladeínjan lun garábali lúma lugúdi barána, ába lagálumougadun, ába darángila lan sun cátei.

<sup>25</sup> Ábati laríñagun joun disípulugu.

—¿Ca susérebei lun jafíñen?

Ába jálügüdagun jámagua láu anúfudei lúma luweírin anígi, jaríñaga.

—¿Cátei funásan wügüri le, gumádi lubáli garábali lúma lugúdi barána áni agáamba jameí?

*Wügüri Gadárana le gawágubei espíritugu wuríbatíña*

*(Mt 8.28-34; Mr 5.1-20)*

<sup>26</sup> Ába jachülürün louúbawagun Gadára, le loubáfurugubei lagúnu, ligíbugiñe Galiléa.

<sup>27</sup> Dan le larárirunbei Jesúsu, ába liábin ában wügüri lílana fulásu ligía lubádun. Lújali wügüri ligía gawágu espíritugu wuríbatíña. Madáüti anánguni, maganoún ligía tídan múna, lídan buri jabára jiláaña le achigíti luágu dübü lagánawa.

<sup>28</sup> Dan le laríjinbalin wügüri ligía Jesúsu, ába lájuduragun ligíbugiñe, ába lagúaragun.

—¿Ca uágu bemétera númoun, Jesúsu Liraü Búngiu le Íñugutimaabei? Ayúmuraguatina bun lun masúfuriragüdün bánina.

<sup>29</sup> Laríñagunbei ítara ladüga lagúmadiruñein lan Jesúsu espíritu ligía lun láfuridun lídaangiñe.

Saráguya weíyaasu lárügüdüni espíritu wuríbati ligía, ábaja jagüraguni gürígia lújabu lúma lugúdi láu güríngüri lun ledéraguagüdüni, ábaja látumuraguni, ába lanúragüdüni espíritu lídoun fulásu le mageírawati.

<sup>30</sup> Ába laríñagun Jesúsu lun.

—¿Ca bíri?

Ába laríñagun.

—Lejión níribei.

Laríñagunbei luágu ligía lan líribei ladüga gíbeeña espíritugu wuríbatiña ja ebélurubaña lídoun.

<sup>31</sup> Ába jamúriajan espíritugu jagía lúma Jesúsu lun mouñajan láníña máfiougatin.

<sup>32</sup> Queíti ñíñanu jamá sarágu büüruju eíga luágu ában wübü yaráfa, ába jayúmuragun espíritugu jagía lun lun loúnajaniña jádoun büüruju jagía, ába lánjarun Jesúsu.

<sup>33</sup> Ábati jáfuridun espíritugu wuríbatiña jagía lueí wügüri ligía, ába jebélurun jádoun büüruju, ábati jáguragun büüruju jagía jóungua lueígiñe ában gudúngu, ába jáburujan lídoun lagúnu, ába jañáradagun.

<sup>34</sup> Dan le jaríjinbalin ja oúnigirubaliña büüruju cátei le asúseredubei, ába janúfudedagun, ába jeíbaagun abájüdaguei ubúruugu lúma áraabu.

<sup>35</sup> Ábati jóúdingua gürígia aríjei cátei le asúseredubei. Dan le jachülürünbei le ñí lubei Jesúsu, ába jadáriruni wügüri le ídaangiñebei jáfurida espíritugu wuríbatiña ñun lubádu lugúdi Jesúsu, táu lanáangun, areídaguaali, ába janúfudedagun.

36 Játi buga aríjubalin, ába jabájüdaguni luáguti lareídagun wügüri lé buga gawágubei espíritugu wuríbatíña joun,

37 ába jayúmuragun lílana fulásu ligía lun Jesúsu lun lídin ñígiñe, ladüga janúfude. Ábati ládinun Jesúsu tídoun ugúnein lun lídin,

38 ába layúmuragun wügüri le ídaangiñebei jáfurida espíritugu lun lun lídin lúma, ába laríñagun Jesúsu lun lun leréderun, laríñaga lun.

39 –Giríbubá búbiñoun, ábame babájüdaguni sun le ladügübei Búngiu bun.

Ába lídin, ába labájüdaguni le ladügübei Jesúsu lun lídan sun fulásu ligía.

*Liraü Jáiro túma würi to agúrurubarun lanáangun Jesúsu*

*(Mt 9.18-26; Mr 5.21-43)*

40 Dan le lagíribudunbei Jesúsu loubáfurugun lagúnu, ába jerésibiruni gürígia láu ugúndani ladüga sun jagía agúrabañu jáñein.

41 Ábati liábin ában wügüri gíríti Jáiro, le ábanbei jádaangiñe tábutigu jalígílisin juríu, ába lájuduragun lubádu lugúdi Jesúsu, ába layúmuragun lun lun lídin lúbiñe,

42 ladüga ában rügüñoun liraü, queí buri dúusu irúmu táu, touwe. Dan le lídinbei Jesúsu, ába jafálaruni sarágu gürígia darí lun jámurudaguni.

43 Níñounti ában würi jádan, dúusu irúmu táu láu lésejan jítaü tídaangiñe. Gásta táali sun tiseínsun jawágu surúsiagu, siñá jamutu areídaguagüda.

44 Ába tayárafadun lun Jesúsu lanáangiñe, ába tagúruruni táru lanáangun, lídan méme óra ligía ába tareídagun.

45 Ábati laríñagun Jesúsu.

—¿Ca agúrurubei nuágu?

Quei sun lan jagía aríñaga luágu magúrurúnwa lan luágu, ába laríñagun Pédro jáma líbirigu.

—Maésturu, murúgu wañátia ya lurúma jíbe gürígia, ¿álügüdajagidibu ca lan agúrurubei buágu?

46 Ába laríñagun Jesúsu.

—Gurúwaali nuágu, ladüga sandí numuti luágu areídaguaagüdaadina lan gürígia láu nubáfu.

47 Dan le tasúbudiruni würi tugúya luágu subúdiwaali lan, aba tiábin adádagareina, ába tájuduragun lubádu lugúdi Jesúsu, ába tagúfesserun lun jagíbugiñe sun gürígia ca lan lébubei tagúrurun luágu áni ába lan tareídagun lídan méme óra ligía.

48 Ábati laríñagun Jesúsu tun.

—Niraü, areídaguaadibu ladüga bafíñerun nuágu. Beíba darángilañu.

49 Nígili Jesúsu adímureja, ligía lachülürün ában lúbiñegiñe Jáiro, ába laríñagun lun Jáiro.

—Jilá biraü, mebéresejadügüyabá lun Maésturu.

50 Dan le lagáambunbalin Jesúsu le, ába laríñagun lun.

—Manúfudedabá, afíñerügübá, ábame tareídagun biraü.

51 Dan le lachülürünbei Jesúsu lúbiñoun Jáiro, mígirunti lun jebélurun ámu lúma lueídügüya Pédro, Jacóbo lúma Juan jáma tagübürigu irájü tugúya.

52 Jayájuña sun ja ñíbaña tárigi, ába laríñagun Jesúsu joun.



—Mayájua jumá, moúnwentu, tarúmugarügüña.

<sup>53</sup> Ába jéjerajan láu ladüga subúdi jamáni luágu jilá tan.

<sup>54</sup> Ábati lárügüdüni Jesúsu tújabu, ába laríñagun láu umálali jéreti.

—Irájü, sarába.

<sup>55</sup> Ába táguuyugun, ába tásaarun lídan méme óra ligía, ába laríñagun Jesúsu lun jíchugun eígin tun.

<sup>56</sup> Weíriti janígi tagübürigu, ába laríñagun Jesúsu joun lun mabájüdagun jamáni le asúseredubei ni ca un.

## 9

### *Loúnajaniña Jesúsu dúusu apóstolugu apúrichija (Mt 10.5-15; Mr 6.7-13)*

<sup>1</sup> Ába loúndaruniña Jesúsu dúusu láni apóstolugu, ába líchugun ubáfu joun lun jaságarun sun jawúyeri espíritugu wuríbatíña lúma lun jareídaguagüdün sánditiña.

<sup>2</sup> Ába loúnajaniña apúrichijeí ugánu luáguti larúeijan Búngiu lúma areídaguagüdaña sánditiña.

<sup>3</sup> Laríñaga joun.

—Manüga jumá ni cáta júmagua luágu juweíyasun —ni bádun, ni ságü, ni fein, ni seínsu. Ábanrügütá símisi janügün.

<sup>4</sup> Furúmieguarügü múna to ñíjin lumúti jachülüra, reídei jumá ñi darí jídin lídaangiñe fulásu ligía.

<sup>5</sup> Le ñí lumuti merésibirúniwa jumá, dánme le jáfuridun lídaangiñe fulásu ligía, ábame jáfuruduni calíqui lueígiñe jugúdi, arúfuda jumámugei luágu magúndan jumá láu jagáburi lílana fulásu ligía, ígira jumáña quei jadáriragun joúngua.

<sup>6</sup> Ábati jáfuridun apóstolugu jagía, ába jeíbuguni sun lirájüñü fulásu apúrichijeinei ugánu luáguti asálbaruni, areídaguagüdeina jagía sánditiña lídan sun fulásu le ní lumuti jóudin.

*Loúnwen Juan le abásteragüdjabei  
(Mt 14.1-12; Mr 6.14-29)*

<sup>7</sup> Ába lagáambun gumádimati Heródes luágu sun cátei le ladügübei Jesúsu, ibídiñetiti lun cába lan larítagua, ladüga ñíñanu aríñagutiña luágu saráli lan Juan lídaangiñe ouweni,

<sup>8</sup> jíbiri aríñaga luágu proféta Elías lan achülaagubei, jíbiri aríñaga luágu ában lan jádaangiñe jíbiri binádu profétagu le ásaaruti lídaangiñe ouweni.

<sup>9</sup> Ába laríñagun Heródes.

—Áu guánarügü ouñajabei adürürei lichügü Juan. ¿Cátei funáti le, le uágubei nagáamba labájüdawagún sarágu cátei?

Ábati loúchun Heródes laríjini Jesúsu.

*Leítagüdüñ Jesúsu seíngü mílu wügüríña  
(Mt 14.13-21; Mr 6.30-44; Jn 6.1-14)*

<sup>10</sup> Dan le jagíribudun apóstolugu, ába jabájüdagun lun Jesúsu luágu sun le jadügübei. Ábati lanügüniña lídoun fulásu mageírawati yaráfa lun Betsáida.

<sup>11</sup> Dan le jasúbudirunbalin gürígia, ába jafálaruni, ába lerésibiruniña Jesúsu, ába ladímurejan joun luágu larúeijan Búngiu, areídaguagüda láña sánditiña.

<sup>12</sup> Dan le lagúmeserunbei adárüda, ába jayábin láni Jesúsu dúusu apóstolugu lúmoun, ába jariñagun lun.

—Oúnaja báña gürígia ja, ñüdüñ jamámuga áluga jabára lun jeméraagun, áluaja jagíame eígini lídan

buri lirájüñü aüdü lúma lídan buri fulásu yaráfati, ladüga úati ni cáta ya.

<sup>13</sup> Laríñaga Jesúsu joun.

—Rújuma eígini joun.

Jaríñaga lun.

—Seíngü rügüñoun fein wáma jáma bián úduraü, ánjawa gubeírügü ñüdüñ agáñija eígini joun sun gürígia ja.

<sup>14</sup> Yaráfañanu jóun seíngü mílu wügüríña ñi, mabájüdünga würíña jáma irájüñü. Ába laríñagun Jesúsu joun láni disípulugu.

—Ñurügüda jumáña dimí dimí-san.

<sup>15</sup> Ába jadügüni ítara, ába jañúurun súngubei.

<sup>16</sup> Ábati lanügünun Jesúsu seíngü fein lújaburugu jáma bián úduraü, ába laríjin siélun, ába líchuguni eteíngiruni lun Búngiu. Lárigiñe lagúbachagunun fein lúma úwi, ába líchuguni joun láni disípulugu lun jafánreinjani jádan gürígia.

<sup>17</sup> Joútiña súngubei quimúle, dan le jabúdajanun ígragutu, buíngüdatiña dúusu faníñe láu.

*Laríñaguni Pédro luágu Jesúsu lan Crístubei  
(Mt 16.13-19; Mr 8.27-29)*

<sup>18</sup> Luágu ában wéyu dan le layúmuraguña lan Jesúsu lábugua, ñíñanu láni disípulugu díseraü lueí, ába laríñagun joun.

—¿Ída liñásan jarítagun gürígia nuágu? ¿Cátanasan, según jagía?

<sup>19</sup> Ába jaríñagun lun.

—Añájein, aríñagutiña luágu Juan lan le abásteragüdjabei amürü, jíbiri, aríñaga Elías,

añájeingua aríñagutiña luágu ában lan jádaangiñe binádu profétagu ásaaruti lídaangiñe ouweni amürü.

<sup>20</sup> Ábati laríñagun joun.

—Ángi jugúya, ¿cátanagi lídan jarítangun?

Laríñaga Pedro lun.

—Cristu, le loúnajabei Búngiu lun lasálbaruniña gürígia, amürü.

*Ladímurejan Jesúsu luágu loúnwen  
(Mt 16.20-28; Mr 8.30-9.1)*

<sup>21</sup> Ába laríñagun Jesúsu joun láu éregu lun maríñagun jamáni cátei le ni ca un.

<sup>22</sup> Ába laríñagun joun.

—Nasúfuriruba sarágu, áu le Wügüri Garaüwarügüti. Janügübadina wügüriña weírigutiña lídan jafíñen juríu, jábutigu fádirigu, jáma arúfudajatiña lilúrudun Moisés, quei ni cáta. Nafarúaba jilágubei, ábame násaarun lídaangiñe ouweni luágu lürüwan wéyu lúnya nabágaridun.

<sup>23</sup> Lárigiñe, ába laríñagun joun súngubei.

—Le busénti nánigu lan, bulíeileí cáteiñein lan, awándaleí sun luwúyeri asúfuriruni le lúnbei liábin lun, nueígiñe, queisi lanügüni ában wügüri lugúruwan, falálana.

<sup>24</sup> Ladüga le abúseeruti leséfuragun lúngua ya ubouágu leféri-dirubei ibágari le magúmuchaditi, ánjein le ánjabei leféri-diruni libágari ya ubouágu nueígiñe, libíjubei ibágari le magúmuchaditi siélu.

<sup>25</sup> ¿Cági ju lan lun gürígia lagáñeiruni sun le lánina ubou, leféri-direime lubára siélu o lagünrinchaguba lan lúngua?

26 Le anügüti busíganu nuágu lúma luágu nerérun, áu le Wügüri Garaüwarügüti, nibúsigaribadina gíñe láu dánme le niábin quei urúei láu luweírigun Nüguchi jáma ánjeligu ja sándubaña.

27 Ninárün naríñaguni jun luágu añájein lan jádaangiñe ja yábaña guetó, mouñwenbaña maríjinga jameí larúeijan Búngiu.

*Lámuñedagun laríjn Jesús*

*(Mt 17.1-8; Mr 9.2-8)*

28 Queíburi wídü wéyu lárigiñe laríñaguni Jesúsú cátei le, ába laweínrun luágun ában wúbü ayúmuragua lun Búngiu, barü lumútiña Pédro, Jacóbo, lúma Juan lúmagua.

29 Dan le niján lan Jesúsú ayúmuragua, ába lámuñedagun ligíbu, ába tájarudun lanáangun, ába támiridun.

30 Ábati jasáliragun Moisés lúma Elías ayánuja lúma,

31 geyégu líña ában larúgounga weíríti jáu, jayánujaña libügürü ouweni le lúnbei lasúfuriruni Jesúsú, Jerusalén.

32 Láu sun luweírin lidábu lágu Pédro jáma líbirigu, marúmuguntiña, aríja jamúti luweírigun Jesúsú jáma bián wügüriña ja lúmabaña.

33 Dan le adísedeinaña bián wügüriña jagía lueí Jesúsú, ába laríñagun Pédro lun.

—Maésturu, ¡lídan dan awánja lan ya! Adüga wamá ürüwa dibásein ya—ában bun, ában lun Moisés, túma ában lun Elías.

Ibidiñeti lun Pédro ca lan laríñagubei.

34 Súnti niján lan adímureja, ába liábin ában juánriñu oúburaguaña, ába janúfudedagun ladüga jadáriragun joúngua lurágeirugu juánriñu ligía.

35 Ábati jagáambun ában umálali aríñaguti lídaangiñe juánriñu ligía.

—Niraü le jínsiñebei nun le, agáamba jumeí le lubeíbei.

36 Lárigiñe ladímurejan umálali ligía, ába jaríjin disípulugu luágu lábugua rügáli lan Jesúsu. Reídeitiña maníñu, maríñagun jamúti cátei le jaríjubei lun ni ában lídan dan ligía.

*Lareídaguagüdün Jesúsu ában irájü gawáguti espíritu wuríbati*

*(Mt 17.14-21; Mr 9.14-29)*

37 Larúgan, dan le jarárirunbei lueígiñe wübü, sarágu jáña gürígia ñüdüntiña lubároun Jesúsu.

38 Ábati lagúaragun ában wügüri jádaangiñe láu umálali jéreti, laríñaga.

—Maésturu, fuleísejabubá nun, aríjabeí niraü le ligía rügüñebei,

39 níjein ában espíritu wuríbati luágu, dan le lárügüdüni, ába lagúaraguagüdüni, ába louwejan, ába láfurijan jacútaü liyúmulugugiñe. Añáwurija lumúti, májati lígiruni.

40 Ayúmuraguadina joun báni disípulugu lun jaságaruni espíritu wuríbati le lueí, siñá jamuti.

41 Ába louñabun Jesúsu, laríñaga.

—¡Jugúya gürígia mafiñeraditiña, wuríbatiña! ¿Átiribeísan dan lun neréderuni júma lubá gayára lan jafiñerun nuágu? ¿Ídame lagúmucha mafiñeni le jídaanbei? Barübei biraü ñájoun.

<sup>42</sup> Dán yebe le lídin irájü ligía lun, ába lájuchuruni espíritu wuríbati múarugún, ába loúwejugüdüni, ába ladeínjan Jesúsu lun espíritu wuríbati ligía, ába lareídaguagüdüni irájü, ába ledéregeruni lun lúguchi.

<sup>43</sup> Ába laweíridun janígi súngubei láu luweírigun Búngiu.

*Ladímurejaanya Jesúsu luágu louñwen  
(Mt 17.22-23; Mr 9.30-32)*

Sun añaja lan láu luweírin janígi láu le ladügübei Jesúsu, ába laríñagun joun láni disípulugu.

<sup>44</sup> —Agáamba jumeí cátei le buídu. nedéregerúaba, áu le Wügüri Garaüwarügüti, jájaburugun náganiñu.

<sup>45</sup> Úati gunfaráanda jamáni disípulugu le laríñagubei, ladüga darúñu líña jasáminan lun cátei le, áni janúfudetiñati lun jaríñagun lun lun lafúnraanguagüdüni le laríñagubei, joun.

*¿Ca weírigutimaabei?  
(Mt 18.1-5; Mr 9.33-37)*

<sup>46</sup> Ábati jagúmeserun disípulugu asígeneja jámagua luágu ca lan weírigutimaabei jádan,

<sup>47</sup> quei lasúbudiruni Jesúsu jasáminan, ába lanügün ában irájü lubáduagun,

<sup>48</sup> ába laríñagun joun.

—Le erésibiruti ában irájü queísi irájü le lídan níri, resíbi lumútina, le erésibirutina, resíbi lumúti gíñe le oúnajabalina. Le lubeíti ünabugutimaabei jídan, ligía weírigutimaabei.

*Le mámabei wágani, wámagiñeñein  
(Mr 9.38-40)*

<sup>49</sup> Ábati laríñagun Juan lun Jesúsu.

—Maésturu, aríjatiwa ában wügüri aságajati espíritugu wuríbatíña lídan bíri, ába wewéridiruni ladüga máma lan ában wádaangiñe.

<sup>50</sup> Laríñaga Jesúsu lun.

—Mewéridira jumeí, ladüga le mámabei wágani, wámagiñeñein.

*Ladeínjan Jesúsu lun Jacóbo lúma Juan*

<sup>51</sup> Dan le layarafadun dan lun lanügüniwa Jesúsu siélun, ába ladügüni luweíyasun Jerusaléoun láu anígi.

<sup>52</sup> Ába loúnajan loúnagülegu lubá, ába jóúdin lídoun ában liraüraü fulásu láni Samária lun jáluajan múna lubá,

<sup>53</sup> májatiña Samariána jerésibiruni ladüga jaríjin luágu leíbuga lan Jerusaléoun.

<sup>54</sup> Dan le jaríjinbalin Jacóbo lúma Juan luágu mája jamá Samariána jerésibiruni, ába jaríñagun lun.

—Wabúreme, ¿buséntibu lun wamúriajan lun larárirun wátu geméti siélugiñe lun lagúmuchun jáu queí meja ladügüni proféta Elías?

<sup>55</sup> Ábati ladígiragun Jesúsu jawágun, ába ladeínjan joun, laríñaga.

—Ibídiñeti jun luágu wuríba lan cátei le jayúmajabei.

<sup>56</sup> Máma niábiña, áu le Wügüri Garaüwarügüti, agünrinchaguei jabágari gürígia, niábiña asálbarei.

Ábati jóúdin lídoun ámu liraüraü fulásu.

*Já yebe busénbaña jafálaruni Jesúsu*

*(Mt 8.19-22)*

<sup>57</sup> Dan le luágu jamá üma, ába laríñagun ában wügüri lun Jesúsu.



—Nabúreme, buséntina nafálarunibu le ñíjin lumúti bídin.

<sup>58</sup> Laríñaga Jesúsu lun.

—Darítiña gasígamu júyu lun jaganoún ñi, gádibu jagía dunúru, ánjein áu le Wügüri Garaüwarügüti, úati ni jalíaba lan nabálachagüdei nichügü.

<sup>59</sup> Laríñagaya Jesúsu lun ában.

—Falábana.

Laríñaga lun.

—Nabúreme, lárigiñeme loúnwen núguchi, buná neíme, ábame neíbugun búma.

<sup>60</sup> Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburu, ánjein bugúya, beíba apúrichijeí ugánu luáguti larúeijan Búngiu.

<sup>61</sup> Ábayati laríñagun ában lun.

—Nabúreme, buséntina nafálarunibu, neíba yebe ayóuragua joun ja wábiñebaña.

<sup>62</sup> Laríñaga Jesúsu lun.

—Le íchuguti lújabu luágu awoújagülei, lárigiñe ába laríjin lárigoún, mabuídunti lun lílaname larúeijan Búngiu.

## 10

*Loúnajaniña Jesúsu ürüwa-wein-dísi disípulugu apúrichija*

<sup>1</sup> Lárigiñe cátei le, ába lanúadajan Jesúsu ürüwa-wein-dísi jádaangiñe lánigu, ába loúnajaniña lubá, bián bián, lídoun sun ageíraü lúma fulásu le lúnbei lídin ñi.

<sup>2</sup> Laríñaga joun.

—Inárüni, gíbetiña gürígia ja aráanseñabaña lun jagáambuni ugánu luáguti asálbaruni, jagía, ítara jáña queísi nádü le lúnbei lalúbajoúniwa, áni loúguatiña ñadágimeintiña. Ligía lúnti lubeí jamúriajan lúma Búngiu lun loúnajan ñadágimeintiña jagánaguóun.

<sup>3</sup> Jeíba, nouñajañadün quei mudún jádoun anímaalu gáñitiña.

<sup>4</sup> Manüga jumá ságü júmagua, ni seínsu, ni geídi, meréderagun jugúyame ayánuja ni ca úma luágu üma.

<sup>5</sup> Dánme le jebélurun tídoun ában múna, busújuma furúmiñe, jaríñagame. “Darángilaü joun tílana múna to.”

<sup>6</sup> Ánjein añájein lubeí gürígia jínsiñejabutiña lun darángilaü tídan múna tugúya, jerésibirubadün láu ugúndani, jóunbei abúsuruni lánina darángilaü. Ánjein úa jabeí gürígia jínsiñejabutiña lun darángilaü tídan múna tugúya, giríbugüda jumeí abúsuruni.

<sup>7</sup> Reídei jumá tídan múna tugúya to ñí lubei jerésibirúa, jou jumeíme, gurá le íchugúti jun úouga busíganu, ladüga garíchatí ñadágimeinti lun lafáyeiruaja. Masáansija jumá múna.

<sup>8</sup> Dánme le jachülürün lídoun ában ageíraü le ñí lumuti jerésibirúa, jóujumei le íchugúti jun,

<sup>9</sup> areídaguagüda jumáña sánditiña ja ñítiña, jaríñagame joun lílana fulásu ligía. “Subúdigüdáwaali luáguti larúeijan Búngiu jun.”

<sup>10</sup> Ánjaün achülüra lídoun ában ageíraü le ñí lumuti merésibirúniwa jumá, furíjuma lídoun buri üma, jaríñagame.

<sup>11</sup> “Ásta licáliquin jageíra le luágubei wagúdi furú wamuti lun warúfuduni jun luágu magúndan wamá

láu jigáburí, áni subúdi jumeí luágu subúdigüdáwaali lan luáguti larúeijan Búngiu jun.”

12 Naríñajare jun luágu lídan lánme luwéyuri lagúseragüdüniña Búngiu gaffigountiña, janárimetimaabei jabeichúniwa lílana fulásu le merésibirunbadün sügü láu jabeichún lílana ubúrugú le Sodóma.

*Lílana ageíraü buri magáambaditiña  
(Mt 11.20-24)*

13 ‘¡Fugiábu jugúya lílana Corazín! ¡Fugiábu jugúya lílana Betsáida! Ladüga lun jamúga ubúrugú lan Tíro o Sidón ladügüwa buri miláguru le adügübei lídan jubúrugute, binárü jamúga lasáansiragua jagáburi lílana, ába jamúga jarúfuduni láu jadáüragun lúdu lúma balígi.

14 Ánjein jugúya, lídaanme luwéyuri agúseruni, weíritimaabei jabeichúniwa sügü jáu gürígia Tírona jáma Sidónna.

15 Amürüti, ubúrugú le Capernaúm, ¿jarítaguatibu luágu liñurúaba lan bíri queísi líñun siélu? Larárirawagüdüwaba bíri ünabun queísi lünabun máfiougati.

16 Ába laríñagun Jesúsu joun ürüwa-wein-dísi disípulugu ja loúnajañabaña apúrichija luágu larúeijan Búngiu.

—Le agáambutün, agáamba lumútina, le májati lagáambunün, májati gíñe lagáambunina, áni le májati lagáambunina, májati gíñe lagáambuni Nóguchi le oúnajabalina.

*Jagíribudun ürüwa-wein-dísi disípulugu*

17 Ába jagíribudun ürüwa-wein-díisi disípulugu jagía lídaangiñe jaweíyasun láu ugúndani, aríñageina jagía.

—Wabúreme, ásta espíritugu wuríbatiña agáamba jamútiwa dan le waságaruniña lídan bíri.

18 Laríñaga Jesúsu joun.

—Ánja, aríja numúti ligáburi leíguadun Máfia siéluigiñe quei ában labírijanouga.

19 Rújadina ubáfu jun lun jadügüragun jéwe jáma águru, masúfurirunga ni cáta, lúma lun jére lan jubáfu lueí lubáfu Máfia.

20 Láu sun líra, magúndaara jumá luágu jagáambunün espíritugu, gúnda jumá luágu níjein lan jíri bürüwañu tídan lilíburun Búngiu siélu.

*Lagúndaarun Jesúsu  
(Mt 11.25-27, 13.16-17)*

21 Lídan óra ligía, ába labuínchagüdüni Sífiri Sándu Jesúsu láu ugúndani, ába laríñagun.

—Núguchi, le Labúremebei siélu lúma múa, iñúragüda numúti bíri, ladüga arámuda báali cátei luáguti barúeijan jaweí chútiña áu jáma furéndeitiña, ába bafúraanguagüdüni joun ja louguabaña ufúrendei queísi irájüñü. Ánja, Núguchi, ladüga ítara líña babúseeruni.

22 ‘Derége láali Núguchi sun cátei nun. Úati ni ában subúdijabuti cáтана lan lueídügüya Núguchi, úati giñe ni ában subúdijabuti cáteiñein lan Núguchi nueídügüya jáma ja úntiña nabúseera nasúbudiragüdüni.

23 Ábati ladígiragun adímureja jóunrügü láni disípulugu, laríñaga.

—Fuleíseiwatiña ja aríjubalin cátei le jaríjubei jugúya,

<sup>24</sup> ladüga nariñajare jun luágu sarágu jáña urúeigu jáma profétagu abúseerutiña yebe meja jaríjini le jaríjubei jugúya guetó, maríjin jamúti, busén jagía yebé meja jagáambuni le jagáambubei guetó, magáambun jamúti.

*Jémpulu luáguti Samariána le buídubei*

<sup>25</sup> Lídan ában guríriguaü, ñíñein ában arúfudajati lilúrudun Moisés, abúseeruti louchaguni Jesúsu, ába lásaarun, ába laríñagun lun.

—Maésturu, ¿cábasan nadüga lun gayára lan nibíjini ibágari magúmuchaditi?

<sup>26</sup> Laríñaga Jesúsu lun.

—¿Cáteigi bürüwañubei lídan lilúrudun Moisés? ¿Ída liñágia balíjan ñi?

<sup>27</sup> Ába loúnabun, laríñaga.

—Jínsiñelá Babúreme Búngiu bun táu sun banígi, táu sun buwáni, láu sun bére, lúma láu sun bisáminan, jínsiñe jagíame bíbirigu bun quei bínsiñegua búngua.

<sup>28</sup> Ábati laríñagun Jesúsu lun.

—Oúnabaadibu buídu, ánjein badüga ítara, bibíjubei ibágari magúmuchaditi.

<sup>29</sup> Queíti busén lan arúfudajati ligía larúfuduni luágu buídu lan lálügüdajan, ába laríñagun lun Jesúsu.

—¿Cátañagi níbirigubaña?

<sup>30</sup> Ábati loúnabuni Jesúsu, laríñaga lun.

—Ñíñein ában wügüri arágachuti Jerusaléngiñe lun ubúrugun Jericó, luágu luweíyasun ába

járügüdüni jíwerutiña, ába jíwerujani sun le lúmabei ásta lanáangun, buleísei jameí, ába jígiruni jilá mémeeli.

<sup>31</sup> Ába lásügürün ában jafádirin juríu lídaangiñe méme üma ligía, dan le laríjinbalin wügüri ligía, mebéresenti láu, ába lasígiruni leíbugun loubáfurugugiñe üma.

<sup>32</sup> Sügü ligía ában jádaangiñe ladügawagun Leví ñígiñe, dan gíñe le laríjini wügüri buleíseiwaali ligía, ába gíñe lasígiruni leíbugun loubáfurugugiñe üma, mebéresenga gíñe láu.

<sup>33</sup> Ábati lásügürün ában wügüri Samariána aweíyasujati lídaangiñe üma ligía, dan le laríjinbalin, ába lagúdemedagun lun.

<sup>34</sup> Ába liábin, ába lagáranijan lun bíti buri le luágubei láu aílí túma diweín, ába lagüraguni. Ába laweínragüdüni luágu lilügün burígü, ába lanügüni tídown jában chülüdügütiña, ába ladügüni le liyáraati lun.

<sup>35</sup> Larúgan, dan le leíbuga lan Samariána ligía, ába láluguchun bián seínsu le denáriu, ába líchuguni lun tabúreme múna, laríñaga lun. “Toúnigibeí wügüri le, ánjabu agástara ámu lueí le níchugubei bun luágu, nafáyeirubei bun dánme le nagíribudun.”

<sup>36</sup> Ábati lálügüdüni Jesúsu arúfudajati ligía.

—¿Cáteiti jádaangiñe ürüwa wügüriña ja líbiribeí le ueíbei líwerujoúa, lídan barítagan?

<sup>37</sup> Laríñaga lun.

—Le gudémejabubei lun.

Laríñagati Jesúsu lun.

—Ítaralá gíñe badüga.

*Jesúsu jábiñe Márta túma María*

<sup>38</sup> Ába lasígirun Jesúsu luágu luweíyasun jáma lánigu, ába lachülürün lídoun ában liraüraü fulásu le ñí lubei terésibirei ában würi gíritu Márta, túbiñe.

<sup>39</sup> Ñiñoun ában tamúlelua Márta gíritu María, ába tañúurun lubádu lugúdi Jesúsu lun tagáambuni le lariñagubei,

<sup>40</sup> ánjounti Márta, weíriti teténirun lun tubéresegun. Ába tariñagun Márta lun Jesúsu.

—Nabúreme, ¿mebéresentibusan láu tígirunina namúlelua adügei sun berésegu nábugua? Ariñagabá tun lun tíderagunina.

<sup>41</sup> Ába loúnabunun Jesúsu, lariñaga tun.

—Márta, bafúuduña luágu sarágu cátei,

<sup>42</sup> buídurügüti murúsun lun weígin. Anúadaja táali María lubuídun-ágei cátei le lúnbei ladügüniwa, áni úabei ni ában lun lagídaruni tueí.

## 11

*Larúfudajani Jesúsu ayúmuraguni lun Búngiu  
(Mt 6.9-15, 7.7-11)*

<sup>1</sup> Luágu ában wéyu, layúmuraguña Jesúsu lun Búngiu lídan ában fulásu, dan le lásurun, ába lariñagun ában jádaangiñe láni disípulugu lun.

—Nabúreme, arúfudajabá ayúmuraguni woun quei larúfudajan Juan joun láni disípulugu.

<sup>2</sup> Lariñaga Jesúsu lun.

—Dánme le jayúmuragun lun Búngiu, jariñagame ítara.

Wáguchi Búngiu le siélubei, inébewalá bíri.

Ñübinlá bidáni lun barúeijan ya ubouágu,

adügüwalá bugúndan ubouágu quei ladügün  
bugúndan siélu.

<sup>3</sup> Rúboun fein buídurügütu woun lun wéyu le  
ugúñbebei.

<sup>4</sup> Ferúdunabeí wuríbati le adüga wamáalibei quei  
ferúduna wamániña ja adügübaña wuríbati  
woun.

Mígira báwa lun wáburujan lídoun wuríbani,  
dísegüdarügü báwa lueí.

<sup>5</sup> Aríñagati gíñe Jesúsu joun.

—Niján ában jémpulu jun. lídin jamúga ában  
jídaangiñe lúbiñe ában lumáda amídi áriebu, ába  
laríñagun lun. “Numáda, furédeibá ürüwa fein nun,

<sup>6</sup> ladüga sun líña lachülürün ában numáda  
núbiñoun áni úati ni cáta núma lun níchugun lun.”

<sup>7</sup> Ába jamúgati loúnabun le ában múnadagiñe,  
laríñaga jamúga. “Mebéreseja bána, darúnaali  
nubéneri, áni rouñjadina jáu sun nisáanigu, siñáti  
násaarun íchiga ni cáta bun.”

<sup>8</sup> Naríñaguña jun luágu íbini lan jamúga másaarun  
lan íchigoun lun ladüga lumáda lan, lásaaruña  
jamúga íchigoun lun lueí lasígirun ebéreseja lun.

<sup>9</sup> Aríñagatina lubeíti jun. Jamúriaja, ábame  
líchugun Búngiu jun, jáluaja, ábame jadárirun,  
jadaúnja luágu béna, ábame lánjunrenchúniwa jun.

<sup>10</sup> Ladüga sun le amúriajati, íbíjati, le áluajati,  
daríti, le adaúnjati luágu béna, junrénwati lun.

<sup>11</sup> ‘¿Gayáraabei funági líchugun ában úguchili  
jídaangiñe dúbü lun liraü dan le lamúriajan  
fein lúma? ¿o líchugun lan ában jéwe lun dan le  
lamúriajan úduraü?



<sup>12</sup> ¿o líchugun lan ában águru lun dan le lamúriajan gañeín?

<sup>13</sup> Gíchigadijadün ligía cátei buíti joun jirájüñü láu sun juríban, igúbumeti líchigei Júguchi Búngiu le siélubei Sífiri Sándu joun ja amúriajati!

*Lariñawagún luágu níjein lan lubáfu Máfia lúma Jesúsu*

*(Mt 12.22-30; Mr 3.19-27)*

<sup>14</sup> Níñein Jesúsu aságara ában espíritu wuríbati lueí ában wügüri le madímuregüdün láalibei yebe espíritu ligía, dánti le láfuridunbei espíritu wuríbati ligía, ába gayára lan ladímurejan meréngaditi ligía. Ába laweíridun janígi gürígia láu cátei le.

<sup>15</sup> Níñanu gíñe, aríñagutiña.

—Láu lubáfu Beelzebú, le Máfia, le jábuti máfianu, laságaja wügüri le espíritugu wuríbatiña.

<sup>16</sup> Jíbiri, lun jóuchaguni, ába jamúriajan miláguru lúma lun larúfuduni luágu lúmagiñe lan Búngiu liábin lubáfu.

<sup>17</sup> Queíti subúdi láani le jarítagubei, ába lariñagun joun.

—Furúmieguaügü arúejani le afánreinraguti lun jageíndagun jámagua, lagünrinchaguba, ában gíñe família fánreinguatiña ladüga wuríbu, jagünrinchaguba gíñe.

<sup>18</sup> Ánjein gíñe níjein lubeí fánreinguaü jádan Máfia jáma lánigu, ¿ída lubági ladúrarun lubáfu? Nariñagunbalin le, ladüga jariñagun luágu láu lan lubáfu Máfia naságaja espíritugu wuríbatiña ja ebélagüdübaña Máfia guánarügü jádoun gürígia,

<sup>19</sup> áni ánjein ítara líña lubeí, ¿cági íchugubei ubáfu joun ja jánigu jugúya lun jaságajan espíritugu

wuríbatíña, Máfia ódi Búngiu? Láu líra, jagía guánarügü arúfuda jamúti luágu bulíeigua jumá.

20 Le inárünibeí, láu lubáfu Búngiu naságaja espíritugu wuríbatíña, áni arúfuda lumúti líra luágu chülüjali lan larúeijan Búngiu lídoun fulásu le.

21 ‘Ába wügüri jéreti, dan le aráanseñu lan, toúnigi lúban buídu, sun le lúbiñebei choúruti.

22 Ánjein ñübin ában jéretimaati lueí ába lásiiraguni, lagídaruboun sun lárumate to uáguboun leménigida lueí, ábame lanügüni le labúseerun, ába lafánreinraguni jáma lumádagu.

23 ‘Le mámabei númagiñe, náganiñein, le míderagun lumútina, güríngua lumúti le nadügübei.

*Espíritu wuríbati le agíribudúbei*  
(Mt 12.43-45)

24 Ába lariñagun Jesúsu.

—Dan le láfuridun ában espíritu wuríbati lídaangiñe ában gürígia, eíbugañajádügü líña lídan buri fulásu mábeiti áluaja leméraagun, dánti le madári láani, ába lariñagun lúnguarügü. “Nagíribudayá tídoun núban to ñígiñe lubeí náfurida.”

25 Dánti le lagíribudun, ába ladáriruni gürígia buga ligía quei ában múna to buídawaru, aráanserúa.

26 Ábati lídin, ába liábin jáu sédü espíritugu wuríbatimaatiña lueí, ába jebélurun agánawa lídan gürígia ligía, wuríbatimaajaliti le gádaanbalin wügüri ligía lueí buga furúmiñe.

*Ugúndani le tímatimaati*

27 Dan le niján lubeí Jesúsu aríñagei cátei le, ába tagúaragun ában würi jádaangiñe gürígia, tariñaga.

—¡Fuleíseiwatu jiñáru to agüriajabalibu, fuleíseiwatu to átagüdübalibu!

<sup>28</sup> Ába laríñagun Jesúsu.

—¡Fuleíseiwatimaatiña ja agáambubalin le lubeíbei Búngiu áni abájüda jameí!

*Amúriajatiña gürígia wuríbatíña miláguru lúma Jesúsu*

*(Mt 12.38-42; Mr 8.12)*

<sup>29</sup> Añája méme gürígia oúndaragua geyégu láu Jesúsu, ába lagúmeserun adímureja, laríñaga.

—Wuríbatíña gürígia ja lánina dan le, áni jamúriaja miláguru núma lun narúfuduni luágu Búngiu lan oúnajabalina, wel, míchugúnbei ámu seíni joun lueí le luáguti meja proféta Jonás.

<sup>30</sup> Ítara queí meja le asúseredubei lun Jonás ában seíni joun ja aganoúbaña Nínive luágu Búngiu lan oúnajabalin, ítara lúba giñe le lúnbei lasúseredun nun, áu le Wügüri Garaüwarügüti, ligíaba ában seíni joun gürígia ja lánina dan le luágu Búngiu lan oúnajabalina.

<sup>31</sup> Dánme le lidáani agúseruni, dánme le lagúseragüdüniña Búngiu gürígia ja lánina dan le, ábame tásaarun lurúeite Súru lun tasíadiruniña, ladüga tugúya, ñübintu lídaangiñe lidíse-ágei uboú lun tagáambuni lichú láu Salomón, áu, weírigutimaatina sügü láu Salomón áni májatün jagáambunina.

<sup>32</sup> Lídan mémeme agúseruni ligía, ábame giñe jásaarun já meja aganoúbaña ubúru gu Nínive, ábame jasíadiruniña ja lánina dan le, ladüga sáansiguati jagáburi Nínivena lárigiñe lapúrichijani Jonás ugánu

le láni Búngiu joun, áni áu ában le weíriguti sügü láu Jonás, áni májatün lun jagáambunina.

*Lilámpun úgubu*

*(Mt 5.15, 6.22-23)*

Ába lasígirun Jesúsu aríñaga.

<sup>33</sup> —Úati ébeduti ában lámpu líchigei lídan fulásu arámudaguati, ni tábugiñe ában gáfu, íñuba líchigei lun larúgoungadun joun ja ebélurutiña.

<sup>34</sup> Ítara líña águu quei ában lámpu lun úgubu, ánjein buídu lubeí bágu, aríja ligía luágun cátei lánina Búngiu, camá jamuga jarúgoungabei gíñe láu sun búgubu, áni buídubei gíñe sun bigáburi. Ánjein sándi lubeí bágu, aríja ligía luágun cátei lánina ubouú, camá jamuga lídaanbei lubúriga sun búgubu, wuríbabei gíñe bigáburi.

<sup>35</sup> Touñigibá lun mabúrigadun lan bilámpun.

<sup>36</sup> Ánjein jarúgounga lubeí láu sun búgubu, úaga ni murúsun lubúriga, baríjubei sun cátei furáangu quei dan le durúngu líña lan lámpu báu.

*Líchugun Jesúsu jadúnrun fariséogu jáma arúfudajatiña lilúrudun Moisés*

*(Mt 23.1-36; Mr 12.38-40; Lc 20.45-47)*

<sup>37</sup> Dan le lagúmuchunbei ladímurejan Jesúsu, ába lamísurajani ában fariséo eíga lúbiñe. Ába lebélorun Jesúsu, ába lañúurun luágu dábula.

<sup>38</sup> Ába laweíridun lanígi fariséo ligía láu magúnfulirun lan Jesúsu láu igáburi le lánina lachibún újabu lubá eígini.

<sup>39</sup> Ába lariñagun Wabúreme Jesúsu lun.

—Jugúya fariséogu ragá jumuti wéru lúma asiedu bougdigiñe libíti, múnadagiñe jibíti, wíyetün, buin

jíña láu luweínamu águu lúma sarágu luwúyeri wuríbani.

<sup>40</sup> ¡Deré tagáambun jugúya le! ¿Ibídíñeti jun luágu le lan adügübalin le bougudigiñebei, ligía lan gíñe adügübalin le múnadagiñebei?

<sup>41</sup> Jarúma jumá múnadagiñe jibíti láu jíchugun joun gudémetiña, ítara lúba jarúma jumá gíñe bougudigiñe jibíti.

<sup>42</sup> ‘¡Fugiábugu jugúya fariséogu! Adüгатün díisi fánreinti láu jíduru le ménta, rúda, lúma ámu luwúyeri nádü lun jíchugun ában fánreinti lun Búngiu, áni madügüntün gásu láu ísuruni lúma línsiñejabu Búngiu. Ligía lúnbei jadügüni, mígirunga jumeíme jadügüni le ában.

<sup>43</sup> ‘¡Fugiábugu jugúya fariséogu! Buséntün járügüdüni ubáraü le jabára ja weírigutimaabaña tídan jilígilisin, busén jugúya lun labúsurún jun láu sarágu inébesei ümada.

<sup>44</sup> ‘¡Fugiábugu jugúya fariséogu, biángua tigíbul, ladüga ítara jíña quei umúajaü le marijínti, sügü jagía gürígia ligíbuagugiñe ibídíñoun joun.

<sup>45</sup> Ábati louñabun ában jádaangiñe arúfudajatiña lilúrudun Moisés, laríñaga.

—Maésturu, banábaguñadiwa gíñetia dan le baríñaguni le.

<sup>46</sup> Ába laríñagun Jesús.

—¡Fugiábugu gíñe jugúya, arúfudajatiña lilúrudun Moisés! Jíchigei lilúrudun Búngiu queísi ában anügüni jürüti joun ámu, áni jugúya, májatün janügün ni murúsun lídaangiñe.

47 ‘¡Fugiábugu jugúya!, ladüga rújumuti dübü arítaguagüleime luágu jamúaja profétagu já meja jáfaragubaña binádu jagübürigu.

48 Láu líra, arúfuda jumúti luágu gúnda jumá láu le jadügübei binádu jagübürigu, jagía áfaragubaliña, jugúya wéndegüda jumúti jamúaja.

49 ‘Ligía laríñagunbei meja Búngiu láu lichú láu. “Nóunajaba profétagu jáma apóstolugu joun, ábame jáfaraguniña jíbiri jilágubei, eíbaaja jamáñame jíbiri.”

50 Ligía lagúseragüdübaña lubei Búngiu gürígia ja lánina dan le luágu játa profétagu ja áfarawagübaña lúmagiñe ladügün ubou,

51 lúmagiñe líta Abél lúmoun líta Zacarías le jáfarubei labádinagua latárü túma témpulu. Ligía naríñagunbei jun luágu lagúseragüdübaña lan Búngiu gürígia ja lánina dan le luágu jóüwegun profétagu.

52 ‘¡Fugiábugu jugúya arúfudajatiña lilúrudun Moisés!, ladüga ragü jumaali ligélen lubéneri subúdi, mebélurun jíña, mígirun jugúya lun jebélurun ja busénbaña jebélurun.

53 Dan le laríñagunbalin Jesúsu cátei lé buri joun arúfudajatiña lilúrudun Moisés jáma fariséogu, ába jagáñidun lúma, lárigiñe láfuridun lúbiñegiñe fariséo ligía, ába jagúmeserun ebéresejei láu sarágu buri álügüdajani

54 lun jaríjin ánjaña adárira lidúnrun.

## 12

*Larúfudajan Jesúsu luágu mabuídun lan biángua lan igíbu*

<sup>1</sup> Ába jóundaragun sarágu mílu güriǵia, gíbetiña darí lun jachúinragun jóungua. Ába lagúmeserun Jesúsu aríñaga jóúntima láni disípulugu.

—Toúnigi jumátia jaweí fariséogu, ítara líña jagáburi quei ísi—biánguañein jagíbu.

<sup>2</sup> Úati ni cáta lábugiñeti lubúriga lun mafúnraangudunbei lan, úa ni cáta arámudaguati lun masúbudirúnwabei lan.

<sup>3</sup> Ítara líña lubeíti, sun le jariñagubei lábugiñe lubúriga, lagaambúaba lídan larúgounga, le jariñagubei lanágangiñe béna, lagúarajoúba tábulugugiñe múna.

*Ca lan ueí lúnbei janúfudewa lan*

*(Mt 10.28-31)*

<sup>4</sup> ‘Nariñajare jun, numádagu, moún lumuti janúfudedun jaweí güriǵia ja gabáfubaña lun jáfarunün jilágubei, lárigiñe líra siñá jadügün ámu cátei jun.

<sup>5</sup> Nariñagaali jun ca lan ueí lúnbei janúfudedun. Janúfude jumá lueí Búngiu le gabáfugilibei lun loúnajanun juwáni máfiougatin lárigiñe lagídaruni jibágari. Lueílá janúfueda.

<sup>6</sup> ‘¿Ma alúgurúatiña seíngü dunúru luágu bián gáwanün? Láu sun mebégi jamá sarágu, mabúleidunti Búngiu ni ában jádaangiñe.

<sup>7</sup> Ánjeinti jugúya, íbini ídiburi le jábulugubei abájüda láali Búngiu ában ában. Manúfude jumá lubeíti, gebégitün sügü jáu sarágu dunúru ligíbugiñe Búngiu, áni loúnigiruñádün.

*Ja meyédagunbaña luágu Jesúsu jagíbugiñe güriǵia*  
*(Mt 10.32-33, 12.32, 10.19-20)*

<sup>8</sup> ‘Naríñajare jun luágu sun lan ja aríñagubaña jagíbugiñe gürígia luágu nánigu jamá, naríñaguba giñe luágu nánigu jamá jagíbugiñe láni Búngiu ánjeligu.

<sup>9</sup> Ánjaña ja aríñagubaña jagíbugiñe gürígia luágu máma jamá nánigu, naríñaguba giñe jagíbugiñe láni Búngiu ánjeligu luágu máma jamá nánigu.

<sup>10</sup> ‘Furúmiegurügü le aríñaguti cátei wuríbati nuágu, áu le Wügüri Garaüwarügüti, gayáraati ferúdunawa lan, ánjein le anábaguti Sífiri Sándu, siñáti ferúdunawa lan.

<sup>11</sup> ‘Dánme le janügün ligíbugiñoun lúru lu jagúserun, o jagíbugiñoun lan tábutigu jalígilisin juríu, madíjerida jumá luágu cába lan jounaba o cába lan jaríñaga,

<sup>12</sup> dánme le lachülürün óra lun jadímurejan, larúfudubei Sífiri Sándu le lúnbei jaríñaguni jun.

*Ewéridijani lueí leténirún sarágu lun irísini*

<sup>13</sup> Ába laríñagun ában jádaangiñe gürígia jagía lun Jesúsu.

—Maésturu, aríñagabá lun níbugaña lun líchuguni nufánran nun lídaangiñe alágan.

<sup>14</sup> Laríñaga Jesúsu lun.

—¿Cági íchubalina quei agúseragüdüti o quei afánreinjati jídan?

<sup>15</sup> Aríñagati giñe ítara.

—Toúnigigua jumá júngua lueí luweínamu águu, ladüga máma lueígiñe líbe lúmati gürígia labágarida sarágu dan.

<sup>16</sup> Ábati líchuguni jémpulu le joun, laríñaga.

—Ñíñein méja ában wügüri rísiti, ába líchugun lichári alúbajoúni buíti.



17 Ábati laríñagun rísiti le lúnguarügü. “¿Cábasán funa nadüga? Ibídiñeti nun jalíaba lan nareídei sun le nalúbajabei.”

18 Ába lasáminarun, ába laríñagun. “Subúdi náali cába lan nadüga, nagünrinchaguaru sun náni lágei líla nádü, ábame nadügün ámu weínamutimaatu, ábame nareíduni nalúbajan lúma sun le nómabei tídan.

19 Ábameti naríñagun núniwagua. Buíti dan bun, níjein sarágu cátei areídañu búma lun sarágu dan, eméraaguabá, jóúba, gurába, gúndaabá.”

20 Laríñaga Búngiu lun. “Wügüri deré tagáambun, bouwe árieubu le, sun le búmabei areídañu, ¿cábasan un lerédera?”

21 Ítara líña lasúseredun lun gürígia le adámuridaguagüdüti irísini lánina ubou le lúngua, ába leréderun gudémeñu lídan cátei le luáguti Búngiu, líña Jesúsu.

*Toúnigi lumútiña Búngiu lirájüñü*  
(Mt 6.25-34)

22 Ába laríñagun Jesúsu joun láni disípulugu.

—Aríñagatina lubeíti jun. Madíjerida jumá luágu cába lan le lúnbei jeígini lun jawínwandun, ni tuágu anáanguni to lúnboun jadáürünun.

23 Gebégitimaati ibágari sügü láu eígini, gebégi úgubu sügü táu anáanguni.

24 Aríja jumá joun dunúru. mábunaguntiña, malúbajan, mágei ligía jeígin, láu sun líra, jóügüda lumútiña Búngiu. ¡Gebégitimaatün sügü jáu dunúru!

25 Úati ni ában jídaangiñe gayáraati líchugun lánwoun libágari láu sun luweírin lidíjeri luágu.

26 Ánjein lubeíti siñá lubei jadügüni le míbebei, ¿ca uágu jadíjerida luágu buri líbiri cátei?

27 ‘Arija jumá ída líña lan labouóchun buri fulúri. mawádigimariti, májüchagun ligía lanáangun, áni láu sun líra, quei naríñaguni jun, ni urúei Salomón láu sun luwéndegun, mawéndedunti quei ában fulúri.

28 Ánjeinti ítara líña lubei ladáüraguagüdüni Búngiu jíduru, le níjeinbei ugúñe, jarúga lagudúña, jladáüraguagüdatimabadün, loúgua tafíñen jugúya le!

29 Madíjerida jumá lubeíti luágu ni cáta, ni luágu cába lan jeíga, ni luágu cába lan játa.

30 Ladüga lirájüñü ubou le, lárigiñanu buri cátei le, ánjein jugúya, níjein ában Júguchi le subúdijabúbei lun sun jemégeirun.

31 Áluaja jumá lun jesériwidun lun furúmiñe, ábame líchuguni sun le jemégeirubei jun.

*Írísini siélu  
(Mt 6.19-21)*

32 ‘Manúfude jumá, nirájüñü, láu sun míbe jumá, gúndaati Búngiu lun líchugun ában ubáraü jun lídan larúeijan.

33 Alúgura jumeí le júmati, jíchigeime lebégi joun gudémetiña, láu líra, jadügüñoun lágei seínsu to maweíyadaditu, irísini siélu le magúmuchaditi, le ní lubei siñá lan jebélurun jíwerutiña anügei jirísini, úa jagía jamútiri ní lun jeígini.

34 Naríñagubalin le jun ladüga le ní lumuti jirísini, níñoun gíñe janígi.

*Aráanseñu jumá, agúrabaja*

35 ‘Aráanseñu jumá lubá nagíribudun siélu giñe, durúngu jílampun.

36 Ítara jumá quei músu ja agúrabañubaña liábin jayúbudiri lídaangiñe ában maríei lun jadáraruni béna lubá, óra lagúarun.

37 Buídubei dan joun músu ja ladárirubaña jayúbudiri agágudúañu dan le lachülürün, ninárün jáu, iyúbudiri meme ligía laráanseruba, ábame lañúuragüdüniña luágu dábula, ábame lesériwiduni jeígin joun.

38 Íbini amídi áriebu lan lachülüra o lubá lan larúgan, ánjaña ladárra agágudúañu, buídubei dan joun músu jagía.

39 Subúdi jumeí luágu lun lan jamúga subúdi láni tabúreme múna cába lan óra lachülüra jíweruti íweruja, leréderuña jamúga agágudúañu, mígirunti jamúga lun tadárarún lúban lun líwerujoún lumégegun.

40 Jugúya, aráanseñu jumá giñe, ladüga lídaanme magáradajan jumá ligíame nagíribudun, áu le Wügüri Garaúwarügüti, uboúagun.

*Músu le úarabei, lúma le múaraanbei  
(Mt 24.45-51)*

41 Ábati lálügüdüni Pédro Jesúsu, laríñaga lun.

—Nabúreme, ¿woúnrügü bíchigei jémpulu le ódi joun súngubei?

42 Laríñaga Wabúreme Jesúsu lun.

—Lun furúmieguarügü oúnigiruti úarati, gunfaráanda ligía, le lígirubei liyúbudiri lun laríjin jáu tílana lúban, lun leígagüdüniña lídan dan.

43 Buídubei dan lun músu le ladárirubei liyúbudiri agúnfulira láu luwádigimari dan le lachülürün.

44 Ninárün jáu, luágu líchugubei lan liyúbudiri lun ligía lan aríja láu sun le libíjubei.

45 Ánjein arítagua músu ligía luágu lügili lan liábin liyúbudiri, ábame lagúmeserun ouseraña jíbiri músu ja lábugiñebaña lariaajan wuríba, leréderame eíga, áta, abácharuada,

46 ligíame liábin liyúbudiri lídan magáradajan lan, lídan ában óra le ibídiñeti lun. Ábame líchuguni luweírín-ágei abeíchuni luágu, lasíadireime lun lasúfuriruni le jasúfurirubei ja múaraanbaña, máfiougati.

47 ‘Músu le subúdíjabúbei lun ca lan labúseerubei liyúbudiri áni maráanserunti, mabájüdünleí, labeichúba sarágu.

48 Ánjeinti músu le ibídiñeti lun, ába ladügün cátei lé buri lúnti labeichún lueígiñe, maweíríbei labeichún. Le únti líchugúa gíbeti, gíbebei amúriajoúti lúmagiñe, le gíbeti ígirúti lábugiñe lariaajan, gíbetimaabei amúriajoúti lúmagiñe.

*Jesúsu lébunabei fánreinguaü*

*(Mt 10.34-36)*

49 ‘Láu niábin ubouágun, ñíbei fánreinguaü ubouágu queísi wátu geméti. ¡Busénjadina jamúga durúnguaali lan wátu ligía!

50 Lúnti nasúfurirun le gumúti, ¡meménija nanígi lagúmuchun!

51 ¿Jarítaguatünsan luágu barü nán meja darángilaü númagua dan le niábinbei ubouágun? Manügütina darángilaü, fánreinguaü nanügübei. Jafánreinraguba ja mafíñebaña nuágu jáma ja afíñebaña nuágu,

52 lúmagiñe guetó, seíngügua tídan ában múna, jafánreinraguba úrüwa jaweí biáma, biáma jaweí úrüwa, nueígiñe.

<sup>53</sup> Lagárabaguba úguchili luágun liraü, isáani luágun úguchili, úguchuru tuágun tiraü, isáani tuágun túguchu, ímenidi tuágun ágürü, ágürü tuágun ímenidi.

*Liseíni buri dan*

*(Mt 16.1-4; Mr 8.11-13)*

<sup>54</sup> Aríñagati gíñe Jesúsu joun gürígia ítara.

—Dan le jaríjin labúrigadun siélu, ába jaríñagun luágu lájuya lan júya, áni ligía asúsereda.

<sup>55</sup> Dánti le láfurun garábali lueígiñe suédi, ába jaríñagun luágu lárougada lan, áni ligía asúsereda.

<sup>56</sup> ¡Bíangua tigíbu jugúya le! Subúdi jumúti luáguti ligáburi lasáansiragun dan siélu lúma múarugu, ¿ca uágu ibídiñe lubei luáguti ligáburi dan le gádaanbalün jun?

*Jóucha jumá lun lídan jumá dan jáma jáganiñu*

*(Mt 5.25-26)*

<sup>57</sup> ¿Ca uágu siñá lubei jasúbudiruni cátei le úaraguabei júngua?

<sup>58</sup> Anjein agúaragüda ában gürígia buágu, ába bídin lúma ligíbugiñe lúrudu, jóuchabá baráanseragun búngua lúma luágu üma lubáragiñe jachülürün, manügün lámugabu ligíbugiñoun agúseragüdüti, luei ledéregerunibu agúseragüdüti lun polisía, ábame ládarunibu furísunrugun.

<sup>59</sup> Naríñajare bun luágu máfuridunbadibu lan ñígiñe darí bafáyeiruni lagúmujoún bigáwanün.

## 13

*Ca lan uágu lúnti lubei lasáansirún igáburi*

<sup>1</sup> Lídoun méja dan ligía, ába jayábin gürígia abájüdagua lun Jesúsu jawágu wügüríña Galiléana

ja láfaragubaña Piláto úara jáma anímaalu ja áfarawagúbaña lun adágaragüdüni lun Búngiu.

<sup>2</sup> Ába lariñagun Jesúsu joun.

—¿Jarítaguatünsan luágu ladüga lan luweírin jafígoun Galiléana jagía sügü jáu ja jíbiri lílana jageíra lasúseredunbei le joun?

<sup>3</sup> Máma lueígiñe líra, láu sun líra, nariñajare jun luágu ánjein lan masáansirun jumá jigáburi, jóúweguba gíñe sun jugúya.

<sup>4</sup> Ángi díisi-wídü jagüra ja ouwegubaña dan le láburujanbei wáyelesi le Siloébei jawágun — ¿jarítaguatün luágu weíritima lan jadúnrun sügü jáu ja jíbiri ja aganoubaña Jerusalén?

<sup>5</sup> Máma líña gíñe, láu sun líra, nariñajare jun luágu ánjein lan masáansirun jumá jigáburi, jóúweguba gíñe sun jugúya.

*Jémpulu tuáguti tídibu ígo to múnboun*

<sup>6</sup> Ábati labájüdaguni Jesúsu jémpulu le joun, lariñaga.

—Ñíñein ában wügüri, ganádiriti ában tídibu wéwe to ígo, ába lídin aríja ánjein gín tubei, madáriti ni cáta tuágu.

<sup>7</sup> Ábati lariñagun lun le oúnigirubalin ichári. “Aríjabásan, ürúwaali irúmu gabügürügua niábin áluaja ígo tuágu ídibu to, madáritina. Chaünboun, ¿cába uágu terédera ñi luágu ni cáta?”

<sup>8</sup> Ába louñabuni le oúnigirubalin ichári, ába lariñagun. “Niyúbudiri, ígirayaboún irúmu le, nañúludagüdali múa táu, awouja áume táu.

<sup>9</sup> Fágua tagíindun ítara, ánjoun magíindun, ábame tánchugún.”

*Lareídaguagüdünun Jesúsu ában würi sebúti tanágan lídan wéyu le eméraaguagülei*

<sup>10</sup> Luágu ában wéyu le eméraaguagülei, ñíñein Jesúsu arúfudaja títan jalígílisin juríu,

<sup>11</sup> ñíñounti ában würi, díisi-wídü irúmu táu láu ában espíritu wuríbati tuágu, ígira láaru espíritu ligía lemúñu, siñá tásururun ni murúsun.

<sup>12</sup> Dan le laríjinbarun Jesúsu, ába lagúarun tun, ába laríñaga tun.

—Würi, areídaguaadibu.

<sup>13</sup> Ábati líchuguni lújabu tuágu, lídan óra ligía ába tásururun, ába tagúmeserun adímureja buíti luágu Búngiu.

<sup>14</sup> Ábati lagáñidun tábuti ligílisi ladüga lareídaguagüdünun Jesúsu lídan wéyu le eméraaguagülei, ába laríñagun joun gürígia ja ñíbaña.

—Níjein sísi wéyu lídan dimáasu lun gayára lan luwádigimaríniwa, lídan sísi wéyu ligía lun jíábin lun lagáranijoún jun, máma lídan wéyu le eméraaguagülei.

<sup>15</sup> Ába laríñagun Wabúreme Jesúsu lun.

—¡Biángua tigíbu jugúya le!, ¿ma farára jumúti sun jugúya jilügün bágasu o jilügün lan burígü lun janügün áta dúna lídan wéyu le eméraaguagülei?

<sup>16</sup> Würi to, linébaanfan Abrahám, ragúlaaru Máfia láu sándi, díisi-wídü irúmu táu láu, ¿moún lumuti funági yebe lun tareídawaguagüdün lídan wéyu le eméraaguagülei?

<sup>17</sup> Dan le laríñagunbalin Jesúsu cátei le, ába nibúsigarigua jamá sun láganiñu, ánjaña sun jíbiri

gürígia, gúndaatiña láu cátei lé buri weíriguti le ladügübei Jesúsu.

*Jémpulu luáguti tíla mostása*  
(Mt 13.31-32; Mr 4.30-32)

<sup>18</sup> Ábati laríñagun Jesúsu.

—¿Ída líña ligáburu larúeijan Búngiu? ¿ca cátei úmounbei gayára lan níchuguni?

<sup>19</sup> Ítara líña quei ában liraüraü tíla mostása le lábunubei ában wügüri lichárirugu, ába labouúchun, ába laweíridun darí lun liábin lun ábanme lan tídibu wéwe weíruti, darí lun jadügün dunúru jádibu luágu tuburébu.

*Jémpulu luáguti ísi*  
(Mt 13.33)

<sup>20</sup> Ábaya laríñagun Jesúsu.

—¿Ca cátei úmounbei gayára lan níchuguni larúeijan Búngiu?

<sup>21</sup> Ítara líña quei ísi le tíchugubei ában würi tídoun ürüwa líburu fulúaarú, ába terésirun súngubei.

*Béna le bürüraübei*  
(Mt 7.13-14, 21-23)

<sup>22</sup> Ába lasígiruni Jesúsu luweíyasun Jerusaléoun, arúfudajeina ligía lídan buri sun aüdü lúma lirájüñü fulásu le ídaangiñebei lásügüra.

<sup>23</sup> Ába laríñagun ában wügüri lun Jesúsu.

—Nabúreme, míbetiñásan ja lúnbaña jasálbarun?

Ába louñabun Jesúsu, ába laríñagun.

<sup>24</sup> —Bürüraüti lubéneri siélu, jóucha jumá lun gayáraabei lan jebélurun lídaangiñe, ladüga quei naríñaguni jun, sarágujaba busúentiña jebélurun, siñábei.



<sup>25</sup> Lárigiñe ladáuruni tabúreme múna lubéneri, jugúya le bougudibei jadaünjaba luágu béna, jariñagame. “Wabúreme, darába béna wabá.” Ábame louñabunün, lariñagame jun. “Ibídiñetün nun, ibídiñe gíñe nun jalíana jumá.”

<sup>26</sup> Ábameti jagúmeserun aríñaga. “Joujadiwa, gurá wagía búma, arúfudaja amürü woun úmadarugu.”

<sup>27</sup> Ábameti louñabunün, lariñagame. “Aríñaga náali jun luágu ibídiñe jumá nun, ibídiñe nun jalíana jumá. Díse jumá nueí, sun jugúya le adügübei wuríbani.”

<sup>28</sup> Ligíaba jayájuajan, acünrijame jári dánme jaríjini Abrahám, Isáac, lúma Jacób, jáma jíbiri profétagu lídan larúeijan Búngiu, jugúyame aságarúa bougudin.

<sup>29</sup> Jayábiba gürígia lueígiñe oúbaü le ñígiñe lubeí láfuara wéyu lúma lueígiñe le ñígiñe lubeí lálüda, lueígiñe núru lúma lueígiñe suédi lun jañúurun eíga lídan larúeijan Búngiu.

<sup>30</sup> Ñibañati jádaangiñe ja agúmujoúnibaña guetó, jagíaba furúmiñetiña, jámeti furúmiñetiña guetó, jagíaba agúmujoúni.

*Layájun Jesúsu jawágu lílana Jerusalén  
(Mt 23.37-39)*

<sup>31</sup> Lídan méme wéyu ligía, ába jayábin fariséogu, ába jariñagun lun Jesúsu.

—Beíba yágiñe, ladüga busénti Heródes láfarunibu jilágubei.

<sup>32</sup> Ába lariñagun joun.

—Jeíba, jariñagame lun wügüri bíbuti ligía. “Ugúñe lúma jarúga naságajan espíritugu wuríbatíña

jádaangiñe gürígia, areídaguagüda áu sánditiña, lárigiñe jarúga, lásurun nuwádigimari.

<sup>33</sup> Lúnti nasígiruni nuweíyasun ugúñe, jarúga, lúma lárigiñe jarúga, ladüga máma lúnti lafarúniwa ában proféta jilágubei bougudi lueí Jerusalén.

<sup>34</sup> Ába layájun Jesúsu jawágu lílana Jerusalén ítara.

—¡O jugúya Jerusalénna! Áfaragua jumáaña profétagu, chügua jugúya dübü jawágun ja louñajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarúna, májatün!

<sup>35</sup> Ígira láadün Búngiu, áni nariñajare jun luágu maríjindügüya jumáadina lan daríme lachülürün dan lun jariñagun. “Biníwati le ñübinbei lídan líri Wabúreme.”

## 14

*Lareídaguagüdün Jesúsu ában wügüri lújali larúna lúma liyáda*

<sup>1</sup> Luágu ában wéyu le eméraaguagülei, ába lídin Jesúsu eíga lúbiñe ában fariséo weíriguti, sun ja ñíbaña, jariaguñein Jesúsu.

<sup>2</sup> Ñíñein giñe ában wügüri láu sándi le ílu,

<sup>3</sup> ábati lálügüdüniña Jesúsu arúfudajatiña lilúrudun Moisés jáma fariséogu, laríñaga joun.

—¿Gayáraati lareídawaguágüdün ában wügüri lídan wéyu le eméraaguagülei ódi siñáti?

<sup>4</sup> Ába jeréderun maníñu. Ábati lanügüni Jesúsu sánditi ligía, ába lareídaguagüdüni, ába laríñagun lun lun lídin.

<sup>5</sup> Ába laríñagun joun fariséogu.

—Furúmieguarügü jídaangiñe, ánjein eíguada lilügün bágasu o lilügün lan burígü lídoun ában wélu lídán wéyu le eméraaguagülei, laságarubei ñígiñe furése.

<sup>6</sup> Maríñagun jáña ni cáta.

*Ja amísurajoúbaña lídoun maríei*

<sup>7</sup> Dan le laríjini Jesúsu janúadajani amísurajoútiña ubáraü buri le jounbei ja weírigubaña, ába laríñagun joun.

<sup>8</sup> —Dánme le bamísurajoún lídoun ában fédu lánina maríei, máluajabeí lubuídun-ágei ubáraü, ñübin liñeín ábanya amísurajoúti weírigutimáati bueí,

<sup>9</sup> ábame liábin le amísurajabalün, laríñagame bun. “Rúbei bubára lun wügüri le.” Ábamei bídin láu busíganu añúura lídán lünabun-ágei ubáraü.

<sup>10</sup> Dánme le bamísurajoún lídoun ában fédu, ñurúba lídán lünabun-ágei ubáraü, lun dánme lan le liábin le amísurajabalibu, laríñagame bun. “Numáda, sügüba lídoun ában ubáraü weírigutimaati.” Ítara lúba berésibirun inébesei jagíbugiñe sun ja ñúnbaña luágu dábula.

<sup>11</sup> Le anáanguti lúngua weíri, lünabudúba, le ünabuti lanáangun lúngua, weíribei lanügün.

<sup>12</sup> Aríñagati giñe lun wügüri le amísurajabalin.

—Dánme le bíchugun ában adíneruni o fédu, mamísuraja báña bumádagu, ni bamúleni, ni bíbugañanu, ni jíbiri bidújeñu, ni bubésinanigu ja rísitiña, ladüga jamísurajabadibu giñe, bibíjubati bafáyeirujaja.

<sup>13</sup> Dánme le badügün fédu, amísuraja báña gudémetiña, siñáguatiña úngua, danímaatiña, maríjintiña.

14 Ábame gúnda ban, ladüga siñáti jafáyeirunibu, bibíjubeiti bafáyeiruaja lídaanme le jásaarun ja richáguabaña ligíbugiñe Búngiu lídaangiñe ouweni.

*Jémpulu luáguti oúnwenbun adíneruni*

15 Dan le lagáambunbalin ában jádaangiñe ja ñúnbaña luágu dábula cátei le, ába laríñagun lun Jesúsu.

—Gúndaabaña gürígia ja eígibaña lídan larúeijan Búngiu.

16 Ábati laríñagun Jesúsu lun.

—Ñíñein ában wügüri, íchuguti ában oúnwenbun adíneruni, ába louñajan amísuraja sarágu gürígia.

17 Óra lun adíneruni, aba louñajani lumúsun aríñaga joun amísurajoútiña. “Queímoun, aráanseeli sun cátei.”

18 Súngubei, ába jaríñagun luágu siñá lan jóudin. Laríñaga furúmiñeti. “Sun líña nagáñijan ában fulásu, mósu nídin aríjei, ferúduna bána, siñáti nídin.”

19 Laríñaga ában. “Agáñijaadina seíngü féru bágasu lánina wadágimanu, neíbuga ouchaña, adügabá fuleísei nun, ferúduna bána, siñáti nídin.”

20 Laríñagaya ában. “Sun líña namárieidun, ligía siñá lubei nídin.”

21 Dan le lagíribudun músu, ába labájüdaguni sun cátei le lun liyúbudiri. Ábati lagáñidun liyúbudiri, ába laríñagun lun músu. “Beíba lídan sun ũma le ubúrugubei, banügañame gudémetiña, siñáguatiña úngua, danímaatiña, jáma maríjintiña.”

22 Lárigiñe ladügüni, ába laríñagun músu lun liyúbudiri. “Nabúreme, adüga náali le bubeíbei nun, níjein mémegua ubáraü.”

23 Ábati laríñagun iyúbudiri lun músu ligía. “Beíba lídan sun ũma bougudin lueí ubúrugu, lúma sun fulásu geyégua láu, ábame bafósuruniña sun ja badárirun lun jayábin lídoun nufédun, buin támuga núban.

24 Ladüga nariñajare jun luágu úabei lan ni ában jádaangiñe ja namísurajabaña eígiti lídan nadíneragüdün.”

*Lúnti lígirúniwa sun cátei lun lánibei lan Crístu*

25 Sarágu jáña gürígia afálaruti Jesúsu, ába lagáraragun, ába laríñagun joun.

26 –Siñáti nánigubei lan le jínsiñejabutimaati lun lúguchi, o lúguchu, o lúmari, o lisáanigu, o líbugañanu jáma lamúlenu, o lítunu, o libágari guánarügü, sügü náu.

27 Le gíñe májabei lasúfurirun nueígiñe queísigubeirügü jamúga ában wügüri le anügüti lugúruwan, siñáti náni lan disípulu.

28 Ánjein arítagua ában jádaangiñe ladügün ában wáyelesi, ¿ma funági lañúuruba furúmiñe asáminara átiribei lan lagástarun lun laríjini ánjein gabáfu lubeí lun lagúmuchuni?

29 Ladüga ánjein líchiga ébuu, lárigiñeme lásiñerei wadágimanu agúmucha, jéjerajaba ja aríjubalin láu,

30 jaríñagame. “Guméseti wügüri le ában wadágimanu, siñá lumuti agúmucha.”

31 Ánjein lawúribuja lubeí ában urúei lúma ámu urúei, ¿ma funági ñurúti furúmiñe lun lasáminarun ánjein gayáraabei lubeí lageíndagun jáu díisi mílu súdaara lúma le jáubei wein mílu?

<sup>32</sup> Ánjeinti arítagua luágu siñábei lan, dánme le dísegili le ában urúei, ábame loúnajan aríñaga lun lun mawúribujan jamá, lun jebélurun lídoun idíli.

<sup>33</sup> Ítara líña lubeíti, furúmieguaügü jídaangiñe le mígirunti sun le lúmabei lun lafálarunina, siñáti nánibei lan disípulu.

*Dan le leféridiruni sálu lubásuan  
(Mt 5.13; Mr 9.50)*

<sup>34</sup> Buíti sálu, ánjein leféridira lubásuan, ¿cábagi un ju lan?

<sup>35</sup> Mabuídunjali ni lun lábunawagún nádü lídan, ni lun lidérebugu múa, fíwarügaalime. Agáamba jumána, jugúya le garígeirugubei lun jagáambun.

## 15

*Jémpulu tuáguti mudún to eféridiruboun  
(Mt 18.10-14)*

<sup>1</sup> Luágu ában wéyu, ába jayárafadun sarágu agúburajatiña liseínsuna gumádi jáma gafígountiña lun Jesúsu lun jagáambuni.

<sup>2</sup> Ába jadímurejan fariséogu jáma arúfudajatiña lilúrudun Moisés luágu Jesúsu lueígiñe cátei le, jaríñaga.

—Wügüri le, resíbi lumútiña gafígountiña, jou ligía jáma.

<sup>3</sup> Ábati líchuguni Jesúsu jémpulu le joun, laríñaga.

<sup>4</sup> —¿Ca jídaangiñe, lun jamúga galügüniña lan san mudún, leféridira ában jádaangiñe, mígirun lubáña gádürü-wein-dísi-néfu ñi, lubárua, lun lídin áluajoun mudún to eféridiruboun?

<sup>5</sup> Dan le ladárirunun, ába lanügünun légewagu láu ugúndani.

6 Dan le lachülürün lúbiñoun, ába loúndaruniña lumádagu jáma lubésinanigu, laríñaga joun. “Gúnda jumá úara núma, ladüga darína nilügün mudún tó yebe eféridiruboun nueí.”

7 Naríñajare jun luágu ítara méme líña weíritima lan ugúndani siélu luágu ában gafígounti le asáansiruti luríban ligáburi lun lafálaruni Búngiu, sügü láu jawágu gádürü-wein-dísi-néfu gürígia richágutiña ligíbugiñe Búngiu ja memégeirunbaña jasáansiruni jagáburi.

*Jémpulu luáguti seínsu le eféridirubei*

8 ‘¿Ca würi to níjeinti jamúga dísi murúsun seínsu túma, leféridira ában lídaangiñe tueí, lun mébedun tan lámpu, ába tabuídajanun múna áluajei buídu darí lun tadáriruni?

9 Dan le tadáriruni, ába toúndaruniña tumádagu jáma tubésinanigu, taríñaga joun. “Gúnda jumá núma, ladüga darína seínsu lé yebe neféridirubei.”

10 Naríñajare jun luágu ítara líña lan gíñe ugúndani jádan láni Búngiu ánjeligu luágu ában gafígounti le asáansiraguti luríban ligáburi lun lafálaruni Búngiu.

*Jémpulu luáguti irájü le acháragadubei*

11 Rulumuti gíñe Jesúsú jémpulu le joun, laríñaga.  
—Ñíñein méja ában wügüri jáu bián lirájüñü.

12 Ába laríñagun le amúleñein lun lúguchi. “Núguchi, rúbei alágan le yúbei nun nun guetó.” Ába lafánreinjani úguchili alágan jádan biángubei.

13 Málüti lueígiñe, ába loúndaruni amúleñein sun lumégegún, ába lídin díse lídoun ámu fulásu, ába lagástaruni liseínsun ñi lídan ában ibágari mabuídunti.

14 Dan le gumújali sun liseínsun, ába ladágarun ában lemégeirun eígini lídan fulásu ligía, ába ladáiragun lúngua lídan ában oúnwenbun mégei.

15 Ábati lídin áluaja wadágimanu lúma ában lílana fulásu ligía, ába loúnajani wügüri ligía oúnigiraña lilügüniña büüruju.

16 Weíriti liláma darí lun lawámadun lun lun leígini jeígin büüruju, míchugúnwati lun.

17 Ábati lasáminarun, laríñaga lúnguarügü. “¡Sarágu ñadágimeintiña lúbiñe nóguchi ígiraguati eígini joun, áu ya, oúwe niláma!

18 Nagíríbuda le ñíjin lubeí nóguchi, naríñagame lun. Nóguchi, afígounjaadina ligíbugiñe Búngiu lúma bigíbugiñe.

19 Madünaali lun nanáangun núngua quei biraü, barübana quei ában jádaangiñe ñadágimeintiña búma.”

20 Ába lárügüdün üma lun lagíríbudun lúbiñoun lúguchi.

‘Dísegi líña, ába laríjini úguchili irájü le, ába lagúdemedun lun. Ába leíbaagun lubároun, ába loúburuni, ába lachúuruni.

21 Ábati laríñagun isáani lun. “Nóguchi, afígounjaadina ligíbugiñe Búngiu lúma bigíbugiñe, madünaali lun nanáangun núngua quei biraü.”

22 Ába laríñagun úguchili joun lumúsuniña. “Sagájumoun tubuídun-ágei anáanguní furése, daüguagüda jumeí. Daüjuma giñe ában bágü luágu lújabu túma geídi luágu lugúdi.

23 Áfara jumeí liraüraü bágasu le dibúnetimaabei. ¡Weíga, eféduja wagíame!,



24 ladüga niraü le, rúnaali yebe quei jiláali áni chülüguaya, féridijalí yebe áni daríwama.” Ába jagúmeserun eféduja.

25 ‘Súnti buga dan le, níjeinti buga íbugañaü áraabu. Dánti le lagíribudun, dan le lachülürün tubádun múna, ába lagáambuni áfaruni lúma abínajani.

26 Ábati lagúarun lun ában jádaangiñe músu, ába lálügüduni ca lan susérebei.

27 Ába laríñagun lun. “Chülüjali bamúlen, áfaragüdalá búguchi liraüraü bágasu le dibúnetimaabei, ladüga lachülürün láu magádiei.”

28 Ába lagáñidun íbugañaü, májaali lebélorun. Ába láfuridun lúguchi, ába layúmuragun lun lun lebélorun.

29 Ába laríñagun lun lúguchi. “Subúdi bumúti luágu seríwjadina lan bun sarágu dan, madúraagunganeí le bubeíbei ni ában weíyaasu, míchugidibu ni ában liraüraü gábara nun lun nefédujan jáma numádagu.

30 Guetóti, láu liábin biraü le, le achágarubalin biseínsun jáma würíña wuríbatiña, ¡áfaragüdabá bágasu le dibúnetimaabei!”

31 Ábati laríñagun úguchili lun. “Niraü, amürü númañadibu súnwandan, sun le náni, báni.

32 Ánjein guetó, lúnti wadügün fédu lúma lun wagúndaarun ladüga bamúlen lé yebe rúwamaalíbei quei jiláali, chülüguaya, féridijalí yebe, áni daríwama.”

## 16

*Jémpulu luáguti óunigiruti le múaraanbei*

1 Aríñagati gíñe Jesúsu joun láni disípulugu.

—Ñíñein méja ában iyúbudiri rísiti, ñíñein gíñe ában loúniri lumégegún, ába jayábin aríñaga lun luágu lachágaruñein lan oúnigiruti ligía lirísin.

2 Ábati lagúarun iyúbudiri lun, ába laríñagun lun. “Ída liñásan cátei le, le aríñawagúbei nun buágu? Rúba fe nun luágu buwádigimari, ladüga masíjjadibu oúnigirei nílagu.”

3 Ábati leréderun oúnigiruti ligía asáminara, laríñaga lúnguarügü. “¿Cábati nadüga guetó lárigiñe gidála lan niyúbudiri wadágimanu nueí? Méretina lun nadügün wadágimanu jürüti, áni nibúsigaritina lun namúriajan.

4 Subúdi náali cába lan nadüga lun ñí jama erésibirutina jábiñe dánme mawádigimarijadina.”

5 Ába loúnajan jawágu ja adúweirubalin liyúbudiri lun jayábin lun ában ában. Ába lálügüdüni le furúmiñeti, laríñaga lun. “¿Átiri badúweiruni niyúbudiri?”

6 Ába laríñagun lun. “Dúwei numúti san barín agülei.” Ábati laríñagun oúnigiruti ligía lun. “Nuján bigáradan, ñurúba furése, badügame ában luágurügü dimí-san.”

7 Lárigiñe, ábaya lálügüdün ában, laríñaga lun. “Ángi amürü, ¿átiri badúweijan?” Laríñaga lun. “San ságü türígu.” Laríñagati lun. “Nuján bigáradan, adügabá ában luágurügü gádürü-wein.”

8 Ába lasúbudiruni iyúbudiri luágu chu lan láu oúnigiruti ligía lídan ligáburi ladügüni cátei.

Ligía laríñagun Jesúsu.

—Gürígia wuríbatifña ja lánina ubou le, chúti jáu lídan jáni jáma ámu sügü jáu ja lánina larúgounga, ja lirájüñü Búngiu.

<sup>9</sup> Siñáti leménigidún luágu irísini lánina ubou le, aríñagatina lubeíti jun lun jayúsuruni jírísini lun jadügün buíti, lun dánme lan le lagúmuchun jibágari, jerésibirúba tídan múna to magúmuchaditu, yágüta siélu.

<sup>10</sup> ‘Le adügüti buíti láu le murúsunrügüti, ladügüba gíñe buíti láu le gíbeti, le madügüti buíti láu le murúsunrügüti, madügünbei gíñe buíti láu le gíbeti.

<sup>11</sup> Ánjaün lubeíti madügün buíti láu buri irísini le láni ubou le, le uágubei siñá lan leménigidún, ¿cábago afíñera juágu lun ledéregerun irísini inárüniti lábugiñe jaríajaan?

<sup>12</sup> Ánjaüti madügün buíti láu jemégen ámu, ¿cábago íchigei le jáni guánarügü jun?

<sup>13</sup> ‘Siñáti lesériwidun ában gürígia joun bián iyúbudirigu, ladüga liyéreeguduba ában lun, línsiñedame le ában lun, o úarabei lan lun ában, lanügeime le ában quei ni cáta. Siñáti lesériwidúniwa lun Búngiu lúma lun seínsu.

<sup>14</sup> Agáambagu jáña fariséogu lun sun cátei le, ába jéjerajan láu Jesúsu, ladüga jínsiñe lan seínsu joun.

<sup>15</sup> Ábati laríñagun Jesúsu joun.

—Jugúya gürígia ja arúfudagubaña jóungua quei buítiña jagíbugiñe gürígia, ánjeinti Búngiu, subúdi lumútu janígi luágu wuríba tan. Le cátei le janügübei gürígia quei weíríti cátei, iyéreeguti lun Búngiu.

*Lúrodu lúma larúeijan Búngiu*

16 ‘Níjein meja lilúrudun Moisés lúma jarúfudajan profétagu darí lúmoun lidáani Juan. Lúmagiñe dan ligía, lapúrichijoún ugánu buíti le luáguti larúeijan Búngiu, sun gürígia jóuchatiña lun jebélurun lídoun.

17 ‘Méreenguntimaati lun lagúmuchagun siélu lúma uboú, máma lun magúnfulirun lan liñúraü-ágei dimúrei lídaangiñe lilúrudun Búngiu.

*Larúfudajan Jesúsu luágu ígiraguni  
(Mt 19.1-12; Mr 10.1-12)*

18 ‘Ánjoun lígira ában wügüri lúmari, lagámarida ámu, ladügüñein figoú le gíríbei adultériu, le gíñe agámariduti ában würi to ígiraguaaru, ladügüña gíñe adultériu.

*Wügüri le rísíbei, lúma Lázaro*

19 Aríñagati gíñe Jesúsu.

—Níñein méja ában wügüri rísiti, anáanguni fínutu to wéndegutu ladáüraguboun, ságüja wéyu ladáagun fédu láu sarágu wéndegu.

20 Níñein gíñe ában gudémeti gírítí Lázaro, sun lúra láu gumeín,

21 lañúurati buri múarugu tubéneri lúban rísiti ligía áluga leígini lífe eígini le eíguaduti lueígiñe lidábulan rísiti. Weírítí lasúfurirun darí lun lawánduni jayábin oúnli éjelujei lugúmein.

22 Luágu ában wéyu, ába loúnwen fugiábu ligía, ába janügüni ánjeligu lúmoun Abrahám, le ñjín jabeí jiláaña buítiña, ába gíñe loúnwen rísiti, ába lábunajoún.

23 Dan le lasúfuriruña lan rísiti ligía lídan fulásu le ñjín jabeí jiláaña wuríbatiña, ába liñúruni laríjin, ában laríjini Abrahám dísegiñe, láu Lázaro lúma.

24 Ábati lagúaragun, laríñaga. “¡Núguchi Abrahám, gudémená bun! Oúnajabeí Lázaro lun ladüdüragüdüni ligíbu lújabu láu dúna, ñübin lámuga éderei tuágu niñéñe, ladüga nasúfuriruña sarágu lídan wátu geméti le.”

25 Ába laríñagun Abrahám lun. “Niraü, jarítaguabá luágu buídu lán meja dan bun lídan bibágari, ánjein lun Lázaro, wuríbati meja dan. Guetó, buíti dan lun ya, bugúya asúfurira.

26 Bougudigiñe lueí sun le, níjein ában baráangu afánreinraguáwa júma, ja jamúga buséntiña joudin yágiñe lun ñíjin, siñáti, ni ja ñíbaña, siñáti jayábin ñájoun.”

27 Ábati laríñagun rísiti. “Amúriajatina búma, Núguchi Abrahám, lun bouñajani Lázaro lúbiñe núguchi,

28 añájein seíngü namúlenu ñi, lun ladímurejan joun, mayábin jamámuga gíñe lídoun fulásu lánina asúfuriruni le.”

29 Ába laríñagun Abrahám lun. “Níjein le labürüjabei Moisés jáma profétagu jáma ñi, jadüga jamá gásu láu!”

30 Ába louñabun rísiti, ába laríñagun. “Binárün, núguchi Abrahám, láu sun líra, ánjein ñüdüñ ában jádaangiñe jiláaña adímureja joun, lasáansiraguba jagáburi.”

31 Laríñaga Abrahám lun. “Ánjein mája jabeí jadügün gásu láu le laríñagubei Moisés jáma profétagu, mafiñebaña gíñe láu sun lásaarun ában jádaangiñe jiláaña lun lídin adímureja joun.”

*Luríban lafígoungüdüniwa ában gürígia  
(Mt 18.6-7, 21-22; Mr 9.42)*

<sup>1</sup> Ába laríñagun Jesúsu joun láni disípulugu.

—Súnwandan níjeinbei lán buri cátei afígoungüdüti gürígia, jáni fugiábu gürígia le afígoungüdüti ámu!

<sup>2</sup> Buítimaati jamúga lun lun lagurún baránajoun láu ában dübü le lamúlija awási güráñu luágu ligína sügü láu lafígoungüdün ában jádaangiñe ja ñübürigiñabaña lídan jafiñen nuágu.

<sup>3</sup> Ítara líña lubeiti touñigi jumá.

‘Ánjein adüga bamúlen o bíbugaña wuríbani bun, wéridibeí, ánjein asáansiragua ligáburí, ferúdunabeí,

<sup>4</sup> ánjein adüga wuríbani bun sédü weíyaasu lídan ában wéyu, sédü weíyaasu liábin aríñaga bun luágu madügüdügüya láali lan, lúnti ferúduna báni.

*Lubáfu afíñeni*

<sup>5</sup> Ába jaríñagun apóstolugu lun Jesúsu.

—Wabúreme, rúba lánwoun wafíñen.

<sup>6</sup> Ábati laríñagun Wabúreme Jesúsu joun.

—Lun jamúga níjein lan murúsuraü afíñeni jídan —gayáraati jamúga ñúraüraü lan queísi ában tíla mostása —gayáraati jamúga jaríñagun tun tídibu wéwe to. “Gidába yágiñe láu sun bílagüle, beíba ájücha baránaja”, áni lasúsereduña jamúga.

*Wesériwidun lun Búngiu máma ában cátei lun lateíngiruníwa luágu*

<sup>7</sup> ‘Ánjein níjein lubeí lumúsun ában jídaangiñe, dan le lagíribudun áraabugiñe lárigiñe lawouñan o louñigirun lan anímaalu, ¿laríñaguba funági lun músu ligía. “Belúba, ñurúba eíga”?

8 Uá, aríñagarügübei lun. “Aráansebeí neígin, aráanseñu amürüme lun beténirun nun sun anája lan eíga lúma áta, lárigiñeme, gayáraajalíme beígin lúma bátun.”

9 ¿Teínqui lumúti funági iyúbudiri músu luágu ladügüni le lubeíbei lun? Uá.

10 Jugúya giñéti, dánme lásurun jadügüni le uágubei laríñaga Búngiu jun lun jadügüni, lúnti jariñagun. “Músu mouñtiña wagía, ladüga lé rügüñein lúnbei wadügüni wadüga.”

*Lareídaguaüdüñ Jesúsü díisi gawágutiña gumeín*

11 Lídan lasígiruni Jesúsü luweíyasun Jerusaléoun, ába lásügürün labádinaguagiñe Samária lúma Galiléa.

12 Dan le lachülürünbei lídan ában liraüraü fulásu, ába jayábin díisi wügüriña gawágutiña gumeín, lubároun. Ába jeréderun díse lueí,

13 ába jagúaragun lun ítara.

—Jesúsu, Maésturu, gudéme wamá bun!

14 Dan le laríjinbaliña Jesúsü, ába laríñagun joun.

—Jeíba arúfudagua júngua joun fádirigu.

Dánti le ídirina jamá, ába jareídagun.

15 Níñeinti ában jádaangiñe, dan le laríjinbei luágu areídaguaali lan, ába lagíribudun le ñijin lubeí Jesúsü, adímurejeina buíti luágu Búngiu láu umálali jéreti.

16 Ába lájuduragun dagá ligíbu múarugu lun líchuguni eteíngiruni lun. Áni Samariána wügüri ligía.

17 Ábati laríñagun Jesúsü.

—¿Ma díisiñanu areídagutiña? ¿Jagáñagi ja jíbiri néfu?

18 ¿Niján gubeírügü teréncha le agíribuda eteíngirei Búngiu?

19 Ábati laríñagun lun wügüri ligía.

—Sarába, beíba, areídaguaadibu ladüga bafíñen.

*Ída lúba lan ligáburi liábin larúeijan Búngiu  
(Mt 24.23-28, 36-41)*

20 Ába jálügüdüni fariséogu Jesúsu ídaba lan lagúmesera larúeijan Búngiu, ába laríñagun joun.

—Dánme le lagúmeserun larúeijan Búngiu, mar-  
ijínbei,

21 maríñawagúnbei. “Niján”, o “Níngitan”, ladüga lídan linárün cátei, níjeinjali larúeijan Búngiu jagánagua.

22 Ábati laríñagun joun láni disípulugu.

—Lachülürüba dan lun meménija lánme janígi lun júmabadina lan, íbini luágurügü ában wéyu, masúseredunbei lídan dan ligía.

23 Laríñawagúba jun. “Niján Crístu ya”, o “Níngitan yágüta.” Iyéenibei, mídin jumá járigi, mafálarun jumáñame.

24 Ladüga ítara quei larijín ában labírijaníga lueígiñe ában louba siélu lun luágun le ában, ítara lúba dánme le nagíribudun ubouágun, áu le Wügüri Garaüwarügüti.

25 Lúnti nasúfurirun sarágu furúmiñe, mebéresen jagíame gürígia ja lánina dan le náu.

26 Queí meja lasúseredun lídan lidáni Noé, ítara lúba gíñe lasúseredun lídan búrime wéyu le niábingüle, áu le Wügüri Garaüwarügüti.

27 Dán meja ligía, jerédera meja gürígia eíga, áta, agámarida, íchaajaña jarájüñü lun jamárieidun darí



wéyu le lebélurun Noé tídown ugúnein to árcá. Ába liábin gúnran, ába jañáradagun súngubei.

<sup>28</sup> Ítara lúba gíñe quei lasúseredun lídan lidáni Lot. jerédera gürígia eíga, áta, agáñija, alúguraja, ábunagua, adáagua múna.

<sup>29</sup> Dan le láfuridunbei Lot ubúrugugiñe Sodóma, ába láburujan wátu geméti lúma sáfuru siélugiñe, ába láfaraguniña súngubei.

<sup>30</sup> Ítara lúba dánme le niábin, áu le Wügüri Garaúwarügüti.

<sup>31</sup> ‘Lídaanme wéyu ligía, le gürígia le bougudibei tuei lúban, ánjein níjein lubei lumégegún múnada, mebéluralá aságarei. Le gürígia le áraabubei lídan óra ligía, magíribudalá lúbiñoun.

<sup>32</sup> Jarítagua jumá luágu le asúseredubei tun lúmari Lot.

<sup>33</sup> Le áluguti leséfuruni libágari ya ubouágu, leféridirubei ibágari magúmuchaditi, le ánjabei leféridiruni libágari ya ubouágu, nueígiñe, libíjuba ibágari magúmuchaditi.

<sup>34</sup> ‘Nariñajare jun luágu áriebu lánme ligía, ñíbaña biáma gürígia arúmuga tídan ában meme gabána, lanügüba ában jádaangiñe, ígirúame le ában según jafiñen nuágu.

<sup>35</sup> Ñíbaña biáma würiña amúlija lídan ában, tanügüba ában jádaangiñe, ígirúame to ában.

<sup>36</sup> Ñíbaña biáma wügüriña áraabu, lanügüba ában jádaangiñe, ígirúame le ában.

<sup>37</sup> Dan le jagáambunbalin cátei le, ába jálügüdüni, jariñaga lun.

—¿Jalíabasan lasúsereda buri cátei le, Wabúreme? Lariñaga joun.

—Le ñí lumuti lúgubu jiláali, ñíba jóúndaragua wadúbi.

## 18

*Jémpulu tuáguti würi to jiláali túmari, lúma agúseragüdüti*

<sup>1</sup> Ába labájüdagun Jesúsu ában jémpulu joun, lun larúfudajan joun luágu lúnti lan jayúmuragun lun Búngiu súnwandan, láu gurásu.

<sup>2</sup> Laríñaga joun.

—Ñíñein meja ában agúseragüdüti lídan ában fulásu, minébe líña Búngiu lun, mebéresen ligía láu ni ában gürígia.

<sup>3</sup> Ñíñoun giñe ában würi lídan fulásu ligía, jilá meja túmari, ságü wéyu tídin lúmoun agúseragüdüti le lun líchuguni tirícha tun luágu ában tuwúribun lúma tágani.

<sup>4</sup> Luágu sarágu dan, májati yebe leténirun tun, lárigiñe, ába laríñagun lúnguarügü. “Láu sun minében lan Búngiu nun, mebéresen áu láu ni ában,

<sup>5</sup> quei nuján méme lan würi to ásüdagüda nichügü, neséfuraaru, jebé lámuga tiábin, gumú líñein nugúraasun.”

<sup>6</sup> Ába laríñagun Jesúsu.

—Niján laríñagubei agúseragüdüti le wuríbabei,

<sup>7</sup> gúbumeti leséfuraña Búngiu lánigu ja ayúmuragutiña lun wéyuagu, áriebu. ¿Lübei lubá líderaguniña?

<sup>8</sup> Uá, madárasanbei. Láu sun le, dánme le nagíribudun, áu le Wügüri Garaüwarügüti, ubouágun, ¿nadáriruba funásan afíñeni jádan gürígia ja yábaña, nuágu?

*Jémpulu luáguti fariséo lúma agúburajati liseínsuna gumádi*

<sup>9</sup> Rúyati Jesúsu ában jémpulu joun ja jarítaguabaña luágu richágua jamá ligíbugiñe Búngiu, janügaña ámu gürígia quei ni cáta. Laríñaga.

<sup>10</sup> —Ñüdütiña bián wügüriña témpulurugu ayúmuragua lun Búngiu, ában fariséo, ában agúburajati liseínsuna gumádi.

<sup>11</sup> Le fariséo, rára líña layúmuragun, laríñaga. “Búngiu, teínqui numútibu luágu mítaran nan quei jíbiri gürígia—jíwerutiña, wuribatiña, salúfuritiña, mítaraantina giñe quei agúburajati liseínsuna gumádi le.

<sup>12</sup> Ayúnaratina bián weíyaasu lídan dimáasu lun nagúnfulirun búma, rúnumuti giñe dísi gáwanün lídaangiñe ságü fiádürü le ebélurubei nun, bun.”

<sup>13</sup> Ánjeinti agúburajati liseínsuna gumádi, ába leréderun díse, mabúseerunti ni lun liñúruni laríjin siélun, le luweírin lúnabun lanáangun lúngua. Aboujarügüleí laníguagu láu igárigu, laríñaga. “¡Búngiu, gudémená bun, nugúya le gafígounti!”

<sup>14</sup> Naríñajare jun luágu giríbu lan agúburajati ligía lúbiñoun, resíbiñuleí Búngiu, máma fariséo ligía. Ladüga le anáanguti lúngua weíri, ñúraübei lanügün, ánjein le ñúraübei lanáangun lúngua, weíribei lanügün.

*Labíniruniña Jesúsu irájüñü  
(Mt 19.13-15; Mr 10.13-16)*

<sup>15</sup> Anaajouatiña giñe irájüñü lun Jesúsu lun lagúrurun jawágu, dan le jaríjinbalin disípulugu cátei le, ába jadeínjan joun ja anáajabaliña irájüñü.

16 Ába laríñagun Jesúsu joun lun jasígirun anáajaña jarájüñü lun, ába laríñagun joun lánigu.

—Ígira jumá lun jayábin irájüñü nun, mewéridija jumá lueí, ladüga ja ítarabaña quei jagía, jagía lílanabaña larúeijan Búngiu.

17 Ninárün jáu luágu le lan merésibirun lumúti larúeijan Búngiu láu afíñeni jarúmati líbe jafíñen irájüñü, mebélubei lídoun.

*Layánujan ában wügüri rísiti lúma Jesúsu  
(Mt 19.16-30; Mr 10.17-31)*

18 Ába lálügüdüni ában jádaangiñe ábutigu Jesúsu, laríñaga lun.

—Maésturu buíti, ¿ca lúnbei nadügüni lun gayára lan nibíjini íbágari le magúmuchaditi?

19 Laríñaga Jesúsu lun.

—¿Ca uágu baríñaga nun “buíti”? Ában rügüñein buíti, Búngiu.

20 Subúdi bumúti gumádi. Maganoúabá túma würi gámaritu, máfarajabá, míwerujabá, mayéejabá luágu ni ában, inébe jamá bagübürigu bun.

21 Laríñaga wügüri ligía lun.

—Gúnfulitina láu sun le lúmagiñe ñüraügidina.

22 Lídan le lagáambunbalin Jesúsu cátei le, ába laríñagun lun.

—Mégeigili ában cátei lun badügüni. alúgurabeí sun le búmabei, ábame bíchuguni lebégi joun gudémetiña, ábame garísin ban siélu. Ábame bagíribudun, ábame bafálarunina.

23 Dan le lagáambunbalin wügüri ligía cátei le, ába lírudagun, ladüga rísiti buídu.

24 Dan le laríjini Jesúsu lírudagun, ába laríñagun.

—¡Jénreenguti lun jebélurun rísitiña lídoun larúeijan Búngiu!

<sup>25</sup> Méreenguntimaati lun lásügürün ában caméyu lídaangiñe lujúyun ában agúsa sügü láu lebélorun ában rísiti lídoun larúeijan Búngiu.

<sup>26</sup> Ába jariñagun ja agáambubalin.

—¿Cáteiti gayáraabei lasálbarun?

<sup>27</sup> Laríñaga Jesúsu joun.

—Le jásiñerubei gürígia adüga, gayára lumúti Búngiu, ladüga úati ni cáta siñáti lun Búngiu.

<sup>28</sup> Laríñaga Pédro lun.

—Wabúreme, wagía, ígira wamáali sun le wámati lun wafálarunibu.

<sup>29</sup> Ába lariñagun Jesúsu joun.

—Nínárün jáu luágu furúmieguarügü lan le ígiruti lúban, o lagübürigu, o líbugañanu, o lamúlenu, o lúmari, o lirájüñü luágu larúeijan Búngiu,

<sup>30</sup> libíjubatíma sarágu weíyaasu lougiñe lídan uboú le, ibíjaleíme ibágari magúmuchaditi yágüta siélu.

*Ladímurejaanya Jesúsu luágu loúnwen  
(Mt 20.17-19; Mr 10.32-34)*

<sup>31</sup> Ába lagúarun Jesúsu joun láni dúusu apóstolugu jábugua, ába lariñagun joun.

—Weíbuga Jerusalén guetó, le ñíba lubeí lagúnfulira sun le jabürüjabei profétagu nuágu, áu le Wügüri Garaüwarügüti.

<sup>32</sup> Jederegerubadina joun ja mámabaña juríu, jéjerajaba náu, anába jamáname, suégu.

<sup>33</sup> Jabeíchubadina, lárigiñeme, ábame jáfarunina jilágubei, áni násaaruba lídaangiñe ouweni luágu lürüwan wéyu lúnya nabágaridun.

34 Úati gunfaráanda jamá ni cáta lídaangiñe cátei le, ibídiñegubeíti joun ca lan uágu ladímureja joun, darúguati laníchigu cátei le laríñagubei, joun.

*Lareídaguagüdün Jesúsu ában Jericóna maríjinti  
(Mt 20.29-34; Mr 10.46-52)*

35 Dan le achülüreinaali Jesúsu ubúrugun Jericó, ñíñein ában maríjinti ñun láru üma amúriaja.

36 Dan le lagáambunbei maríjinti ligía jásüüjan sarágu gürígia, ába lálügüdajan ca lan susérebei.

37 Ába jaríñagun lun luágu niján lan Jesúsu Nazarétna ásügüra ñígiñe.

38 Ábati lagúaragun, laríñaga.

—¡Jesúsu, le ladügawagun Davíd, gudémená bun!

39 Ja lubá lubáabaña, ába jadeínjan lun lun lámanichun, ligíatima lagúaragun.

—¡Ladügawagun Davíd, gudémená bun!

40 Ábati laráramagun Jesúsu, ába loúnajan anügei. Dan le yaráfaali lun, ába laríñagun lun.

41 —¿Ca babúseerubei nadügün bun?

Ába laríñagun lun.

—Nabúreme, buséntina naríjin.

42 Laríñaga Jesúsu lun.

—¡Ibíjabeí baríjin! Areídaguaadibu ladüga bafíñen.

43 Lídan meme óra ligía, ába laríjin maríjinti ligía, ába lafálaruni Jesúsu adímurejeina buíti luágu Búngiu. Sun gürígia ja aríjubalin cátei le, ába gíñe jadímurejan buíti luágu Búngiu.

## 19

*Jesúsu lúma Zaquéo*

<sup>1</sup> Ábati lebélorun Jesúsu fulásurugun Jericó, ába lásügürün ubúrugugiñe.

<sup>2</sup> Níñein ában wügüri rísiti, gíriti Zaquéo, jábuti agúburajatiña liseínsuna gumádi.

<sup>3</sup> Buséntiti Zaquéo laríjini Jesúsu lun lasúbudiruni, siñáti laríjini ladüga ñúraüraüti lúgubu, áni gíbetiña gürígia.

<sup>4</sup> Lúnti gayára lan laríjini, ába leíbaagun ubáraü, ába laweínrun tuágun ában tídibu wéwe sicómoro yaráfa lun le ñígiñeba lubeí lásügüra Jesúsu.

<sup>5</sup> Dan le lásügürün Jesúsu ñígiñe, ába laríjin íñun, ába laríñagun lun Zaquéo.

—Zaquéo, raríba furése, ladüga lúnti neréderun búbiñe ugúñe.

<sup>6</sup> Ábati larárirun Zaquéo furése, ába lerésibiruni Jesúsu lúbiñe láu ugúndani.

<sup>7</sup> Dánti le jaríjini jíbiri gürígia cátei le, ába jagúmeserun adímureja luágu lídin Jesúsu erédera lúbiñe ában gaffíounti.

<sup>8</sup> Ábati laráramun Zaquéo, ába laríñagun lun Jesúsu.

—Nabúreme, níchiga lamídan le nómabei joun gudémetiña, áni ánjein íwerujaadina lubeí lueí ában gürígia láu eyéeraguni, náguyugüdüba gádürü weíyaasu sügü láu lun.

<sup>9</sup> Laríñaga Jesúsu lun.

—Sálbañu jáña tílana múna to ugúñe, ladügawagun giñe Abrahám amürü.

<sup>10</sup> Ligía niábinbei uboúagu, áu le Wügüri Garaüwarügüti, lun náluajaniña lúma asálbaraña já yebe féridijañabaña.

*Jémpulu luáguti díisi murúsun seínsu*

11 Dan le añája lubeí gürígia agáambajei laríñaguni buri Jesúsu cátei le, ába labájüdagun ában jémpulu joun, ladüga ayárafadeinaali lan lun Jerusalén áni jarítaguatiñáti luágu lagúmesera lan larúeijan Búngiu dan ligía.

12 Ábati laríñagun joun.

—Ñíñein ában wügüri íñugutiña lidújeñu, leíbugati wügüri ligía lídoun ámu fulásu díseti lun líchugúniwa lurúeiteme lageíra, ábayame lagíribudun.

13 Lubáragiñe láfuridun, ába loúnajan jawágu díisi jádaangiñe lumúsuniña, ába ledéregerun ában seínsu le gebégiti sarágu lun cáda ában, ába laríñagun joun. “Agárabaja jumeí seínsu le darí nagíribudun.”

14 Queíti liyéreegunbei wügüri ligía joun lílana fulásu, ába jóúnajan lárigi lun jaríñagun lun le lúnbei líchuguni ubáraü lun luágu mabúseerun jamáni lun jarúeiteme.

15 Láu sun líra, resíbiwati lun urúeime, ába lagíribudun lageíroun. Dan le lachülürün, ába loúnajan jawágu lumúsuniña já buga únbaña líchigei seínsu lun lasúbudiruni átiriñein lan lagañirun cáda ában.

16 Ába liábin le furúmiñeti, ába laríñagun. “Nabúreme, gáñeitina díisi weíyaasu ligíbuagun biseínsun.”

17 Laríñaga urúei lun. “Buíti, ában músu buíti bugúya. Quei úara bubeí lídan le murúsunrügüti, níchigaadibu agúmadija lídan díisi fulásu.”

18 Ábaya liábin ában, ába laríñagun. “Nabúreme, gáñeitina seíngü weíyaasu ligíbuagun biseínsun.”



19 Ába giñe lariñagun lun. “Bagúmadija lídan seíngü fulásu.”

20 Ábati liábin ában, ába lariñagun. “Nabúreme, niján biseínsun, areída numúti tídan ában músue ladüga nanúfude bueí,

21 ladüga ában ban wügüri derégüdati, reídeitibu láu cátei le mawádigimaritibu luágu, alúbaja amürü le ní lumuti mábunagun ban.”

22 Ábati lariñagun urúei lun. “Músu wuríbatu, luágu guánarügü berérun nagúseragüdábu. Quei subúdi bubálin luágu ában nan wügüri derégüdati, luágu reídei nan láu cátei le mawádigimaritina luágu, alúbaja áu le ní lumuti mábunagun nan,

23 ¿cáti uágu míchububalin niseínsun báncürugun lun jamúga lagánwoundun dan le nagíribudun?”

24 Ába lariñagun joun ja ñíbaña. “Gidájumei seínsu lueí, rújumei lun le díisibei lúma.”

25 Ába jariñagun lun. “Wabúreme, níjeinga díisi seínsu lúma.”

26 Ába lariñagun urúei. “Nariñajare jun luágu sun lan le adügati buíti láu le lúmabei, libíjuba lánwoun, ánjein le madügünti ni cáta buíti láu murúsun le lúmabei, lagídarúaba murúsun ligía lueí.

27 Játi náганиñu, já yebe mabúseerúnbaña lun urúei nan, barújumaña ñájoun, áfaragua jumáña jilágubei nigíbugiñe.”

### *Lebélorun Jesúsu Jerusaléoun*

*(Mt 21.1-11; Mr 11.1-11; Jn 12.12-19)*

28 Lárigiñe lariñaguni Jesúsu cátei le, ába lasígiruni luweíyasun Jerusaléoun jáu lánigu, ligía jabá jabá.

29 Dan le chülü mémeeli lídoun buri fulásu le Betfajé lúma Betánia, yaráfa lun wübü le gíribei Olívos,

30 ába laríñagun joun biáma jádaangiñe láni disípulugu.

—Jeíba lídan liraüraü fulásu le wagíbugiñebei, dánme le jachülürün ñi, jadáriruba ában burígü güráñu le maweinrúngili. Jafáragadeíme, ábame janügüni ñájoun.

31 Ánjaün álügüdüwa ca lan uágu jafáragadei, jaríñagame luágu busén láani Jabúreme.

32 Ába jóúdin, ába jadáriruni ítara quei laríñaguni Jesúsu joun.

33 Dánti le añája lubeí afáragadei burígü, ába jálügüdüniña labúriña, jaríñaga joun.

—¿Ca uágu jafáragadei burígü le?

34 Ába jóúnabuniña.

—Ladüga busén láani Wabúreme.

35 Ábati janügüni lun Jesúsu, ába jíchugunun janáangun lanágawagun burígü, ába jaweinragüdüni Jesúsu luágun.

36 Quei awáansereina lan Jesúsu, átulejeina jamoún janáangun luágu üma lubá.

37 Dan le jayárafadun lun larárirún wübü le Olívos, ába jagúmeserun sun lánigu Jesúsu ja afálarubalin agúaraja láu ugúndani lúma adímureja luágu luweírigan Búngiu, luágu buri miláguru le jaríjibeí.

38 Jaríñaga.

—¡Biníwati urúei le ñübinbei lídan líri Wabúreme Búngiu! ¡Níjein ñurúguaü siélu, lúma uweírigu lun Búngiu!

<sup>39</sup> Ábati jariñagun fariséogu ja ñíbaña jádan gürígia lun.

—Maésturu, aríñagabá joun bánigu lun jámanichun.

<sup>40</sup> Laríñaga Jesúsu joun.

—Nínárün jáu luágu ánjaña lan ámanichaja ja, lagúarajaba lán buri dúbü nuágu.

<sup>41</sup> Dan le layárafadun lun Jerusalén, dan le laríjini ubúrugú ligía, ába layájuajan jawágu lílana fulásu ligía, laríñaga.

<sup>42</sup> —¡Lun jamúga gunfaráanda jumáni ugúñe luágu áu lan ümabei lun ñurúguaü jun, buíti jamúga! Májatün.

<sup>43</sup> Ligía lachülürüba lubeí wéyu buri wuríbati jun, jadügame jáganiñu ában baríeru geyégua láu jubúrugute lun siñá lan jáfuridun ñígiñe, ábame jageíndagun júma lídaangiñe sun oúbaü.

<sup>44</sup> Jagünrinchagubei jufúlasun le gumúti, mígirunbaña ni ában dúbü ligíbuagu dúbü, jáfarúaba sun jugúya, ladüga mebéresen jumá láu óra le liábinbei Búngiu asálbaraün.

*Larúmadagüdünnun Jesúsu témpulu*

*(Mt 21.12-17; Mr 11.15-19; Jn 2.13-22)*

<sup>45</sup> Ábati lebélorun Jesúsu témpulurugun, ába laságaruniña ja alúgurajabaña jáma ja agáñijabaña ñi.

<sup>46</sup> Laríñaga joun.

—Laríñajare tídan Lerérun Búngiu. “Núban, fulásu le ñí lubei gayára lan jayúmuragun gürígia nun”, ánjein jugúya, barújumaaru quei jában jíwerutiña.

<sup>47</sup> Ságü buri wéyu larúfudajan Jesúsu témpulurugu, añájati jábutigu jafádirigun juríu jáma arúfudajatiña

lilúrudun Moisés, jáma gíñe lábutigu fulásu áluaja ída lúba lan jáfaruni jilágubei,

<sup>48</sup> madáritiña ída lúba lan jadügüni ladüga weíri lan jórabajoúniwa sun güri-gia lun jagáambuni lerérun.

## 20

*Lirícha Jesúsu témpulurugu  
(Mt 21.23-27; Mr 11.27-33)*

<sup>1</sup> Luágu ában wéyu, dan le témpuluruguñein lubeí Jesúsu arúfudaja joun güri-gia, apúrichijeí ugánu luáguti asálbaruni, ligía jayábin jábutigu jafádirigun juríu, jáma arúfudajatiña lilúrudun Moisés, jáma wügüriña weírigutiña lídan jafíñen juríu,

<sup>2</sup> ába jaríñagun lun.

—Aríñagabeí woun ca lan biríchabei lun badügüni cátei le. ¿Ca íchugubalin ubáfu le bun?

<sup>3</sup> Ábati laríñagun Jesúsu joun.

—Nálügüdáadün gíñe ában cátei, oúnaba jumána.

<sup>4</sup> ¿Ca oúnajabalin Juan abásteragüdaja? ¿Loúnajan Búngiu ódi jóúnajan wügüriña?

<sup>5</sup> Ába jagúmeserun aríñaga jámagua.

—¿Cába waríñaga? Ánjawa aríñaga luágu loúnajan lan Búngiu, laríñagame woun ca lan uágu mafíñerun wabeí lun.

<sup>6</sup> Ánjawa aríñaga luágu jóúnajan lan wügüriña, jachámuraguba güri-gia dübü wawágun, ladüga chouuru jamúti luágu proféta lán meja Juan.

<sup>7</sup> Ábati jaríñagun luágu ibídiñe lan joun ca lán meja oúnajabalin Juan abásterágüdaja.

<sup>8</sup> Ábati laríñagun Jesúsu joun.

—Maríñagun nubeí gíñe jun ca lan áu ubáfu nadügei buri cátei le.

*Jémpulu jawáguti ñadágimeintiña wuríbatíña  
(Mt 21.33-44; Mr 12.1-11)*

<sup>9</sup> Ába lagúmeserun Jesúsu adímureja joun güri-gia, ába labájüdagun ában úraga le gíbebei laníchigu, joun. Niján úraga ligía.

—Ñíñein meja ában wügüri ábunaguti beíbei lichárirugu, lárigiñe, ába lájayajani lichári joun ñadágimeintiña, ába lídin lídoun ámu fulásu luágu sarágu dan.

<sup>10</sup> Dan le lachülürün lidáni alúbajani, ába loúnajan ában lumúsun anügei lufánran, ába jabúleiseiruni ñadágimeintiña músu ligía, ába jóúnajani lárigoún, míchugunga ni cáta lun.

<sup>11</sup> Ábayati loúnajan ábanya músu, ába gíñe janábuni, buleísei jameí, oúnaja jameí, míchugunga ni cáta lun.

<sup>12</sup> Ábaya loúnajan ábanya, ábaya gíñe jabúleiseiruni, ába jabúguni nígiñe.

<sup>13</sup> ‘Ába laríñagun labúreme ichári lúnguarügü. “¿Cábasán funa nadüga? Noúnajaali niraü le jínsiñebei nun, dánme le jaríjini, fágua inébebei joun.” Ába loúnajani.

<sup>14</sup> Dan le jaríjinbalin, ába jaríñagun jámagua. “Niján le lúnbei lerésibiruni alágan, wáfaraali jilágubei, wagía lámuga labúriña sun cátei.”

<sup>15</sup> Ábati jaságaruni lídaangiñe fulásu ligía, ába jáfaruni jilágubei.

Ábati lálügüdajan Jesúsu, laríñaga.

—¿Cábati ladüga labúreme ichári?

16 Liábinme, ábame láfaraguniña ñadágimeintiña jagía jilágubei, ábame líchuguni ichári joun ámu.

Dan le jagáambunbalin cátei le, ába jaríñagun.

—¡Masúsereda lámuga ítara!

17 Ába laríaguniña Jesúsu, ába laríñagun joun.

—¿Cáti lílabei le bürüñubei tídan Lerérun Búngiu le ñí lubei laríñaga.

Lé meja dübü le mabúseerun jabeí ábunagutiña, ligíaali furúmiñeti?

18 Furúmieguarügü le achúgeraguti luágu dübü ligía lagünrinchaguba, léti uágunti láburuja, labúrechagúbei. Áu dübü ligía.

*Luáguti liseínsuna gumádi*

*(Mt 21.45-46, 22.15-22; Mr 12.12-17)*

19 Lídan meme óra ligía, ába jálugun jábutigu jafádirigun juríu jáma arúfudajatiña lílúrudun Moisés járügüdüni Jesúsu, ladüga jasúbudiruni luágu jawáguti lan jémpulu le laríñagubei, madügün jamúti ladüga janúfude jaweí gürígia. Ábati jagúrabajan ámu dan.

20 Ábati jóúnajan gürígia ja ásügürütiña jóúngua camá jamuga jarúmatiña lun jaríajani Jesúsu, lun jaríñagagüdüni cátei le gawáguti gayára lan jíchugun lidúnrun lun jedéregeruni lun gumádimati.

21 Ligía jálügüdünbalin, jaríñaga lun.

—Maésturu, subúdi wamúti luágu richá lan le baríñagubei lúma gíñe le barúfudajabei, manúfudetibu gíñe lueí ni ában, ladüga ni cáta lan luweírigun gürígia bun, áni láu inárüni barúfudajei lémeri Búngiu.

22 Aríñagabá ában cátei woun. ¿buíti lun lafáyeijoún seínsu lun warúeite César ódi mabuídunti?

23 Ába lasúbudiruni Jesúsu luríban jarítangun, ába lariñangun joun.

—¿Ca uágu jabúseera jíchugun sádara nubá?

24 Arúfuda jumá ában lídaangiñe seínsu ligía nun. ¿Cá iyáwa lúma íri le bürüñubei luágu?

Jaríñaga lun.

—Láni César.

25 Ábati lariñangun joun.

—Le láni César rújumei lun César, le láni Búngiu rújumei lun Búngiu.

26 Siñá jamútiti áburugüda tídoun jasáadaran láu lé buri lariñagubei jagíbugiñe gürígia, weírirügüti janígi láu loúnabagüle joun. Ába jámanichun.

*Álügüdjani lübügürü ásaaruni lídaangiñe ouweni  
(Mt 22.23-33; Mr 12.18-27)*

27 Lárigiñe, ába jóudin saduséogu aríjei Jesúsu. Jaríñajare saduséogu luágu másaarunbaña lan jiláaña lídaangiñe ouweni lúnya jabágaridun. Ábati jaríñangun lun Jesúsu.

28 —Maésturu, lariñajare Moisés woun tídan lilíburun, luágu ánjein lan ouwe ában wügüri, ába lígirunun lúmari marájüñüga ligía táu, lúnti lan lamárieidun lamúlen túma lun garájüñü lan táu, gadügawagun lámuga líbugaña le ouwebei.

29 Wel, ñíñanu mejáti sédü wügüriña gamúlenuguátiña, ába lamárieidun le furúmiñeti, ába loúnwen marájüñüga.

30 Ába lamárieidun le jabíaman túma buga lúmari íbugañaü, ába gíñe loúnwen marájüñüga.

31 Ábati lamárieidun le jürüwan túma, chülü lúmoun le jasédün, jilágua meme jagía, marájüñüga táu.

32 Ába gíñe toúnwen würi tugúya.

33 Aríñagabá ában cátei woun. dánmeti le jásaarun lídaangiñe oúweni lúnya jabágaridun, ¿cábati úmari würi to jádaangiñe, quei maríei tubei jáma sédügubei?

34 Ába laríñagun Jesúsu joun.

—Lídan ubou le, maríetiña wügüriña jáma würiña,

35 ánjein lídaanme dan le lúnbei liábin, úabei agámariduni siélu jádan ja garíchabaña lun ásaaruni lídaangiñe oúweni lúma lun jebélurun siélun agánawa ñi lun sun dan. Magámaridubaña ñi, míchaajan jamáñame jarájüñü lun maríei,

36 ladüga moúnwendügüyaaña gürígia siélu, ítaraañame quei ánjeligu, lirájüñü jañáme Búngiu ja saráaña lídaangiñe oúweni.

37 Moisés guánarügü arúfuda lumúti luágu níjein lan ásaaruni lídaangiñe oúweni lídan le labürüjanbei luágu búbugati geméti. Laríñajare ñi luágu Búngiu lan Lubúngiutebei Abrahám, Isáac lúma Jacób.

38 Láu dimúrei ligía, arúfuda lumúti Moisés luágu wínwangiña lan Abrahám, Isáac lúma Jacób, láu sun jilá lan jágubu, ladüga máma Jabúngiute jiláaña Búngiu, Jabúngiute ja wínwangiñabaña. Wínwangiña lanügüniña Búngiu sun gürígia.

39 Ábati jaríñagun arúfudajatiña lilúrudun Moisés.

—Buíti baríñaguni, Maésturu.

40 Ába málügüdagun jamáli lan.



*¿Ladügawagunsan David Crístu?  
(Mt 22.41-46; Mr 12.35-37)*

<sup>41</sup> Ába lariñagun Jesúsu joun.

—¿Ída liñásan jariñagunbei luágu ladügawagun lan David Crístu?

<sup>42</sup> Lariñajare David guánarügü tídan líburu to gírriboun Sálmos.

Ariñagati Búngiu lun Nabúreme. “Ñurúba lueígiñe noúnwenren,

<sup>43</sup> daríme níchuguniña báganiñu bújaburugun.”

<sup>44</sup> ¿Ída lubáti ladügawagun lan David Crístu, áni ariñagati David guánarügü lun Crístu “Nabúreme”?

*Ladárirun Jesúsu jadúnrun arúfudajatiña lilúrudun Moisés*

*(Mt 23.1-36; Mr 12.38-40; Lc 11.37-54)*

<sup>45</sup> Ñíñanu sarágu gürígia agáambajei Jesúsu, ába jagáambun lariñagun joun láni disípulugu.

<sup>46</sup> —Toúnigigua jumá júngua jaweí arúfudajatiña lilúrudun Moisés, ganígitiña jeíbugun táu anáanguni durúrutu, busén jagía lun labúsurún joun láu inébesei úmadarugu, áluaja jameí ubáraü le jabára weírigutiña tídan ligílisi, lúma lubuídun-ágei ubáraü lídan eígini.

<sup>47</sup> Gidá jamutu giñe jában würiña ja jiláañe úmari jaweí, lúnti jadáuragun láu, ába jadügün furieigi migínaguti. Weíribei jasúfurirun luágu sun le jadügübei.

## 21

*Seínsu le tíchugubei ában fugiábu würi témpulurugu  
(Mr 12.41-44)*

<sup>1</sup> Ába laríjin Jesúsu jíchaajan rísitiña seínsu tídoun buri gáfu to lágei seínsu témpulurugu,

<sup>2</sup> arija lumúti gíñe tíchugun ában würi jiláali túmari, gudémetu, bián gáwanün tídoun gáfu.

<sup>3</sup> Ába laríñagun Jesúsu.

—Ninárün jáu luágu gíbetima lan tíchugun fugiábu würi to sügü jáu súngubei, ladüga sun jagía, lídaangiñe le ígiragubei jáma jíchiga,

<sup>4</sup> ánjoun tugúya, láu tugúdemegun tíchigei sun le túmabei lún yebe tawínwandun.

*Laríñagun Jesúsu luágu tagünrinchawagúba lan témpulu*

*(Mt 24.1-2; Mr 13.1-2)*

<sup>5</sup> Jadímurejaña fiú gürígia tuágu témpulu, luágu tubuídunmeraü láu lubuídun buri tidübüri lúma buri cátei le jíchugubei gürígia lun tawéndedun. Ábati laríñagun Jesúsu.

<sup>6</sup> —Lachülürüba wéyu lun lagünrinchawagún sun le jariagubei tuágu témpulu to guetó, merédebei ni ában dübü ligíbuagu dübü.

*Seíni buri lubá lagúmuchun ubou*

*(Mt 24.3-28; Mr 13.3-23)*

<sup>7</sup> Ábati jálügüdüni, jaríñaga lun.

—Maésturu, ¿ídamé san lasúseredá buri cátei le? ¿Cábasan seíni waríja luágu dánjali lan lun lasúseredun?

<sup>8</sup> Ába laríñagun Jesúsu.

—Toúnigi jumá, mayeedúa jumá. Jayábinba sarágu aríñageina luágu áu lan jagía, jaríñagame. “Áu Crístubei”, “Niján dan ligía.” Mafíñera jumá joun, mafálara jumáña.

9 Dánme le jagáambun ladímurejoún luágu awúribujani lúma jawágu gürígia agárabagua luágun jarúeite, manúfudedagua jumá, lasúsereduba le furúmiñe, mámagilíme lagúmuchun uboú líra.

10 Ába lasígirun aríñaga joun.

—Lageíndaguba ában fulásu lúma ában, awúribuja ligíame ában ageíraü lúma ámu.

11 Ñíbei oúnwenbun buri járabaganáli, ilámaü, sándi, lídan ámuñegueinarügü fulásu, larijúba buri cátei janúfunati siélu lúma oúnwenbun buri seíni.

12 ‘Lubáragiñe lasúseredun sun le, járüjoúba, eíbaajoúa jugúyame. Janügüba agúsera tídan jalígílisin juríu, jádarawagúba furísunrugun, barüwa jugúyame jagíbugiñoún urúeigu jáma gumádimatiña, nueígiñe, lun jagúseragüdünün,

13 ligíame jidáani lun jadímurejan luágu nufúleisein.

14 Aráanse jumeí jarítangun lun madíjeri jumá cába lan jaríñaga jueígiñegua,

15 níchuguba dimúrei lúma lichú áu jun le lásiñerun ni ában jádaangiñe jáganiñu asígenera ni oúnaba.

16 Jalúgurubadün jagübürigu guánarügü, jíbugañanu, jamúlenu, jidújeñu, jumádagu. Jáfarúba jídaangiñe,

17 jiyéreeguduba joun sun gürígia, nueígiñe.

18 Lídaanme sun líra, latoúnigirubadün Búngiu le gumúti,

19 áni ánjaün meme derégüdagua lídan jafíñen nuágu, jibíjibeí ibágari magúmuchaditi.

20 ‘Dánme jaríjin geyégua jamá lan súdaara ubúругu Jerusalén, subúdi jumeí luágu yaráfaali

lan lagünrinchagun ubúrugú ligía.

<sup>21</sup> Jáméti gürígia ja Judéabaña, lúnti janúrajan luágún buri wübü, ja ubúrugubaña Jerusalén, lúnti jáfuridun ñígiñe, ja áraabubaña, magíribuda jamá ubúrugun.

<sup>22</sup> Luwéyuri buríbei jafáyeirun gürígia luágu wuríbati le jadügübei, dánme le lagúnfulirún sun le bürüwañubei tídan Lerérun Búngiu.

<sup>23</sup> ¡Fugiábugume würíña ja dageínatiña lídan dan ligía, o ja lan garájüñütiña ja gurágiña! Ladüga ñíbei sarágu igárigu ubouágu, larúfudubei Búngiu luweírin ligáñi luágu jafígoun gürígia ja juríu.

<sup>24</sup> Ñíbaña ouwegutiña wuríburugu, jíbiri janáawaguba adáürawagua lídoun ámu ageíraü, ábame jagünrinchaguni ja mámabaña juríu ubúrugú Jerusalén daríme lagúmuchun dan le íchugübei joun lun jadügüni.

*Ligáburi ída lúba lan liábin Crístu*

*(Mt 24.29-35, 42-44; Mr 13.24-37)*

<sup>25</sup> ‘Lasáliragubáti buri seíni luágu wéyu, luágu játi lúma jawágu warúguma, ábame laweíridun janígi néchaanigu ubouágu, ábame janúfudedagun luágu lanárimelajúujan lúma labouñjan lugúdi barána.

<sup>26</sup> Ladágaruba falálaü jawágu gürígia láu anúfudei, láu jasáminarun luágu cátei le lúnbei lasúseredun, ladüga járügüdüba lan warúguma ámu üma.

<sup>27</sup> Ábame laríjín niábin, áu le Wügüri Garaüwarügüti, lídan juánriñu láu sun nubáfu lúma ouñwenbun nuweírigun.

<sup>28</sup> Dánme le lagúmeserún buri cátei le asúsereda, ragújuma dügüdaguaü, iñúra jumeíme jichügü, ladüga madíseelime jasálbarun.

29 Rúlumuti gíñe jémpulu le joun.

—Aríja jumouún tídibu ígo, o furúmieguaügü tídibu wéwe.

30 Dan le jaríjin labouúchun tubána, subúdi jumúti luágu yaráfaali lan lidáani lubáchouga.

31 Dánme gíñe le jaríjini lasúseredun buri cátei le, subúdi jumeí luágu madíseeli lan lidáani Búngiu lun larúeijan.

32 ‘Nínárün jáu luágu lagünrinchawagúba lan sun ubúругu le Jerusalén lubáragiñe jóúwegun gürígia ja lánina dan le.

33 Lagúmuchaguba siélu lúma ubouú, ánjein nerérun, ladúraruba lun sun dan.

34 ‘Tounigi jumá, mígira jumá lun tabuínchun janígi láu cátei málati quei sarágu afúuduni, bacháruaü, lúma buri idíjeri luágu buri cátei lánina ibágari le, márügüdün lámugaün wéyu nagíribudagüle ubouúgun lídan magáradajan jumá,

35 quei ában sádara to adárurutu. Ladúga ítara lúba liábin wéyu ligía jawágun sun ja aganoúbaña lídan sun fulásu ya ubouúagu.

36 Aráanseñu jumá lubeíti, ayúmuragua jumá lun Búngiu sun dan, gayára lámuga jibíjin ubáfu lun jawánduni sún buri cátei le lúnbei lasúseredun, lun gíñe gayáraabei lan jarúfudagun júngua nigíbugiñe táu tarúman anígi.

37 Ábaja larúfudajan Jesúsu témpulurugu wéyuagua, árieibu, ábaja lídin erédera luágu wübü le Olívos.

38 Ábaja chülügiñe jamá gürígia témpulurugun ságü bináafin lun jagáambuni.

## 22

*Jelédegun áganiñu lubá Jesúsu*

*(Mt 26.1-5, 14-16; Mr 14.1-2, 10-11; Jn 11.45-53)*

<sup>1</sup> Yaráfaali fédu le lidáani teigíniwa fein to magánatu ísi, fédu le jarítaguagüle juríu luágu meja dan le lásügürünbei láni Búngiu ánjeli áfaraguaña jígirama Ejíptona, máfaragun lumútiña jígirama Israélitagu.

<sup>2</sup> Ábati jáluajan jafádirigun juríu jáma arúfudajatiña lilúrudun Moisés ída lúba lan jáfaruni Jesúsu jilágubei, ibídiñounga joun gürígia, ladüga janúfude jaweí.

<sup>3</sup> Ábati lagáñeiruni Máfia larítangun Júdas Iscarióte, le ában jádaangiñe láni Jesúsu dúusu apóstolugu,

<sup>4</sup> ába lídin adüga darádu jáma jábutigu jafádiriñegu juríu jáma jábutigu tisúdaarana témpulu lun ledéregeruni Jesúsu joun.

<sup>5</sup> Ába jagúndaaragun, ába jaríñagun lun Júdas luágu jíchuguba lan seínsu lun,

<sup>6</sup> ába lañúurun darádu, ába lagúmeserun áluaja ída lúba lan gayára lan ledéregeruni joun dánme le úa jamá gürígia.

*Lagúmujoún leigin Jesúsu jáma lánigu*

*(Mt 26.17-29; Mr 14.12-25; Jn 13.21-30, 1 Co 11.23-26)*

<sup>7</sup> Ába lachülürün fédu le ídaanbei teigúa fein magánatu ísi, ñí lubei gíñe ladágarawagüdüwa mudún le lánina fédu.

<sup>8</sup> Ába lariñagun Jesúsu lun Pédro lúma Juan.

—Jeíba aráanserei eígini le lánina fédu.

<sup>9</sup> Ába jálügüdüni.

—¿Jalíagi babúseera waráanseruni?

10 Laríñaga joun.

—Dánme le jebélurun ubúrugun, jadúnraguba lúma ában wügüri táu ában dináa láu dúna, jafálareime chülü tídoun múna to ñíjin lumúti lebélera.

11 Jaríñagame lun tabúreme múna. “Laríñajare Maésturu. ¿Jigóun rúmu to ñí lubei gayára lan neígini eígini le lánina fédu jáu náni disípulugu?”

12 Ábame larúfudun ában rúmu weírítu jun tougiñegua múna, aráanseñu tíña, jaráansereime eígini ñi.

13 Ába jóudin, ába jadáriruni sun cátei quei laríñaguni Jesúsu joun, ába jaráanseruni eígini lánina fédu ñi.

14 Dan le lachülürünbei óra, ába lañúurun Jesúsu jáu láni disípulugu luágu dábula,

15 ábati laríñagun joun.

—¡Oúnwenbun nabúseerun neígini eígini lánina fédu le júma lubáragiñe noúnwen!

16 Ladüga naríñajare jun luágu meígindügüya náali lan eígini lánina fédu le daríme lagúnfulirún laníchigu lídan larúeijan Búngiu.

17 Ábati lanügün ában wéru táu diweín lújaburugu, ába leteíngiruni Búngiu, laríñaga.

—Barüjumei le, fánreingua jumeí jídaangua,

18 naríñajare jun luágu mátundügüyaadina lan diweín daríme liábin larúeijan Búngiu.

19 Lárigiñe, ába lanügünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun, aríñageina.

—Núgubu le, le lúnbei ledéregerún juágu. Lúmagiñe guetó, adüga jumeí le, jarítaguagüleme nuágu.

<sup>20</sup> Ítara meme gíñe, lárigiñe jeígin, ába lanügüni wéru táu diweín, ába laríñagun.

—Niján níta le lúnbei láwiurun lídaangiñe núgubu juágu, lun lañúurun iséri darádu.

<sup>21</sup> ‘Niján wügüri le lúnbei ledéregerunina wáma ya luágu dábula,

<sup>22</sup> luáguñadina üma le lúnbei nanügüni, áu le Wügüri Garaüwarügüti, áni ¡fugiábutia wügüri le lúnbei lalúgurunina!

<sup>23</sup> Ábati jagúmeserun álügüdagua jádaangua cába lánfuna alúgurei.

*Ladímurejoún luágu cába lan weírigutima*

<sup>24</sup> Ába jasígenejan lánigu luágu cába lan jádaangiñe weírigutimá.

<sup>25</sup> Ába laríñagun Jesúsú joun.

—Lídan arúejani lánina ubou le, agúmadijatiña já buri lurúeitena fulásu, camá jamuga labúreme jagía, já buri lábutigu fulásu, aríñawagúati jawágu luágu wügüriña jamá ja gadügatiña fuleísei joun gürígia.

<sup>26</sup> Ánjein lídan narúejan, mítaraanti, lubáragiñe líra, le weírigutimaabei le tímatimaati jídan lúnti lanáangun lúngua quei le únabutimaabei, le agúmadijabei, lúnti ítara lan quei le esériwijabei.

<sup>27</sup> ¿Cági weírigutimaabei, le añúurubei eíga luágu dábula, ódi le esériwijabei? ¿Ma le añúurubei luágu dábula? Áni áu, ítara níña jídan quei le esériwijabei.

<sup>28</sup> ‘Jugúya úarabañája núma lídan nouchawagun,



29 ligía níchugunbadün lun jarúeijan quei líchugunina Nóguchi lun narúeijan.

30 Jeígiba, gurá jugúyame luágu nidábulan yágüta siélu lídan narúeijan, ñurú jugúyame luágu buri lála urúei lun jagúseragüdüniña jadügawagun dúusu lirájüñü Israel.

*Laríñaguni Jesúsu luágu leyéedaguba lan Pédro láu (Mt 26.31-35; Mr 14.27-31; Jn 13.36-38)*

31 Aríñagati gíñe Wabúreme Jesúsu.

—Simón, Simón, amúriajaali Máfia üma lúma Búngiu lun gayáraabei lan louchagunün quei lawánijoún türígu,

32 ibíja lumúti, áni ayúmuraguaadina buágu lun Búngiu lun meféridirun báani bafíñen nuágu lídaanme óra ligía. Áni dánme le bagíríbudun nun, rúba dügüdaguaü joun bíbirigu.

33 Laríñaga Simón lun.

—Nabúreme, aráansetina lun nídin búma furísunrugun, o lun lan noúnwen búma.

34 Laríñaga Jesúsu lun.

—Pédro, ugúñe méme, beyéedaguba náu ürüwa weíyaasu lubáragiñe layúgurujan gáyu, baríñaguba luágu ibídiñe nan bun.

*Layárafadun lórate ouchwaguni*

35 Ábati laríñagun Jesúsu joun.

—Dan le noúnjanbalün maságüteiga, ni láu lágei seínsu, ni geídi, ¿ñíñein funági jemégeirun?

Ába jaríñagun.

—Uá Maésturu, memégeiruntiwa ni cáta.

36 Ábati laríñagun joun.

—Ánjeinti guetó, le gaságüteti, barüloun, barü ligíame lágei seínsu, le mefeínteti, alúguraloún labíte lun lagáñijan lefeínte, ladüga wuríbati dan le.

<sup>37</sup> Nariñajare jun luágu lagúnfuliruba lan le taríñagubei Lerérun Búngiu nuágu. “Ába jabájüdüni jádan wuríbatiña.” Sun le bürüwañubei nuágu lagúnfuliruña guetó.

<sup>38</sup> Ábati jariñagun.

—Wabúreme, nuján bián efeín ya.

Ába lariñagun joun.

—Buíti.

*Layúmuragun Jesúsu Getsemani*  
(Mt 26.36-46; Mr 14.32-42)

<sup>39</sup> Ábati láfuridun Jesúsu, ába lídin luágun wübü le Olívos quei ligáburiñaja, ába jóudin láni disípulugu lúma.

<sup>40</sup> Dan le jachülürün lídan fulásu ligía, ába lariñagun joun.

—Jayúmuragua, mefeídirun jumámugei jafíñen nuágu.

<sup>41</sup> Ába ladísedun Jesúsu jaweí murúsunraü, ába lájuduragun ayúmuragua lun Búngiu,

<sup>42</sup> lariñaga.

—Núguchi, ánjabu busén, séfu bána lueí oúnwenbun asúfuriruni le lúnbei nasúfurirun, madügüwalá le nabúseerubei, le la babúseerubei adügüwa.

<sup>43</sup> Ábati liábin ában ánjeli siélugiñe lun líchugun érei lun.

<sup>44</sup> Dan létima laweíridun ligárigu, ligíatima layúmuragun láu érei, lédedejati lísüga lueí camá jamuga oúnwenbun lédedejan jítaü, múarugun.

45 Dan le lásaarun lídaangiñe layúmuragun, ába ladáriruniña disípulugu arúmuga, larúmagüdün íruni.

46 Ábati laríñagun joun.

—¿Ca uágu jarúmuga? Sarájuma, jayúmuragua, meféridirun jumámugei jafíñen nuágu.

*Janügüni Jesúsu adáüra*

*(Mt 26.47-56; Mr 14.43-50; Jn 18.2-11)*

47 Nígili Jesúsu adímureja, ligía jayábin sarágu gürígia, Júdas, le ában jádaangiñe dúusu disípulugu, jabá jabá. Aba layárafadun lun Jesúsu lun lachúuruni.

48 Ábati laríñagun Jesúsu lun.

—Júdas, ¿láu ában chúuti balúgurana, áu le Wügüri Garaüwarügüti?

49 Játi lúmabaña Jesúsu, dan le jaríjinbalin cába lan asúsereda, ába jaríñagun lun.

—Wabúreme, ¿ageíndagua wamáña táu efeín?

50 Ába lánchuguni ában jádaangiñe lánigu Jesúsu larígei lumúsun fádiri íñutimaati, le loúnwenren.

51 Ába laríñagun Jesúsu.

—Ígira jumáña, buídurügaali.

Ábati lagúruruni Jesúsu larígei músu ligía, ába lareídagun.

52 Ába laríñagun joun jábutigu fádirigu, joun wügüriña weírigutiña lídan jafíñen juríu, lúma joun jábutigu tisúdaarana témpulu, ja ñübinbaña anúgei.

—¿Jiábin nuágu táu efeín lúma wéwe camá jamuga jíwerutina?

53 Dan lé meja júma nan témpulurugu ságü wéyu, magúrugubeitün nuágu, wel, niján jidáani lun

jadügüni jugúndan náu, óraali lun lagúmadijan le labúremebei lubúriga.

*Laríñagun Pédro luágu ibídiñe lan Jesúsu lun  
(Mt 26.57-58, 69-75; Mr 14.53-54, 66-72; Jn  
18.12-18, 25-27)*

<sup>54</sup> Ábati járügüdüni Jesúsu, ába janügüni lúbiñoun fádiri le íñutimaabei, ábati lafálaruni Pédro dísegiñe.

<sup>55</sup> Ába jáfuragun wátu ñi lamídaangua baríeru, ába jañúurun geyégu láu, ába gíñe lañúurun Pédro jádan.

<sup>56</sup> Queíti taríjini ában músu ñun larügürügü wátu, ába teréderun aríaguei, ába taríñagun.

—Lúmañein buga gíñe Jesúsu gürígia le.

<sup>57</sup> Ába leyéedagun Pédro, laríñaga.

—Ibídiñeti wügüri ligía nun.

<sup>58</sup> Murúsun lueígiñe, ábaya laríjini ában, ába laríñagun.

—Jánigu gíñe amürü.

Ába laríñagun Pédro.

—Máma jánigu áu.

<sup>59</sup> Queí buri ában óra lárigiñe, ábaya laríñagun ában.

—Inárüni luágu lúmañajañein lan wügüri le ladüga Galiléana gíñe.

<sup>60</sup> Ábati laríñagun Pédro.

—Ibídiñeti nun ca lan uágu badímureja.

Lídan meme óra ligía, dan le nijángua lan Pédro adímureja, ába layúgurujan ában gáyu.

<sup>61</sup> Ába ladígiragun Wabúreme Jesúsu aríja luágun Pédro, ába laríttagun Pédro luágu lé buga laríñagubei Jesúsu lun. “Lubáragiñe layúgurujan gáyu ugúñe, beyéedaguba náu ürüwa weíyaasu.”

62 Ábati láfuridun Pédro, ába layájun láu igárigu.

*Jéjerajan láu Jesúsu*

*(Mt 26.67-68; Mr 14.65)*

63 Ja wügüríña ja oúnigirubalin Jesúsu, ába jéjerajan láu, bei jameí.

64 Ába jagüraguni lágu, ába jagáyuajan ligíbuagun, aríñageina jagía.

—¡Bugúya le profétabei, aríñagabeígia ca lan agáyuajabei buágu!

65 Ába buri jaríñagun sarágu ámu cátei anábei.

*Jesúsu ligíbugiñe líñun-ágei lúrudu*

*(Mt 26.59-66; Mr 14.55-64; Jn 18.19-24)*

66 Dan le larúgadunbei, ába jóúndaragun wügüríña weírigutiña lídan jafíñen juríu, jábutigu jafádirigun juríu, jáma arúfudajatiña lilúrudun Moisés, ába janügüni Jesúsu ligíbugiñoún jadámurin le líñun-ágei lúrudu. Ába jaríñagun lun ñi.

67 —Aríñagabeí woun, ¿amürüsan Crístubei le lúnbei lasálbaruniña gürígia?

Ába laríñagun joun.

—Ánjana aríñaga jun luágu ánja lan, mafíñebadün nun,

68 ánjaün nálügüdagua, moúnabun jubádina, mígiragüdün jumáname.

69 Naríñaga ában cátei jun. lúmagiñe guetó, nañúuruba, áu le Wügürí Garaüwarügüti, lueígiñe loúnwenren Búngiu le Súnti Gabáfuti.

70 Ábati jálügüdüni súngubei.

—¿Amürü lubeíti Liraübei Búngiu?

Ába laríñagun Jesúsu joun.

—Ánja, áu, quei jaríñaguni jugúya guánarügü.

<sup>71</sup> Ábati jaríñagun.

—Mabúseerunjadiwa geféen jamá ámu woun, agáamba wamáali lídaangiñe guánarügü liyúma.

## 23

*Jesúsu ligíbugiñe Piláto*

(Mt 27.1-2, 11-14; Mr 15.1-5; Jn 18.28-38)

<sup>1</sup> Ábati jásaarun sun líñun-ágei lúrudu, ába janügüni Jesúsu ligíbugiñoun Piláto,

<sup>2</sup> ába jagúmeserun íchiga lidúnrun, jaríñaga.

—Darí wamaali wügüri le achágaraguágüdaña gürígia, laríñajare luágu moun lan lun wafáyeijan seínsu lun urúei Rómana, aríñagati gíñe luágu ligía lan Crístubei le lanúadirubei Búngiu lun lasálbaruniña gürígia, aríñaga ligía luágu urúei lan ligía.

<sup>3</sup> Ábati laríñagun Piláto lun.

—¿Amürüsan Jarúeitebei Juríu?

Laríñaga Jesúsu lun.

—Ánja, ítara líña quei baríñaguni.

<sup>4</sup> Ábati laríñagun Piláto joun jábutigu fádirigu lúma joun jíbiri gürígia.

—Madáritina dúru luágu wügüri le.

<sup>5</sup> Ábatima jaríñagun jére.

—Lachágaraguágüdüñanu sun gürígia Judéana láu ligáburi larúfudajan, lagúmesera Galiléagiñe, niján mémegua adügei chülü ñájoun.

*Jesúsu ligíbugiñe Heródes*

<sup>6</sup> Dan le lagáambunbalin Piláto cátei le, ába lálügüdajan ánjein Galiléana lubei wügüri ligía.

7 Dánti le jaríñagun lun luágu Galiléana lan, ába loúnajani lun Heródes, le gumándan Galiléa, ladüga ñíñein Heródes Jerusalén lídan dan ligía.

8 Ába lagúndaaragun Heródes dan le laríjini Jesúsu, ladüga agáambañajaali lan luágu áni lüja labúseerun laríjini, agúrabatiti laríjin ladügün ában miláguru.

9 Ába lálügüdaguni luágu sarágu cátei, moúnabunti Jesúsu ni cáta.

10 Ñíñanu jábutigu fádirigu jáma arúfudajatiña lilúrudun Moisés, magúmuti jíchugun lidúnrun.

11 Ábati loúseruni Heródes jáu lisúdaaranigu quei ni cáta, éjeraja jagía láu. Ábati jadáüraguagüdüni táu anáanguni wéndegutu quei lanáangu urúei, ábaya loúnajani Heródes lun Piláto.

12 Wéyu ligía, ába gamádagua lan Heródes lúma Piláto, lubáragiñe líra, gáganiguañajatiña.

*Lasíadirúniwa Jesúsu lun loúnwen*

*(Mt 27.15-26; Mr 15.6-15; Jn 18.39-19.16)*

13 Ábati loúndaruniña Piláto jábutigu fádirigu jáma lúrudugu, jáma buri ámu gürígia,

14 ába laríñagun joun.

—Jugúya anügübalin wügüri le nun, jaríñaga luágu chagáguagüda lániña gürígia, álügüdagua náali jigíbugiñe, áni aríja jumúti luágu madári nan ni murúsun dúru luágu lídaangiñe le jaríñagubei luágu.

15 Madáriti giñe Heródes lidúnrun, giríbugüdalá woun. Aríja jumáali luágu madügün lan ni cáta le lúnti lafarún jilágubei lueígiñe,

16 nabeíchagüdali lubeíti, lárigiñeme, ábame nígiragüdüni.

17 Gagáburititi Piláto lúnja lígiragüdüni ában  
adaürüti fédurugu,

18 ába jagúarajan súngubei lídan ában.

—¡Áfarabeí le! ¡Ígiragüdabeí Barabási!

19 Barabási ligía, ladaürüña lueígiñe ligía lan ában  
jádaangiñe ja iñúragubaña jóungua luágu gumádi,  
lúma lueígiñe láfarajan.

20 Busénti yebe Piláto lígiragüdüni Jesúsu, ábaya  
ladímurejan joun,

21 ligíatima jagúaragun.

—¡Dáguabeí luágu gurúwa! ¡Dáguabeí luágu  
gurúwa!

22 Ába lariñagun Piláto joun luágu lürüwan  
weíyaasu.

—¿Cáti wuríbati ladügübei? Madáritina ni cáta  
le lúnti lafarún jilágubei lueígiñe. Nabeíchagüdali,  
ábame nígiragüdüni.

23 Ábatima jagúarajan lun ládarawagún luágu  
gurúwa, jéretiti jagúarajan jagía jáma jábutigu  
fádirigu, ába jabíjini le jabúseerubei.

24 Ábagubeíti ladügüni Piláto le jabúseerubei,

25 ábati lígiragüdüni wügüri le jabúseerubei, le  
adaürübei lueígiñe iñúraguni lúma áfarajani, ábati  
ledéregeruni Jesúsu joun lun jadügüni jagúndan láu.

*Ládarawagún Jesúsu luágu gurúwa*

*(Mt 27.32-44; Mr 15.21-32; Jn 19.17-27)*

26 Dan le jóúdiña lan láu Jesúsu lun ládarawagún  
luágu gurúwa, ába járügüdüni ában wügüri Cirénena  
gírítí Simón, liábiña áraabugíñe, ába janügagüdüni  
gurúwa lun, ába lídin láu lárígi lárígi Jesúsu.



27 Sarágu jáña gürígia afálaruti jáma sarágu würíña jádan ayájuajeina, agúarajeina láu íruni luágu.

28 Ába ladígiragun Jesúsu jawágun, ába laríñagun joun.

—Würíña Jerusalénna, mayájua jumá nuágu, jayájua juoúgua lúma jawágu jirájüñü,

29 ladüga liábinba buri wéyu dánme le laríñawagún. “Fuleíseiwatiña ja siñábei jagáraüdun jáma giñe ja marájüñüjañábaña, jáma ja mátagüdajanbaña.”

30 Ábameti jaríñagun gürígia lun wübü íñuti. “Áburujabá wawágun”, aríñaga jagíame lun wübü ünabuti. “Darúguabá wáu.”

31 Ladüga ánjein adügajabalin sun le láu tídibu wéwe le düdügili, ¿cábagi madügün jamá láu le mábeijali? (Ítara líña ladímurejan luoúgua, le madúnrunbei, lúma jawágu ja gadúnrunbaña.)

32 Barütiña giñe biáma gadúnruntiña lun jafarún úara lúma Jesúsu.

33 Dan le jachülürünbei lídoun fulásu le gíribei Lufúlasun Lábu Ichügü, ába jádaraguni Jesúsu luágu gurúwa jáma giñe biáma wuríbatiña jagía, ában lueígiñe louñwenren, ában lueígiñe lubáuna.

34 Dánti le añája lan ádaraguei Jesúsu luágu gurúwa, ába laríñagun.

—Núguchi, ferúduna báña ladüga ibídiñeti joun ca lan jadügübei.

Ába jájurerun súdeara ubúnuruni lun jaríjin cába lan un jádaangiñe terédera lanáangun Jesúsu.

35 Níñanu gürígia aríagua, ñíñanu giñe lúrudugu jéjerajaña láu, jaríñaga.

—Sálbati ámu, sálbagonalá gíñeti lúngua, ánjein inárüni lubeí luágu ligía lan Crístubei le lanúadirubei Búngiu lun lasálbaruniña gürígia.

<sup>36</sup> Éjerajatiña gíñe súdaara láu, láu jayárafadun íchiga tagúbüri diweín lun lun látunun,

<sup>37</sup> jaríñaga buri lun.

—Ánjein Jarúeite bubeí juríu, sálbaguabá búngua.

<sup>38</sup> Níñeinti ában abürüjóuni lougíñe lichügü, laráñajare ñi. “Niján Jarúeite Juríu.”

<sup>39</sup> Ába lanábuni ában jádaangiñe wuríbatiña ja dáwagubaña luágu gurúwa ñi Jesúsu, laríñaga.

—Ánjein bugúya lubeí Crístubei, sálbaguabá búngua, sálba báwame.

<sup>40</sup> Ába ladeínjan le ában lun louba, laríñaga lun.

—¿Manúfudetibusan lueí Búngiu, bugúya le lábugíñebeí ában meme súfuri lúma?

<sup>41</sup> Wagía, garíchatiwa lun wasúfurirun ladüga wafáyeijaña luágu wadüga, ánjeinti wügüri le, madügünti ni cáta wuríbati.

<sup>42</sup> Ábati laríñagun.

—Jesúsu, barítaguame nuágu dánme le lagúmeserun barúeijan.

<sup>43</sup> Laríñaga Jesúsu lun.

—Nínárün báu luágu númabadibu lan siélu, ugúñe méme.

### *Loúnwen Jesúsu*

*(Mt 27.45-56; Mr 15.33-41; Jn 19.28-30)*

<sup>44</sup> Amídirugu, ába labúrigadun sun fulásu darí ladaünrün ürúwa rábounwéyu.

<sup>45</sup> Ába labúrigadun wéyu, ába tajeíridagun tubélun témpulu tamídan túmagua.

46 Ábati lagúaragun Jesúsu ítara.

—Núguchi, deréga numútu nuwáni bújaburugun.

Quei laríñagun ítara, ába loúnwen.

47 Dan le laríjinbalin jábuti súdeara Rómána le asúseredubei, ába ladímurejan weírigu luágu Búngiu, laríñaga.

—Inárüni, madúnrunti buga wügüri le.

48 Sun güriía ja níbaña, ja aríjubalin le asúseredubei, ába jóudin nígiñe, áfarajaina jameí janíguagu, le jagárigu.

49 Ánjaña sun lumádagu Jesúsu jáma giñe würiña ja ñübinbaña úara lúma Galiléagiñe, ába jeréderun díse aríjei buri cátei le.

### *Labunún Jesúsu*

*(Mt 27.57-61; Mr 15.42-47; Jn 19.38-42)*

50 Níñein ában wügüri gíriti José, lídaangiñeti fulásu le gíríbei Arimatéa, le jafúlasun juríu. Buíti ligáburi wügüri ligía, richáguati ligíbugiñe Búngiu, lídaañein líñun-ágei lúrudu le jáni juríu.

51 Agúrabañu líñein larúeijan Búngiu, magúndaanti lubeíti láu cátei le ladügübei líñun-ágei lúrudu láu Jesúsu.

52 Ábati lídin lúmoun Piláto, ába lamúriajani lúgubu Jesúsu lúma.

53 Lárígiñe laráriragüdüni lueígiñe gurúwa, ába louburaguni táu ában gamísa, ába lácharuni lídoun ában umúajaü achigíti luágu ában dübü le ní lubei úagili lan ni ában abunúti.

54 Wáandaradi wéyu ligía, luwéyuri aráansejani lubá luwéyuri eméraguni joun juríu, áni agúñeeli gumése.

<sup>55</sup> Ába jafálaruni würiña já meja ñübinbaña lúma Jesúsu Galiléagiñe José, aríja jameí umúajaü, aríja jameí buídu ída líña lan líchugún lúgubu Jesúsu lídoun umúajaü.

<sup>56</sup> Dan le jagíribudunbei jábiñoun, ába jaráanseruni ibíñei buri le íchugúbei jawágu jiláaña, ábati jeméraagun lídan wéyu le eméraaguagülei quei laríñaguni lilúrudun Moisés.

## 24

*Lásaarun Jesúsu lídaangiñe ouweni  
(Mt 28.1-10; Mr 16.1-8; Jn 20.1-10)*

<sup>1</sup> Wéyu dimáasu, ába jagíribudun würiña luágun umúajaü, bináafingua, barüina jameí ibíñei le jaráanserubei jámagua.

<sup>2</sup> Dan le jachülürünbei, mámaali lídan lubára dübü le lidaü umúajaü.

<sup>3</sup> Ába jebélurun lídoun umúajaü ligía, madári jamúti lúgubu Wabúreme Jesúsu ñi.

<sup>4</sup> Súnti añája lan ñi arítagua jageí lánfuna, ligía jaríjin bián wügüriña rára jarúgabú táu anáanguni mirítu.

<sup>5</sup> Queíti jélemuchun láu jagíbu ünabun, buin láu anúfudei, ába jaríñagun wügüriña jagía joun.

—¿Ca uágu jáluajei le wínwanbei jádan jiláaña?

<sup>6</sup> Úati ya, saráli lídaangiñe ouweni. Jarítagua jumá luágu lé meja laríñagubei jun dan le Galiléañein lán meja, luágu le lúnbei lasúseredun lun, ligía le Wügüri Garaüwarügüti,

<sup>7</sup> luágu ledéregerúaba lan jájaburugun gafígountiña, ábame jádaraguni luágu gurúwa, ábame lásaarun lídaangiñe ouweni luágu lürüwan wéyu.

8 Ábati jarítangun luágu dimúrei le laríñagubei Jesúsu.

9 Lárigiñeti jagíribudun umúajaürugúgiñe, ába jabájüdaguni sun cátei le asúseredubei joun únsu apóstolugu lúma joun jíbiri lánigu Jesúsu.

10 Ja anügübalin ugánu le joun apóstolugu, María Magdaléna, Juána, María to lóguchu Jacóbo, jáma ja jíbiri würiña.

11 Dan le jaríñagunbalin buri cátei le joun apóstolugu, ába janügüni quei lílülün áu, mafíñetiña joun.

12 Ába láfuridun Pédro, ába lídin eibaagueina luágun umúajaü, dan le laríjinbei lurágeirugun, gamísa rügüñoun ñi, úaali úgubu. Ába lídin lúbiñoun láu luweírin anígi láu cátei le laríjubei.

*Luágu üma lun Emaúsun  
(Mr 16.12-13)*

13 Luágu méme wéyu ligía, jouđiña biáma jádaangiñe lánigu Jesúsu lídoun ában liraüraü fulásu gíriti Emaús, ürüwa óra eíbuguni Jerusaléngiñe,

14 adímurejeina jáña luágu sun cátei lé buri asúseredubei.

15 Súnti adímurejeina jamá, ába layárafadun Jesúsu joun, ába lagúmeserun eíbuga úara jáma.

16 Láu sun aríja jamáni, siñáti jasúbudiruni luágu Jesúsu lan.

17 Ábati laríñagun joun.

—¿Cásan le uágubei jadímureja, sun eíbugeina jumá?

18 Ába jaráramagun láu íruni jagíbuagu, ába louñabun ában jádaangiñe, gíriti Cleofás, ába laríñagun.

—Sun gürígia subúdi jamúti le asúseredubei Jerusalén lídoun buri wéyu le. ¿Amürü rügüñein jádaangiñe ja ñíbaña ibídiñejabu lun?

19 Ábati laríñagun joun.

—¿Cági asúseredubei?

Jaríñaga lun.

—Luáguti Jesúsu le Nazarétna, ában meja proféta láu ubáfu luágu le ladügübei lúma luágu lerérun ligíbugiñe Búngiu lúma jagíbugiñe sun gürígia.

20 Ábati jedéregeruni jábutigu wafádiriñegu jáma walúrudungu lun siádiwa lan lun ouweni lúma lun ládarawagún luágu gurúwa.

21 Rúwamutí yebe wafíñen luágu ligíaba lan eséfurei linásiñun Israél. Ürüwa wéyu guetó lueígiñe lasúseredun cátei le.

22 Láu sun líra, weírigüda jamáli jádaangiñe würíña ja wámabaña wanígi láu jóudin luágun umúajaü lubá buga larúgan,

23 queíti madári jamáni lúgubu ñi, ába jayábin abájüdagua woun luágu aríja jamá ánjeligu ñi, aríñaga jamá joun luágu wínwan lan Jesúsu.

24 Ába jóudin jádaangiñe wíbirigu aríjei umúajaü, ába jadáriruni ítara quei jaríñaguni würíña jagía, maríjin jamúti Jesúsu.

25 Ábati laríñagun Jesúsu joun.

—¡Louguati gíñe gunfaráanda jumá, lüti gíñe lubá jafíñerun luágu lé meja jaríñagubei profétagu!

26 ¿Ma funági lúnti meja lasúfuriruni Crístu sun cátei le lubáragiñe lerésibiruni luweírigun?

27 Ábati lagúmeserun afúnraanguágüdei sun le taríñagubei Lerérun Búngiu luágu joun, lagúmesera

túmagiñe buri lilíburun Moisés túmoun sun jalíburun profétagu.

28 Dan le jachúlürün lídoun fulásu le ñíjinbaña lubeí, ába ladügün Jesúsu camá jamuga lasígiraali leíbugun.

29 Ába jéredun luágu lun leréderun jáma, jaríñaga lun.

—Reídeibá wáma, ladüga ladáruduña áni gúñemémeeli.

Ábati lebélorun Jesúsu lun leréderun jáma.

30 Dánti le ñurújali jáma luágu dábula, ába lanügünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun.

31 Lídan óra ligía, ába léfegechun jágu, ába jasúbudiruni luágu Jesúsu lan, ába lagúmuchagun jagíbugiñe.

32 Ábati jaríñagun jámagua.

—¿Ma sandítiwa tásüdün wanígi le wagúndan dan le adímurejeina lubeí woun luágu üma, aríñagaleí tíla Lerérun Búngiu woun?

33 Ábati magúrabajaanjaña lan, ába járügüdün üma lun jagíribudun ubúrugun Jerusalén le ñí lubei jadáriraña únsu apóstolugu oúndaragu jáma gíñe jíbiri lánigu.

34 Ába jaríñagun ja oúndaraguñubaña ñi joun.

—Inárüni luágu saráli lan Wabúreme Jesúsu lídaangiñe ouweni lúnya labágaridun, aríja láali Simón.

35 Ábati jabájüdaguni bián wügüriña jagía le asúseredubei joun luágu üma, lúma luágu jasúbudiruni luágu Jesúsu lan dan le lagúbachagúnbarun fein.

*Larúfudagun Jesúsu lúngua joun disípulugu  
(Mt 28.16-20; Mr 16.14-18; Jn 20.19-23)*

<sup>36</sup> Ñígiña adímureja luágu buri cátei le, ligía lasáliragun Jesúsu jamídaangua, ába labúsurun joun, aríñageina.

—Ñurúguaü jun.

<sup>37</sup> Ába tájüchürün janígi láu sarágu anúfudei, jarítangun luágu pántu lan jaríjubei.

<sup>38</sup> Ába laríñangun Jesúsu joun.

—¿Ca uágu tájüchüra janígi? ¿Ca uágu níjein lubeí liloúguan afíñeni le tídan janígi?

<sup>39</sup> Aríja jumeí nújabu lúma nugúdi, áu méme le. Gurújumana, pántu, mágürügüti, mábu ligía, anáti áu.

<sup>40</sup> Dan laríñaguni líra, ába larúfuduni lújabu lúma lugúdi joun.

<sup>41</sup> Queíti mafíñen mémegiña lan ladüga ugúndani lúma luweírin anígi le jawágubei, ába laríñangun Jesúsu joun.

—¿Níjeinsan eígini júma ya?

<sup>42</sup> Ába jíchugun murúsun úduraü süti lun lúma síruudu,

<sup>43</sup> ába lanügüni, ába leígini jagíbugiñe sun jagía.

<sup>44</sup> Lárígiñe, ába laríñangun joun.

—Le asúseredubei nun, ligía lé meja uágubei naríñaga jun dán meja le júmagidina, luágu lagúnfulirúaba lan sun le bürüwañubei nuágu tídan liliburun Moisés, tídan jalíburun profétagu, lúma tídan líburu to gíríburun Sálmos.

<sup>45</sup> Ábati gunfarándagüda lánun Lerérun Búngiu joun,

<sup>46</sup> ába laríñangun joun.



–Bürüwañu líña luágu lúnti lan loúnwen Crístu, ába lánme lásaarun lídaangiñe ouweni lúnya labágaridun luágu lürüwan wéyu,

<sup>47</sup> lúnti lan gíñe lapúrichijoún lídan líri joun sun gürígia ubouágu lun jasáansiruni jouuserun lun ferúdunawa lan jafígoun, lagúmeseruña apúrichijani ligía ubúrugugiñe Jerusalén.

<sup>48</sup> Jugúya geféentün luágu buri cátei le.

<sup>49</sup> Noúnajabei Sífiri Sándu, le uágubei lariñaga Nóguchi Búngiu jun, ítara líña lubeíti, reídei jumá ya ubúругu Jerusalén daríme jerésibiruni ubáfu lúmagiñe Búngiu le siélubei.

*Lamúdeirun Jesúsu siélun*

*(Mr 16.19-20)*

<sup>50</sup> Ábati lanügüniña Jesúsu bougudin lueí ubúругu chülü Betánia, ába liñúruni lújabu, ába ln ferúdunawa laabíniruniña.

<sup>51</sup> Dánti labíniruniña, ába lamúdeirun jaweí, ába lanügüniwa siélun.

<sup>52</sup> Lárigiñe jájuduragun lun, ába jagíribudun járigoún ubúругun Jerusalén, ¡ma jagúndan!

<sup>53</sup> Súnwandánti témpulurugúñanu lan íchiga uweíriguni lun Búngiu.

**Lerérún Búngiu To Lánina Iséri Darádu**  
**New Testament in Garifuna (HO:cab:Garifuna)**

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
df8e4807-f4f9-5f4a-ab14-d1f7ffe98b0a